

蒲圻縣志卷之十一

人物志序

人物之生所以扶持人道維挽世運者也不惟成就者難其人而傳於世又有幸不幸焉孔子論次虞周五臣十亂之盛繼之曰才難不其然乎太史公曰伯夷叔齊雖賢得孔子而名益彰况於後世民不興行毀譽自用哉三代而上遺惡揚善之意寓於詩歌上自朝廷下及閭門里巷其間事父事君從政專對與夫勞人思嬾貞烈隱逸之行博採

蒲圻縣志

卷之十一序

人事得失以爲法戒意念深矣故曰經夫婦成孝敬厚人倫美教化移風俗莫重於詩也周衰王迹熄而詩亾詩亾而作春秋當日褒貶予奪之權嚴而正微而顯惡惡欲短而善善欲長上下二百四十二年之間曷嘗有遺憾哉夫幽光燉行其潛藏於下者至性所發原無表暴之心而困窮抑鬱之中又多爲採擇所不及致使真品湮沒盛德闇然而不彰者何可勝道故夫附青雲而爭光日月事蹟爛然後世讀其書慨然想見其爲人採風者固



樂得而存之所以明善善欲長之意也嗚呼士君子砥節勵名聲垂奕世斯亦幸矣然則論次不得孔子文章未能如史公又况淪亾散佚未經表章安得不爲之憮然也

人物志上

理學

經濟

忠烈

才猷

理學列傳

元

黃溥字彥傳至元元年中鄉試授慶元路鄞山書院山長爲人敦樸學知務本言動不苟得聖賢大學之道士子則之

宋愿號文齋其先自宋季徙蒲卜居于萼塘之龍窟潭愿生而穎敏力學不倦崇尚經術至忘寢食皇慶中初授濂溪書院山長轉澧州學正蒲圻縣志

卷之十一

理學

所在有聲

明

王允茂字才英居縣東積慶坊自少嗜學通經善吟詠一以道義自處未嘗苟合流俗險易一致士類嘆服與兄志學相友愛弟子從受詩經學甚衆號爲楚林先生鄉人皆化之洪武十八年被薦爲邵武泰寧知縣能勤其職歲旱禱雨輒應暇則與友人徜徉山水論道賦詩吏民愛之其卒也如哭其親有子愷傳詩經學舉進士

爲名臣解縉贊曰世多以經學專門不達于政
理若王泰寧非以經學致用歟而又以傳其子
與弟子視漢西都諸賢何媿焉 祀鄉賢

李德庸名弘以字行邑人別號斗室曾祖義山
宋咸熙進士祖智齊爲鄂州別駕庸幼嗜學讀
書務探微旨及長力肆研討講明性理必達闢
與先輩推讓之洪武十九年辟爲本學訓導造
就多士永樂五年典江西文衡得士蕭時中竟
擢大魁及被召入內會皇儲監國進經筵講藝

稱旨遷國子助教陳足疾免朝叅十年致仕 祀鄉賢

廖清字源潔武衛經歷崇信之子也弱植清苦
躬耕力學正統十二年中鄉試成化元年授武
義教諭慨然思緝金華正學手錄金仁山許白
雲及宋景濂諸集編輯誦讀雖隆冬酷暑不釋
晚年所得益深子傳及佐相繼登第傳授刑部
司務

廖俊字文英武衛經歷崇信之孫湯塘居士

川之子也篤志力行以古人自期待景泰元年
中鄉試授漢州學正西土鮮事文墨俊一日造
開元寺聞諸僧誦經音韻朗然嘆曰茲不踰于
庠生乎乃擇其年幼者四人趙杲方璧周冕張
敖置之先聖堂朝夕誨之後杲舉進士璧冕俱
領鄉薦而敖亦起貢爲府通判至今漢人稱其
德不衰再調嘉定手植海棠每歲賓興以花盛
開爲驗門下士如劉肅劉介童瑞諸人多躋顯
榮晚歸結廬芙蓉山翛然自得所著有芙蓉百

詠子漢弘治癸丑進士孫道南正德庚辰進士
胡堯凱字廷和號石泉右方伯堯元之弟也父
文以鄉薦爲四川成都府司訓公與兄堯元未
嘗一就外傳髫弁名動一時中正德癸酉鄉試
博覽墳籍崇尚經術怡情山水之間一舉後遂
高尚不仕究心理學遊嘉魚李大崖之門學者
稱之蓋淵源于陳白沙云

祀鄉賢

魏裳字順甫從仲父遊太學則已讀周禮左氏
國語及唐李杜各家言矣若桓謂生當以三尺

素豪于古人間安能吾伊學官語耶十六試講
生高等是時廖太史鳴吾家居觴諸生而太史
雅自負博而辨又貴倨也所引說經史連柱諸
生口獨裳避席奏對不窮又所請益時時出其
表太史自失曰何物少年乃爾足三冬耶諸生
亦大喜謂阿游胡渠使五鹿少府折角也蓋又
十餘年而舉鄉試又四年而成進士授刑部山
西司主事請急歸復守故官始與王元美及李
于鱗輩遊而好爲古文詞裳自以才不稱諸子

益自刻苦晝從曹中治司空城旦小問卽開卷
非夜分弗釋也而會母李恭人疾裳廢寢食而
侍者月餘搏額籲天者無數以是亦羸困而李
恭人竟不起裳痛哭不欲生一夕亦絕旦而蘇
時同年李師孟吳明卿視之裳張目曰得從先
恭人地下無恨以後事累二子二子曰咄嗟不
有而翁在耶裳乃稍稍就粥飲杖而起服除當
補官三月餘不報人或謂裳不當有所造請耶
裳笑曰我一欵段馬不數步而僵且歸矣亦不

知何門可造請久之復補山西司裳凡三爲其
司主事同舍郎皆後進據其上而其于推案文
法無害咸拱手矣已稍遷員外郎郎中最後爲
濟南知府時于鱗已棄官里居一切謝客裳三
及門而不見以一蒼頭報謝人或謂曰與若部
民胡倨也裳益往候之于鱗不自得乃出飲談
詩甚懽裳性高簡亡所過從所過從必于鱗卽
非于鱗亦無他客也以是竟其任時或謂裳文
章士心易之然其爲刑部甫蒞事而寬大同叅

議獄爭于其長及執政莫能難也決大獄江左
答其情稍有間者卽爲讞語著于牘以授御史
故于守濟南益敏練有聲是時寇蜂起齊魯間
裳畫策誘誅其渠率數人而散其黨使歸耕曰
汝第爲善不汝讓也所屬邑獨章丘腴而其人
最苦徭賦則皆爲豪所侵裳奮身往悉逮豪寘
之理于是伏田盡出而小戶大要得足食無困
徭矣于是裳以最滿遷爲山西按察司副使分
巡冀南道裳爲濟南三歲所得臺史薦凡六最

後一不當其意竟以指摘去副使歸久之有外
艱而其毀加于哭李恭人時汪伯玉填楚念欲
構楚史不就亡能當之者以聘裳旣服除乃卽
家開局集諸髫邑博士掌故手裁定之而先上
其草伯玉伯玉讀敘傳雜論而喜曰班荀儔也
所爲楚史凡七十六卷數十萬言而是時楚人
柯某亦爲楚史成俱上之臺或言二史當合者
裳意不懌曰五色有可合也者而淄白不可合
也毋已則寧篋吾史乎及裳疾所繇心血耗則

以楚史故旣屬續謂其次子彬如日數盡矣夫
吾詩與文孰傳哉其屬之元美遂瞑得年五十
八裳爲人溫溫長者湛于濂洛之學志在力行
而性特介于取予辨毫髮不苟所善如于鱗明
卿及吳興徐子與裳皆兄事之所最莊事于鱗
裳所習自經典性理子史諸天官卜筮龜策地
理家言靡不精究其詩最善近體沈鬱勁壯有
河朔風于文尤精刻削澹森森立不以藻競夫
冶飾澹辭侈靡爲市門粧者見裳可愧死已等

有雲山堂集子樸如中嘉靖辛酉鄉試官至徵
江守次子彬如萬曆壬辰歲薦官表陽教諭孫
說中萬曆戊戌進士官戶部侍郎裳以孫說贈
如其官 祀鄉賢 本傳王世貞撰

王良謨字克訏號鏡水嘉靖甲子舉于鄉爲直
隸元城教諭立教每先行誼所獎拔士多陟崇
階尋以憂去起補貴池擢知四川蓬溪縣極意
撫循德化所訖猾窳頓新創修蓬溪縣志建社
倉二十餘所積貯備賑其民至今賴之臺薦十

有四滿擬召拜郎署爲同事者詭易已名僅遷
真定府判聞報卽拂袖歸蓬人立祠尸祝焉生
平守正不阿力行德禮尤好義樂施予置義田
若干贍族額其莊曰景范撫從伯之孤如已弟
邑有罪人不能輸贖緩者公廉得其實往往爲
代出之族里有婚塋不能舉者必厚周焉潔已
修身深有得于學問之道撰愚得數卷邑人傳
誦之卒祀鄉賢子學孔字泗源天性孝友父歸
自蓬溪邑養備至尤畱心性命之旨不墜其家

學云孫台彥中萬曆癸卯鄉試鼎彥中萬曆壬子鄉試俱有傳

龔乾瑞字汝賢良傳子垂髫穎悟爲文必根極性道柅山田文宗拔爲士儁徵入濂溪書院然性恬退以嘉靖二十六年貢爲霸州同知到任一日卽挂冠歸顧聖之贈詩有云雄文獨抱千年恨畏路還多一日官家居觴詠自適課子孫必以禮法不欲失先世門風篤道甘貧待舉火者于數家不以空乏爲辭有貸必與之度不能償不責也有司高其誼鄉飲嘗一再赴後竟謝不往年六十七卒子茶中嘉靖甲子鄉試孫逢堯逢烈曾孫維祚俱以明經爲博士有聲

經濟列傳

宋

趙葵字南仲忠肅公方之子也其先衡山人家于梅隱坊或夢南嶽神降于其家生葵葵穎悟絕人與兄范幼從鄭清之全子才李璠遊年十二三隨父方鎮襄陽同諸將扈再興輩衝鋒討賊志在匡世嘉定十年敗金將烏古論高琪于棗陽十三年敗金將阿海于唐州有功授承務郎十五年起復直秘閣通判廬州進大理司直

蒲圻縣志

卷之十一

經濟

淮西安撫叅議紹定元年知滁州與兄戮力討李全加直寶章閣淮西東提典刑獄四年獲全殺之進福州觀察使左驍衛上將軍召拜寶章閣待制樞密副都承旨六年授淮東制置使知揚州端平元年朝議收復三京葵上疏請出戰授兵部尚書京河制置使知應天府畱守兼淮東制置使嘉熙二年加刑部尚書端明殿學士淳祐二年進大學士四年拜知樞密院兼叅知政事封長沙郡公督視江淮京西湖北軍馬九

年特授光祿大夫右丞樞兼樞密使信國公
佑五年進少保寧遠軍節度使魏國公開慶元
年判慶元府沿海制置使景定元年授兩淮宣
撫使判揚州魯國公咸熙元年進少傅二年加
少師武安軍節度使冀國公年八十一贈太傅
謚忠靖兄范字武仲歷立有戰功陞端明殿學
士京湖關陝宣撫使知開封府東京留守

宋史趙方并其子范葵傳蒲圻學記人物必以其子葵爲首其事蹟在蒲圻亦多顯著

明

蒲圻縣志

卷之十一

經濟

二

魏觀字杞山讀書蒲首山中構亭曰梅初陶然
賦詠以寄志焉元呂忠肅公誦其詩稱賞薦之
朝辭弗就江漢旣平明太祖徵聘諸賢觀與青
田劉基金華宋濂同謁上與語大奇之授平江
州學正遷國子助教浙江提刑僉事吳元年改
兩淮鹽運使入爲起居注一日偕待制王禕侍
上問曰漢高祖唐太宗孰優對曰太宗雖才兼
文武而予善未免矯揉高祖豁達大度規模弘
遠以茲觀之高祖爲優上曰高祖之度人皆

之然其記兄嫂之怨封其子爲頡羹侯怨豐之
叛不封雍齒不肯以豐爲湯沐邑其度亦未弘
矣太宗規模雖不及高祖然能駕馭羣臣各爲
已用及大業已定卒能保全功臣此則太宗爲
優也洪武初建大本堂命觀侍皇太子說書暨
受秦晉諸王經二年十月甲戌甘露降于乾清
宮禁林上同災祥對曰帝王恩及于民澤被于
物則甘露降陛下誕寬民賦粟庶惟豫底于菽
寧神應之臻穡此故也十一月冬暖如春上召

偕危素詹同吳琳宋濂遊內苑錫燕紫閣命各
賦一詩以述君臣同遊之盛觀以詩獻上覽之
大悅親製文序其事三年正月轉太常卿錫之
制曰太常之職掌郊廟社稷山川羣神厥任重
矣爾觀學行方正事朕有年屢持憲節振揚風
紀及領鹽課勞積茂彰頃居翰苑日記言動朝
夕之間屢進讜言朕心嘉悅七月命觀改定太
廟祝文是月簡爲侍讀學士十二月辛酉編集
大明志成以觀爲嘉議大夫國子祭酒宋濂爲

司業四年廷試進士觀與孫吾與王俱爲讀卷
官乃得吳伯宗等一百二十人是年九月坐考
祀孔子禮積緩乃請觀知龍南濂知安遠未至
邑卽召還以爲禮部主事錫燕奉天門上喜曰
前日逐卿去今日與卿飲何其樂哉乃命各賦
一詩五年三月上舍姑蘇經張士誠亂邦靡寧
宇廷臣薦親往遂命出守旣蒞事懲陳寧詩致
鋤暴樹良尊賢敬老聿興學較舉鄉飲酒禮徵
郡賢王啟王彝張羽闡文學周南老王行徐用

誠與貢穎之定儀節釋多耆董崑山周壽誼百
有十歲吳縣楊茂九十三林文友九十二悉加
賓禮躬餞諸郊觀者如堵時戎事甫戢百物
耗乃能力培風教封部皞然課績居最上特
爲四川行省叅知政事蘇父老上疏願齋命
還郡七年觀以郡舊治爲士誠竊據且地多水
患乃修府浚隄御史張度認其與旣滅之甚遂
與高啟等俱獲罪上憐之命所在沿江致祭皇
太子諸王哀賜有加云曾孫銘舉進士知溫州

府銘之子曰頽曰頽曰頽成舉鄉貢觀墓在新
溪之燈窩山 祀鄉賢 本傳廖道南撰

王愷字時舉號雲谷泰寧令允茂之子也永樂
元年中鄉試明年登曾棨榜進士明太宗文皇
帝靖難金陵廷臣舉愷授知江寧時百務倥偬
愷處之裕如上聞其政聲命撫畿甸逋氓咸集
一日上問戶部錢穀出納愷卽面對纖悉不爽
旣預修永樂大典晉左春坊左中允贊輔仁皇
于儲宮漢庶人扈從北征陰謀奪嫡構陷宮僚

悉下之獄愷在獄十年與石首楊文定公泰和
王文端公拘幽思鉉誦讀不輟仁皇登極同被
逮者擢置樞要而愷適以母艱終制宣德初起
復調補廣西僉事泗城土官盧氏與岑豹爭鬱
田州蠻奴黃佑強橫逼主岑紹奔南寧一時徭
獠騷起爲亂乃遣征蠻將軍山雲御史韓偉陳
泗同愷往撫愷宣諭威德土官効順思恩果化
威底于平又同御史陳衡捧檄綏勞貴州土彝
勞勩茂樹五年如京師上嘉其政績賜遊後苑

觀元宵燈愷上疏陳六事特賜俞允九年征大
藤峽襄翊有功至潯州建學宮炎徼嚮化正統
四年轉廣東左叅議往撫欽廉叛寇黃寬等事
平刻石于招遠山上錫之制曰爾發身賢科擢
任京縣載轉宮寮陟佐外臺克効勞勩特授奉
政大夫修正庶尹以示褒嘉爾其體朕至意以
弼成國家之治五世孫基茸其所遺詩文數十
篇名曰雲谷集 祀鄉賢 本傳廖道南撰

龔晟字德輝天順八年登彭教榜進士初階拜

江西道御史敕巡直隸八府繡斧所至盜息民
安按兩淮鹽船奸賈無所肆其欺無何廣東寇
猖獗又敕晟代巡晟至疏陳兩廣事不相協必
建制府于蒼梧以大臣總督軍務兼巡撫庶東
有警足以調西兵西有警足以運東餉上嘉納
行之起復韓雍總制大破蠻荒自是將權有統
兵力不分地方賴以寧謐無何又有浙西之命
斥舞文釐宿弊一時振刷不遺餘力來歸自浙
天子倚重無何又拜陝西護軍之敕往時客丘

所過殘破晟嚴緝申令旌旗變色市塗鷄犬安堵如故成化十一年孝宗已六歲尚處西宮中外慮爲萬貴妃忌害時晟爲臺長首請建立東宮爲天下本而建儲策定社稷以安蒼生係望行將有殊擢以疏論元宰李公時時心啣之竟量移貴州叅議以歸歸塗行李蕭然至雪連氏之寃表金童之婦南嘉周忻以疾卒于官邑熊梁以姦擠于水靡不愴然賻塋後廉得其狀按治之咸稱爲神明孫良傅嘉靖丙戌進士良猷

蒲圻縣志

卷之十一

經濟

七

戊子鄉貢良衡壬寅歲薦喬孫茶本棹逢祥維三俱中鄉試維三子璋中 國朝康熙壬子鄉

試 祀鄉賢

王儼字民望先世居蒲圻曾祖子民爲華容丞遂家焉儼中天順壬午鄉試成化己丑登張昇榜進士授兵部主事改工部都水治呂梁洪事竣轉刑部郎中往按鄭府盟津王獄多所平反補成都知府值妖僧海無邊等惑衆戮之擢河南右叅政復按涇陽王獄具得其實轉陝西右

布政使北朝入西固城總制王越屬儼督餉區
畫芻糧摘發奸宄大宏政績中官劉瑯索金驚
玉儼峻拒之尋陟副都御史巡撫山東上言
盜五事召爲戶部右侍郎攝太倉釐宿弊理漕
政人多稱之以忤逆奄劉瑾瑾矯詔謫戍遼東
三萬衛尋以赦歸致仕年八十八卒武皇哀之
諭祭塋儼墓在蒲子姓多居蒲者

黃珰字敬潤祖煜中洪武丙子鄉試爲合肥教
諭父城中永樂癸卯鄉試爲富順司訓珰成化

蒲圻縣志

卷之十一

經濟

八

乙酉舉于鄉乙未登謝遷榜進士授浙江西安
知縣爲政嚴峻豪猾屏跡徵拜福建道監察御
史堅持風紀不畏彊禦時貴州都勻苗亂大兵
進討敕珰往監軍紀績經畧常屈羣策改土爲
流改州爲衛厥功居多晉陟大理寺丞勒石黔
署手植叢桂尋致仕子誠工詩苦吟至墜落阮
塹不減灞陵驢背上風况曾孫圖昇萬曆壬子
以春秋中湖廣第一人官大名縣令

廖漢字天章宋端明殿學士正一之裔明嘉定

學正俊之子也成化十九年中鄉試弘治六年
計偕如春官西涯李文正公讀其文奇之簡置
進士高第授戶部主事陳情便養改南京戶部
時督儲都御史葉贊偏執徇權漢與爭辨兌泐
必宜于民乃已司徒王軾聞而避之及司諸廩
出納有齊庶人者怙冒撓泐力加禁治夙弊釐
正人咸稱便十五年監兌江西方伯林泮服其
孤介正德初服闋如京師逆奄劉瑾煽虐士風
瀾倒乃上疏抗論時政畱中不報再疏自陳卽

徒步出都門買舟南歸結茅五洪山下布衣竹
杖躬履阡陌非其力不食課諸子誦習墳典肆
志幽潛登眺雲壑遇樵夫田叟坐談終日至達
官富翁則絕不與語蓋有古逸民之風焉別號
五洪山人子男十二人次道南中庚辰會試第
二官至太子中允克經筵講官

謝鵬舉字仲南少貧力學登嘉靖三十二年癸
丑進士授戶部主事歷守臨江會廣寇張漣黨
大舉入清江鎮鵬舉躬擐甲胄截江大戰令

人預沉水中鑿賊艦賊不得渡溺死者無算十
敗之時憲司欲盡戮其俘以增級乃跪請曰此
皆良民爲盜驅者也何忍殺之而冒功遂止事
聞賜金幣擢廣東叅政海寇曾一本駕巨舟于
艘登岍築高壘臨城城危甚鵬舉嬰城固守賊
知不可破遁去陞浙江按察使轉左布政先是
監織造局者價不全給所私以萬計鵬舉盡畀
之無不感悅甲戌入覲以廉能爲天下第一廷
召錫燕賚金幣有加陟副都御史倭寇內訌督

兵往勦功不滿者僅數級或請下海窮搜鵬舉
曰汝第欲以滿級襲錦衣耳殺無辜而欺朝廷
吾不忍爲也不聽捷聞晉戶部侍郎蔭子承祚
入胄監尋陞右都掌南院百寮震肅未幾以與
江陵不協卽投劾歸入山二十九年杜門絕不
問外事藩臬長吏鮮得望其風采門庭蕭寂朝
遣禮部主事袁宏道詣家存問有詩載藝文志
中卒年九十三復遣評事玉蒞子祭塋子承祚
以蔭官京兆別駕年八十九卒

何思登字一舉號滄南明初鎮南知州燼之八
代孫天石珍之子也中嘉靖戊午鄉試登萬曆
甲戌進士初授行人公直高潔不事權要冊封
諸藩餽遺一無所受已行取爲權人所持遷南
京戶部主事刑部郎中陶允宜贈其詩云十年
不附中書省三載空畱比部郎陞守雲南一意
綏靖民彝載德以戢猶甸有功上特賜金嘉勞
之嗣丁內艱補臨江守甫浹月獲巨奸劉亨四
著聖諭六解戶曉焉半載又丁外艱起補池州

躬督耕桑祈雨有應慕宋守包公拯作希包堂
以志服後池人建祠祀之陞雲南按察司副使
備兵曲靖撫戢土酋爲院司亟稱未幾還里偕
諸耆英結香山之盟復起補廣西副使粵俗惰
慢公教以種植紡織之業一載化成旋入賀東
宮事竣請告院題加叅政歸署臬劉公庭芥遺
書云閱帑藏見公有遺俸在焉令人懍然起敬
特遣人齎上人以此益多其清介生平省約退
讓至于解紛雪枉每言人所難言尤剛腸嫉

不肯俯仰隨俗學根性命尊鄒魯斥二氏時推
真儒云年八十卒所著有翼正錄自鏡膚語硤
俗箴行于世長子夢周萬曆戊申歲貢次子夢
相有文名季子夢星中萬曆戊子鄉試 祀鄉賢

馬天錦字襲生河南知府練曾孫武寧令介之
子萬曆甲午舉于鄉明年登朱之蕃榜進士爲
興化府司理練達俊爽屢白沉寃縮泉州篆以
清介著聲莆人頌之有莆中德政錄生祠記溫
陵紀事陞工部主事典器皿節慎有加歲有羸

金以還內帑丙午典試山西所獲皆知名士轉
兵部武選司主事丁艱被謫起補兩淮鹽運判
累轉南京戶部主事陋規釐革陞南京兵部郎
中告病歸卒天錦爲人慷慨豪邁奇節稜稜爲
文崖異陸離欲不經人道著撰每不存稿他家
且有藏之者弟天銘太學生子福昌燕昌俱庠
生崇禎癸未獻賊屠城福昌被執罵賊而死姪
淑昌中順治壬辰進士

魏說字肖生其大父裳嘉靖庚戌進士官至山

西樞察司副使父彬如爲衡州府永陽縣訓導
肖生家學淵源腹笥經史中萬曆甲午鄉試第
四名戊戌成進士初任南直都水司主事時封
君太母並卒于耒陽學署訃聞南中歸來號慟
以不得與于哭泣之位爲憾三年寢處未釋苦
塊刻志勵行以承世德服闋授北京工部主事
神廟內宮每日取梨木條方百餘斲不用命者
公以杉木易之減其數以進上亦霽威其黜主
之不殺如此已遷本部郎中典試東粵時朱公

燮元爲粵督學亦頗冰鑑自負其所首錄者悉
入彀中以是深服公之暗中識劉衆裏得嘉也
所貢士大半聯捷旋陞四川督學使肖生一手
一眼且作且閱諸生一義成督學亦一義成鑄
試士漫草行世其掄諸生文取其直寫性情根
極理要有蹈襲陳言競趨時艷者抑置之刻評
唐宋八大家文以教諸生試牘敘云刻山之鶴
非不落羽摧殘終自有雲霄之意雉飛五采掩
映而豐肌血肉則固有難使者以此評文百不

失一兩司文衡校內閣者什二三第南宮者什
有九豈非以慧業文心程量不爽有如是哉嗣
授山西按察司副使隨轉叅政復除山東按察
司廉使膺錢穀刑名之任轉輸者無斃容卒反
者有生氣時值山東妖賊竊發圍邑攻郡所在
告急勢逼省會羣策俱窮公嘆曰我先祖曾破
賊于此召公是似非今日乎乃點煙丁給餉守
城騰檄招撫賊乃靖上聞之喜陞授太僕寺少
卿道經賊所從者戒嚴不意諸賊徒業感公招

撫載道懽呼及至京不輕取予命僮歸作青山
閣遂有青山之意尋除應天府府尹身處脂膏
不欲自潤主藏者以羨金進公怒悉發克餉爲
減徵額暇日與諸生進退講業論文甲子南闈
鄉試唱號至半未見應天諸生名白主司卽舉
所知七士聯註賢書出其門下者榮于御李隨
陞戶部右侍郎兼都察院右僉都御史大官有
甲乙之籍壯士無庚癸之呼帑發而玉粒豐年
漕運則風恬淮海于斯時也曳尚書履登政事

堂豈有難哉而無如權璫魏忠賢奔走長安示
意宗盟欲邀投刺肖生峻拒之片刺不通以觸
梓裏人遂掛冠歸二疏之智復見于此至後逆
素三百餘人得超然免于評論林居數年相國
門生引領安石之出而肖生鷗夢不驚青山可
對而巳惟日與老僧說法清客談詩至丙亥無
倦意山水松梅一經粧點都成靈韻家聯云庚
虞三代人物先秦兩漢文章蓋自寓亦自勗也
著有青山閣集八卷其正氣淡情風騷遠致在

古大臣未數數見者癸未二月獻賊未入境時
端坐卒于正寢壽八十一子二人長方授庠生
次方復庠廩生有文名

祀鄉賢

本傳劉來遠撰

魏珩如字白叔樂安令法之曾孫也祖正泰隆
慶元年歲薦爲蘇州吳縣丞父科字冲垣襟度
蕭洒人咸稱之珩如生而靈穎詞壇推重萬曆
丁酉中鄉試第八人房考在途有詩云願得白
珩獻當宁不妨人比國工推及拆卷惟詩是符
快以爲得人之讖辛丑登張以誠榜進士筮仕

嘗領望邑改湖州教授尋陞國子博士擢翰林院簡討爲福藩講官啟沃勞動賜賚倍至旋叅兩浙屯鹽有條行六款鑿鑿可行建塔以標文峯又開湧金門通百物全浙永賴撫按告其成神宗賜金嘉勞焉後以養病請假歸里買山龍翔飛觴嘯咏于其上每有一斗百篇之致與侄詔倡和自適竟蚤折卒之日聞四川副使之命士論惜之著有六友山房集 祀鄉賢

鄧士亮字寅侯中萬曆辛卯鄉試以甲辰副榜

初任彝陵州學正獎拔名士如文安之王維章受其藻鑑皆至顯仕再任四川綿州學正尋陞廣東肇慶府推官時有紅彝船澳彝船肆掠海防公多方守禦適賊船遭颶風沉沒陽江海口公尋覓善水者撈探方知船沉深水架有大鏡隨浸沙泥捐俸僱募夫匠設計車絞獲取大鏡三十六門總督胡公運解至京又絞獲大紅銅鏡兩門貯肇慶府軍器局中隨行差取二鏡至京永鎮邊封考最入爲宗人府經歷陞南京戶

部廣東司員外奉旨提督揚州鈔關關有贏金
萬餘兩悉輸入內帑遂陞本部浙江司郎中轉
四川馬湖府知府適苗彝犯順公會同守備王
崇周等開城迎戰斬獲苗首威夜月池等衆四
十餘寨悉皆効順會上臺取銅萬觔旋檄下不
用仍追補銅價公曰昔以價易銅民爲銅苦今
以銅徵價民爲價苦是重厲吾民也乃捐俸解
補卽命匠金可德以其銅鑄大士像買舟而下
載至蒲卜地于河渚大沙洲建閣奉之旋雷四

川分巡上川南道駐劄嘉定州蒞任一載銳意
圖治無何卒于官督撫王公維章爲昔所獎拔
士援引大臣任故事理疏請扶觀銀乃得歸葬
所著有屏史二十卷心月軒十六卷行于世
王台彥字明珍父學孔爲太學生大父良謨以
鄉貢爲蜀蓬溪令明珍性凝重寡言笑好施予
飲酒雖至數斗愈益莊萬曆癸卯舉鄉試爲學
益篤三赴春闈未遂謁授四川達州刺史州有
白蓮妖賊聚黨萬衆刻日破州城里人來告公

不問再至復不問三至公答告者曰彼以焚香
號佛爲業甚善吾方獎之若敢以大辟誣醇民
耶賊魁聞之明日率數十人入州告公伏甲盡
擒之立斃杖下旋檄諭其黨竟解散州以全時
上官方議擢以父喪歸服闋復授河南信陽州
治聲甚著時楊漣以抗疏論權璫斃獄中昇骸
歸道經信陽與漣友者畏璫耳目匿弗敢視公
獨慨然曰楊公直臣矧同年友也若俱避禍楊
公骨尚能返里耶倘吾以楊公故獲戾猶榮甚

卒撫棺哭盡哀且厚恤之楊公骨得歸里公之
力也久之遷貴州思南府同知分試得張大經
周祥新敖世杰陳佳士王家鼎陶明壘等六人
皆黔名士未幾遷銅仁太守銅仁地多苗叛服
靡常前此官家得叛者不問老稚婦女盡殲之
公得叛苗誅壯者餘盡釋全活若干人苗亦以
靖旋擢畢節道副使公曰是更難于苗矣先時
安奢二酋點兵入黔中一日圍七城惟貴陽安
莊未下相持一歲城中人相啖且盡以王三善

援兵至圍乃解城中殘民皆匍匐爭就野伏地
啖艸如牛羊今安位復以爭界內亂朝廷遣使
往勘者二三輩輒不返今乃俾我耶及就官黔
督朱公燮元素知公果謂曰何情雖已測然非
公不足往論誠無悍行勝十萬師遠矣公于是
攜二僕從十餘騎即日就道過渡大廣河崇山
深窅無一鳥聲直搗水西大方檄召安位位匿
弗見復遣其酋陳國基召之位使其驍帥阿烏
味者率數千家來迎公斥之其黨雖跪而聽然

時時摩曼刀環築架挽弩以示不下者夜宿會
黨中四顧莫辨語者甫就寢有酋秘載金珠種
種以獻公笑曰使吾可成場寧肯入爾界使吾
可貨誘豈能平爾界界不平爭且不息汝曹萬
首領其保矣吾豈以金珠數囊易而萬首領耶
酋是私相語曰是公廉非前此數輩比也且其
言誠未可負遂獻印歸命公于是案圖立表定
界而還置連珠七城合爲驛路糧稅都入黔中
守軍節所屬也噤治公廩得骨數具視之人類

也遍掘之骨且盈數十石因命僧盡覓城中枯骸近萬具塋之曰是皆義魄也設祭而公功成復命天子賜白金寶鈔授廣西蒼梧叅政蒞事一載乞休章三上乃可方公之終親喪而之官也取木主佩之身至驛邸必先設位公服趨拜上食畢然後就室每視獄必于署中焚香仰空祝天誓無冤民也弟鼎彥爲榆林叅議客金陵久不歸公每得弟書涕輒數行下其居鄉好與方外士遊賓之至者雖野老牧豎相對怡怡如蒲圻縣志

卷之十一

經濟

二十

也有與爭者卽斂手退然或干以非義必正襟謝之亦無敢犯崇禎癸未張賊至恣焚毀公避亂入暮山山中茹蔬食糲怡然自得歲丁亥二月顧次子九真曰今日某聖誕焚香祝之遂端坐而逝

祀鄉賢

忠烈列傳

宋

陳求道字得之陳康民子其先自咸寧徙居蒲圻靖康間舉進士授都水監使北朝圍汴京求道請以蠟書立康王爲元帥起兵勤王朝議二帝出郊請和求道力爭不聽及二帝北去北朝立張邦昌爲帝求道義不屈吐血長號欲自殺救免後治河有功宗澤表爲襄鄧隨郢鎮撫使以請兵食不繼緣有疾之者遂歸求道去而四

蒲圻縣志

卷之十一

忠烈

一

州陷矣旣居蒲建炎四年京東西荆南北盜起率鄉民保障有功會招討劉忠反劫求道爲主擁至茗山求道怒罵不從先殺其妻子遂殺求道拔其舌而死瘞于龍堂寺側事聞改葬興陂墓上石封鐵頂今存徐氏墻內神道碑在咸寧西河元翰林簡討危素有傳何槐孫有外傳一統志楚紀咸寧志俱載其事

龍堂寺在縣北門外

廖道南曰予讀蒲舊志以求道爲他途人也及考宋史具得其實且興陂在今雪峰之東石潭

明

之上而茗山蜿蜒遙相望焉求道其不死已乎
汪洪字克容厥考勝爲營繕所丞英宗試其能
特授順天府經歷錫之救命成化元年洪舉京
闈第一人明年登羅倫榜進士授戶部主事歷
員外郎郎中值北朝兵至羽檄旁午遣中官汪
直威寧伯王鉞統師出征動調主客軍馬不下
數十萬時邊鄙歲飢糧餉數匱乃敕洪往同都
御史何喬新督理轉輸直倚勢開釁而鉞亦喜

蒲圻縣志

卷之十一

忠烈

二

功洪處之裕如斟酌損益區畫攸當本兵上其
績憲宗嘉之曰爾洪持廉秉公夙夜匪懈勞勩
迭著朕用爾褒錫賚有差乃陟爲山東叅議時
冢宰尹旻縱子貪賄洪力拒之旻乃譖之汪直
遂左遷知蜀綿州州歲大旱暴骸遍野洪捐已
俸設爲湯粥陳之四門又多方勸賑賴以全活
者甚衆旻乃躬視土宜疏濬水源創修石磬七
堰溉田數千頃自是旱潦攸濟民庶其利爲立
生祠先都御史張瓚開置壩底諸堡以通茂州

洪至往理戎務歸至石泉土官突出洪倚塹控
弦與之交射爲流矢所中墜偏橋之懸巖而死
是日閻王陂居人每于陰雨月夕見其乘馬如
生立祠祀之四川志及綿州志列洪名宦洪無
嗣女二長適樂安知縣魏法墓在望夫山

本傳
廖道

南
撰

胡堯元字廷獻兒時遊白石山謁顏真卿祠嘆
曰大丈夫死國而食茲土榮名豈有旣乎慨然
自許登正德辛未進士授戶部山西司主事督

蒲圻縣志

卷之十一

忠烈

三

金盞馬房諸倉闡人谷大用者瑾黨也嘗以門
客屬公公沮辱之司徒王瓊以谷言責公公曰
官至尚書倚若爲冰山耶瓊大恚啣謀去之冢
宰楊一清雅知公以司徒言薄譴高郵州同知
州運河故邗溝也水自諸湖入河承下流兼三
寸六湖之委歲春秋湖水溢害諸田夏冬水涸
不可田民苦之乃請倣古人溝洫之法方一里
爲溝深一丈六尺廣二丈至輿化而止河東故
有涵洞石閘如法修之以時啟閉旱澇不能災

民甚賴焉州民好淫祀士女祀及東嶽無忌公
毀之更爲文游臺祀蘇東坡黃山谷孫莘老秦
淮海四賢羣諸生其中攝江都邑事丁丑上詔
侯指揮妻馬氏入宮言官諫不聽乃上疏略曰
漢選後宮家人子入侍唐納壽王妃職爲亂階
上不納闈人史奉督製御服還京所過郡邑賊
殺無辜甚衆公抗疏條其姦乞詔法司訊鞫梟
史泰首都門謝百姓復斬臣首以謝史泰時人
人爲公危上寬仁無譴人莫不賢之戊寅冬選

江西瑞州府通判明年六月宸濠反中丞孫燧
副使許達死之公自吳城聞變微服徒步夜行
晝伏間道五百里還郡知府宋以方被執寮屬
亡太公攝郡事召士民泣諭之死守無貳遂請
兵中丞王守仁卽日具疏上召使入榻前勞問
賜食詔擢公爲守僞駙馬李蕃掠城公乃集兵
謂妻黃氏曰吾脫與城俱亡汝善爲計黃氏泣
曰君其盡忠毋以妾爲念公出黃氏懷印抱女
顧季子宣及家人胡永曰事若不測吾當投井

以死公乃簡壯士盛官儀詐稱迎番伏兵石鼓潭擒之斬首九十四級報至王守仁曰微胡通判瑞其不免乎守仁遂屬以兵使備賊無西公曰濠無西意第恐東下爲憂耳乃使人聲言瑞兵十萬且至夜城西隅忽墜城中鼓噪謂瑞兵至矣濠懼修戰守之備甚具七月朔帥兵趨南京守仁屬公勵壯士前戰于黃家渡僞都督凌十一馳馬向公公佯却竟發一矢射死之擒賊將周瑞追戰于八字腦擒殺二百七人師次鄱

陽湖南風急公曰賊衆難卒平乘風縱火可得志也或謂風無常難恃公曰討逆自天何疑哉乃與吉安守伍文定部分將士縱火焚賊舟遂俘濠賊平始還郡黃氏曰吾與君得生蓋天佑社稷耳公以郡承師旅之後務在拊循爲條教下諸州邑訪故老咨民利病清獄市輕徭薄賦郊行勸課農桑賑貧恤死施藥療疾節郡中徭費三萬餘金嘉靖壬午詔以江西功授廣西左叅政總督糧儲巡察邊務洛容邑爲賊陷幾成

公復之建桂林書院買田百畝給筆札膏燭選
學宮明經者爲師諸生各以其經受業焉土酋
岑猛守田州以兵力自雄凌轢他郡劉召者猛
逆黨也誘韃都指揮孫震曰必復土日退官兵
乃還震耳或謂震輕嘗賊請釋召公曰震固易
敵田州土酋得無陰使召耶土日復官兵退召
必擁震而入思思計之晚矣乃條會罪狀白當
道督責諸帥難之不從以和召果以震去如其
言中丞盛應期屬公曰諸帥遠若言敗若深知

兵其盡力公辭不獲乙酉三月進兵擒賊將李
隆禮陸利廣脫其縛結以恩信使執召轅門贖
罪當道欲置二人于法公曰業已許之其可背
乎自是餘賊多附蓋自召叛至今十有九年矣
公乃深入東蘭邠地金城諸絕域經畫疆理宜
布朝廷威德奏凱還是年冬中丞姚鏌疏請征
猛天子可之鏌問計將安出公曰岑施玉達爲
猛敗失其職守怨猛深今若許其立功還故職
則二人樂爲用又使人聲言兵十萬取田州猛

必專意泗城乃使思恩堅壁捷良三心以精兵
劫其村落令猛左顧以禦思恩南寧武緣各整
兵旅待湖兵至夾攻之三百受敵猛無能爲也
若餘兵四掠以右江兵出賓州左江兵與南寧
武緣合思恩兵從後擊之賊將奔突無地歸順
者猛之南屏也猛親在焉猛急必遁歸順趨交
趾若陰使人結其所親以啗之乃萬全策矣
奇之遂屬公鎮南京湖兵至檄公監軍都督指
揮沈希儀等五將軍帥入萬人分道進令日擒

猛者聽轅門計功行賞賜千金爵一級界其地
黨惡者移兵誅之猛懼謀不知所出裂帛書冤
狀抵鎮鎮不聽六月一日公帥兵進攻賊將陸
綬號萬人敵猛男邦彥素驍勇公曰此難短兵
接也選精騎馳射之綬五易其馬公追之殺七
十四騎而後授首邦彥逃猛果謀出奔猛婦翁
歸順知州岑璋以其女失愛于猛憾之欲得猛
以爲功先是公令沈希儀等察千戶趙臣雅善
璋遣臣抵璋所得與猛相讐狀說璋擒猛自効

邦彥守要害璋佯以姻故遣千人助之實爲間
邦彥納之及兵擊邦彥璋千人爲內應竟斬邦
彥猛奔璋招之曰事急矣願主君走歸順三四
夕可至交趾猛從之公策猛已至璋所遂以兵
萬人擣歸順璋遣人持羊酒犒師見公謝曰猛
欲走安南璋繫之亡去幸緩五日當縛至轅門
乃許之璋乃給猛曰天兵已退當爲君奏白冤
狀遂爲疏令猛出印印之璋知猛印所在置酒
賀猛持醜酒一杯進曰天兵索君急不能庇請

自爲計猛遂飲酒以死璋斬其首并佩印遣使
至軍門上之所分兵復斬賊將王林等初公聞
邦彥授首恐非真進隴谷巢窟驗之冒瘴死復
蘇猶口授諸將兵事一十三條疾遂篤真至橫
州卒時嘉靖五年九月二十九日知州陳堯恩
視其行李唯夏衣數襲圖書盈篋發公內帑殮
焉士民哀之如喪考妣請立祠大中丞石金疏
其死國事乞贈官立祠以祭詔曰胡堯元實死
國事贈中奉大夫右布政使祠桂林諭葬江夏

金口鎮

祀鄉賢

本傳胡直撰

件瑜字忠甫紳之子正德庚午以禮經中湖廣第一名業于南雍丁丑登進士第試政御史臺御史中丞彭濟物甚雅重焉未幾上疏病歸己卯如京師授禮部主客司主事大宗伯毛憲清稱賞獨至未幾又上疏病歸正德十六年辛巳武宗入繼大統瑜復如京師上疏論天下事一曰勤聖學二曰篤親親三曰開言路四曰敬大臣五日選諍臣六曰去浮屠七日拯困窮八曰

蒲圻縣志

卷之十一

忠烈

九

重守令九曰修武備十曰儲人才疏奏上嘉納之下諸司條行大冢宰石邦彥褒其敢言仍厥官提督四譯館時四譯朝貢如哈密佛朗機者徂于闐宦所黷賄權要所市寵瑜以訟決之異于族類超于風氣如朝鮮者瑜則以禮遇之故後四譯聞瑜之卒咸膜拜流涕云甲申春上召輔臣于平臺于暖閣諭以尊稱之典大學士楊廷和蔣冕毛紀力諫以爲于正統違大議上瀆

凡衛內間兩宮未敢輕議上不豫者久之主事

桂萼窺伺風旨竊取席書張璫霍韜方獻夫諸
議奏之上下其議在廷諸臣堅執以爲不可時
廷和已忝冕繼忝禮部尚書汪俊又去乃以書
爲禮部尚書萼璫獻夫爲學士諸臣羞與爲伍
遂不謀而同抗言極辨或謫或罷或獄無虛日
時廖道南方官中允璫時私語道南竊嘆以世
道升降係茲舉也秋七月乙亥上降手敕改稱
孝宗敬皇帝爲皇伯考恭穆獻皇帝爲皇考昭
聖皇太后爲皇伯母章聖皇太后爲聖母諸司

俱奏以爲不可十月五日戊寅少宰何孟春率
百官伏闕死爭大學士毛紀石琚取帖伏于前
時已近午上命司禮監宣諭下學士豐熙給事
中翀御史俞翹郎中余寬黃待顯陶滋相世芳
寺正母德純于獄百官號泣聲震闕庭璫伏地
執廖道南手曰吾禮官也有死而已已而未末
申初有危言以嫁禍中傷者上復命內使宣諭
時大臣已退惟諸司在上大震怒悉下百官于
錦衣衛獄庚辰械至午門前杖三十死者十有

六人編修王恩正相給事中張原毛玉裴紹宗
御史胡瓊員外郎張燦主事臧應奎安璽楊淮
余禎胡璉殷承敘司務李可登而瑜亦竟不起
矣屬纊時時目謂廖道南曰吾志已畢吾子勉
之瑜生于丁酉卒之辰則伏闕後十日也享年
四十有八隆慶初贈少卿蔭子密入監

祀鄉賢
本傳廖

道南
撰

李贄曰當瑾初用事時科道有言俱被慘禍其
後勢成銓柄在已非其私人不置言路是以一

蕭圻縣志

卷之十一

忠烈

十一

時省臺皆爲不鳴之仗馬而捐軀死諫之士反
在于翰林部寺諸臣也世宗新政若輩盡宜汰
去而件瑜之疏既下復寢豈嘗事者懼傷國體
而不欲空署逐之耶抑猶有所避忌耶然讀瑜
一疏若輩已當愧死矣

李甲字孚先修偉美鬚髯讀書該博善感憤知
義所在挺鷲不可遷蓋其天性爲文慘澹嘔心
不畏按劍天啟甲子入太學大司成朱滄起奇
其文拔監元丁卯下第崇禎庚午反楚闢遂領

鄉薦丁丑謁除得署零陵縣教諭聘試雲南所得悉知名士庚辰擢蜀雙流令邑舊無城南下車鑿濠編柳以備不虞作柳城賦雙流素苦蜀府釐稅甲禁校胥無苛歛民復權土司有金帛見遺者曰我爲民來不爲金帛來自是上下知爲清白吏矣借署新都政聲藉甚甲申七月流寇屠成都時已擢建昌衛同知聞變駐黎州與兵備胡恒內江戶部范文光白水叅軍曹勛戶部鄒廷爵榮經縣令黃儒邛州孝廉劉道真同

時起義乙酉春進師榮經冒矢石率戰馬逸而北曹叅軍掖之遁甲曰徒生何爲吾獲死所矣遂被執罵賊死時蒼頭李事從李視篆隨事從冒刃負甲出積尸中以死殉視篆負骸久之莫能歸遂薙髮爲僧寓名山縣翠峯菴厝尸菴後塔中視篆居倚塔前有聞必告飲食必請枕席之間痛哭如相問答如是者八年篆亦隨沒託藏尸于其弟子粲寰又十五年仲子藻珠隻僕重趼由汴秦達益州迎父新都遺民莫有識者

倉皇走名山而西忽遇衆豪道次詢之得遺骸
菴塔中昇以歸行且痛哭不勝遂仰天呼曰吾
父萬里孤忠今相見于枯崖斷壑間誰表章者
遂謁監軍道程諱鳳翔請卹程署其詞云雙流
李令興師討逆殉難榮經巡遠一流也今箕裘
有人歸厝故里雖死猶生矣嗚呼獻鬪交証之
年仕宦多謀遷調爲自全計事急棄城走者比
比也甲巳遷同知矣卽不死亦不失爲賢令而
且死死十餘年東南兵火人鬼兩地又蜀道斗

絕天表空懸且得以骸骨歸故壠固其至性不
泯亦由忠貫日月神明扶持者哉名山隸雅州
蜀人爲崇祀雅州名宦而子若僕因之以傳宜
矣

駱文節字愛梧魁梧竒偉有大志初授浙江長
興主簿陞河南彰德府經歷失上官意左遷北
直廣平典史先是景州妖賊于洪志與山東妖
首王好賢徐鴻儒謀逆鴻儒好賢俱敗惟洪志
黨散在京畿河南地方百姓以旱蝗不自聊又

爲妖術所煽故白蓮教盛行上檄地方官捕之
節因言於令訪妖首數名餌以作書招其黨至
則盡械之衆乃糾黨大謀令懼節曰首既得衆
已失恃往諭之自定矣乃單騎直往詰之曰汝
輩欲反朝廷殺命吏耶吾戴吾頭來也衆愕然
隨投戈羅拜俄盡散去及旋署見有布裹銀者
下皆載姓名乃餘黨懼株連求賄脫者節以白
令悉給民爲牛種之資令轉達府府大奇之擢
州判旋以內艱歸里服闋入京補磁州州判其
婿李甲任四川雙流令因獻賊死難聞信哭之
哀曰吾婿死得所矣乙酉賊李自成兵入蒲或
強之避叱曰昔在廣平單騎入賊營數萬之衆
談笑而解今老矣豈爲鼠輩喪氣哉少頃賊至
輒大罵賊怒縛之因索金節乃給賊曰我金藏
土中必具衣冠掘之賊釋其縛乃衣冠拜哭於
地下尋入室內投繯而死時年七十有五醜蘓
孺人在雷家橋聞信亦不食卒

補遺

李道爲宋慶遠節度使屢建奇功封雍王謚忠
毅諭葬漢陽之蒲潭陰毋山立廟世祝勅曰褒
忠妣張氏封秦國夫人諭葬蒲圻之馬蹄湖瑞
雲山立廟世祝勅曰大祭孫庭芝爲宋右丞相
知揚州後靖節于楊之蓮池其地有忠節祠曾
孫鳳山爲五軍都督勲名爛然乃棄官來蒲以
守夫人墓嗣是七世同居奉 青旌其門曰義
門



才猷列傳

宋

廖視字德遠端明殿學士明略之孫也寧宗時
初任司理叅軍歷秩房陵縣令轉朝奉郎通判
衡州事狀元許徑經略湖南舉視于朝薦剡有
日視器質端方克守家法嘗任理掾以直忝官
兩爲劇縣治狀稱最衡陽三郡備著賢勞承攝
道永二州首尾年餘剔除奸弊愛惜財賦一毫
不以妄用代者賴之

蒲圻縣志

卷之十一

才猷

費師古縣南州人年甫十九登天聖二年宋
郊榜進士天資英敏才氣浩發尤長于賦咏所
著有壘秀亭詩累官至諫議大夫時范蜀公鎮
知諫院務存大體不事矯訐至請見皇儲則奮
然爭論章十九上仁宗罷之而師古同侍御史
呂景初等抗疏畱之不報暨歸于蒲創地于大
田之黃沙鑿池引泉溉田甚廣厥後子姓有曰
畧者富于古學南嘉李氏開積慶堂延爲經師
元至正間有田原傑者以書經中鄉試裔孫有



元

曰洪者在明為錦衣百戶

祀鄉賢 師古墓在黃荆塘之山

何槐孫字德孚號龍岡湘鄉學正天駿之子也
幼穎慧駿發日記數千言泰定三年舉鄉貢明
年中書堂會試列高第梓行書經義一篇太常
賦一道天曆二年授江西宜黃縣尹吏事精敏
剖斷如流洞燭民隱人不敢欺值歲飢勸賑有
方貧者無餒是歲同縣尹甘楚林與文衡得士
解蒙曾貫眾以為知人再推德安雲夢政聲益

蒲圻縣志

卷之十一

才德

二

茂至正二年遷慶元路總管府推官申明條約
辨決疑獄未嘗以聲色厲人而委曲周旋務得
其情故能除姦禁魘雪冤理滯闔郡畏服陳廷
訓為撰政績碑所著有善政指南書及碑碣諸
文行于世一統志及江西志寧波志俱載名宦

祀鄉賢

明

何煥字仲明元慶元路總管府推官槐孫之子
也學有源委慎默簡易洪武甲辰授休寧縣簿

于時戎務倥偬徵賦督迫爚區畫有方民賴休
養暨董辦木植監築城垣雖祁寒暑雨不憚勤
苦三載考績復職後坐公事註誤民思慕號泣
洪武十七年復以明經薦知雲南之鎮南州卒
于官按徽州志煇以甲辰任休寧邑舊志
以洪武六年舉秀才未知孰是
李懋洪武初任新昌知州時兵燹之餘百務廢
弛懋創建州治總署譙樓規制宏偉學校橋梁
悉加修葺調度有方不病于民又爲諭俗八條
布之輟惻真摯民咸感誦

鄧槐字大林洪武三十二年中鄉試明年登胡
廣榜進士性資端慎循循守禮與人交未嘗有
倦色初授成都新繁知縣時蜀土自明玉珍竊
據後百務廢弛民鮮聊生槐蒞政慨然思紹衛
常王益之績創規制設條教修水利墾荒田民
多賴之再任新津政聲益著按四川志新繁有
清白江槐以此自勵故終身清白以琴鶴爲伴
云

趙德貴按舊志德貴上三都上里人爲人剛毅

慎許可寡與人交洪武十九年起貢授兵科給事中獨立敢言諫垣凜凜有臺閣風生之氣尋被罪誅公論惜之

陳文禮字績卿嚴格有威質直自任洪武三十

三年起貢授監察御史值有冤獄弗決文禮立

辨其奸人服其神智

童謠云斗穀三升米說真陳文禮聞而悟曰此

奸必康七也

果如其言也喬孫緯字載宿以嘉靖庚申貢訓

江西德化轉青州授作人有方捐俸置學田以贍寒士壯年掛冠食貧課子鄉評推重之

馬駿字冀良永樂六年中鄉試銓授崖州同知值颶風大作海寇蜂起駿保全城池與有力焉孫文明成化丙午貢授蒼溪連筠教諭孫文獻弘治甲寅貢官瑞州府學訓導曾孫練中嘉靖己丑進士官至河南太守

龍景亨字伯通永樂三年中鄉試明年登林環榜進士性資英毅遇事輒議論數言孤抗不能容物初授監察御史監稅龍江關立法至嚴人不能犯以壽終子霖中正統甲子鄉試先是

羅弘爲御史稱廉焉陳文禮爲御史稱明焉暨景亨爲御史稱嚴焉臺中號爲三直

盧中字守正厥考貴賢訓子義方中奉訓惟謹習禮經正統九年鄉試魁選明年登商輅榜進士授刑部主事歷員外郎郎中居常布衣蔬食無重帛兼味遇權璫貴戚屹然峻絕弗少遜避以故門無私謁而用法罔撓奏績推恩及親錫以誥命蒲令令里人捧冠服謁其第厥考設具候令執禮甚恭令去召中于庭責之曰爾胡

以名器桎梏乃翁哉仍鞭之乃已及中陟浙江叅議守父訓如初逮歸行李蕭然無長物里中

人稱其廉樸而貴賢之賢聲益張

祀鄉賢 本傳廖道南撰

魏銘字日新祭酒觀之曾孫也少勵志蒲首山

中瞻懷祖德讀書不倦登景泰五年孫賢榜進士任地官主事監通州倉稅以抗禮直指使某被劾天順紀元之歲調判雲南景東府至滇道經昆明晉謁總戎沐公沐公諱璘西平侯英之孫定邊伯昂之子也襲父爵都督雲南好讀書

工詩文其祖英與銘祖觀同事 高皇帝相善也銘一見卽以先祖祭酒公小像示之請爲贊沐公曰予自髫鬣時卽從先大夫知祀山魏先生之名每誦其詩文未嘗不景慕而嘆羨之今君又能擢巍科登顯仕雍容淳雅異于流輩可謂故家文獻久而不艾遂欣然爲之贊以志景慕之私焉無何改判揚州時揚郡旱甚太守公以下禱雨不應銘進之以誠更率父老子弟徒步露禱三日見黑虎廟上風起雲飛大雨若注

有黃龍天矯空中迅雷驚電繞其前銘不爲動是歲郡大熟士民歡呼有碑紀其事所屬興化縣學宮久圯捐俸修葺薦紳先生勒碑記之尋以最擢守溫州神情恒在山水間每遇勝地輒解帶畱連無何投劾歸歸而結茆課子輯其先祖詩文貽書問序于安成內閣彭公時泰和尚寶卿楊公導爲表章之因壽之梓顏曰蒲山牧唱仍其初藁之名也銘性溫文儉素雖兩佐名府一守東甌所至以廉謹稱林居不聞家人生

弘治壬子鄉試次日頌中乙卯鄉試官永寧知縣三日頌中丁卯鄉試官福州通判孫似有考行督學金公學曾舉德行第一及貢不仕而卒

按原傳以沐公璘爲祭酒公故人同事高皇帝不知已差三世失不詳核故考正之夏查闕編

附孫似于後

黃頤字敬德爲人淳謹質任自然無疾言遽色然博學強記不苟許可成化七年中鄉試十三年登曾彥榜進士授知溫縣再調陳雷爲政豈

蒲圻縣志

卷之十一

才猷

七

弟平易近民凡頑民梗化多爲條約諭之不妄施刑罰而民懷其惠及致仕歸居鄉黨尚如諸生時人多稱爲長者子崙以嘉靖三年貢爲永昌司理孫鶴翀嘉靖丙辰貢克紹其家學焉

江師古字克永元鄉貢存禮之裔也叔父晟司訓吳江志識淵邁師古從之遊恒受筆楚至于折臂勵志苦學略無倦態成化十九年中鄉試弘治六年登毛澄榜進士授工部主事清江浦管關時中貴往來無虛日舟經沽頭作咸凌礮

古不爲屈正德初逆瑾柄國卽投疏歸師古
性儉朴敝衣垢襪陋室匡牀獨脩然肆意尤善
風鑑豫測人禍福又精岐黃續骨術先是西涯
李文正公有子兆先少負才名一日延師古往
視麻太夫人病卽愕然曰太夫人無恙相國位
極人臣恐終乏嗣宜亟圖之後果如其言

件紳字佩之洛容訓導祐之子也性警慧早游
邑庠與江工部師古廖戶部漢爲莫逆交督學
副使薛綱稱爲三傑成化十九年中鄉試魁選

二十三年登費宏榜進士授戶部主事監稅九
江紳精于心計明習吏事參伍考驗悉中機宜
創置公署代者便之子瑜中正德庚午鄉試第
一登進士授禮部主事嘉靖初以諫大禮斃杜
下

魏澐字文淵性孝友嚴毅母疾禱于睢陽神祠
朝夕裸膝百拜凡三月母疾弗愈哀毀踰禮成
化丙午舉于鄉不與鹿鳴人問之曰方憶吾母
不忍耳再事繼母倍加敬值大疫家人徙居

年七十獨以母病不去八上春官不第選樂安
令有禦寇安民之功正德中會逆璫劉瑾以傳
奉索錢法抗不理卽日以思親告養棄官歸在
事甫八月焉去之日行李蕭然嘗題其庭柱云
願留膏血還黎庶祗有心田付子孫士大夫至
今誦之里居三十餘年杜迹公門表正鄉里有
鄉人李致良被冤逮獄法力爲白之有司全活
七命又有故人子犯罪乞解則捐金以贖年七
十有六卒子八人長正中生子表中嘉靖甲午

鄉試表子翼如爲太學生翼如子詔萬曆丁未
進士曰正恭嘉靖四十三年貢生子往中萬曆
丙子鄉試曰正叅隆慶元年貢生子科科子珩
如萬曆辛丑進士法弟落正德鄉貢其子
孫貴顯里稱並盛焉

魏頌字美之溫州太守銘之季子也銘妻黃氏
無子銘之京娶丁指揮女諱爲繼室丁至蒲聞
其有妻遂大怒攜女還黃亟追懇請願讓正室
而已下之丁乃止生子三人長曰額中弘治壬

子鄉試次日頴中乙卯鄉試官永寧知縣三日
頴中正德丁卯鄉試頴少卽以經濟自期嘗讀
書壘秀山中學者稱之曰秀山先生後肄業南
都與貴溪舒芬永嘉張聰騰觚揮麈齊名一時
邑廖太史道南心折之旣登賢書凡四上春官
不第以母老勉就頴上令居官威惠敷罔勤勵
學宮循聲藉甚無何丁母艱服闋起補祥符令
祥符中州都會治之恒難其人頴下車申功令
起凋瘵造士蓄衆政聲訶如頴上兩臺交薦擢
自放以壽終

蒲圻縣志

卷之十一

才猷

十

最有日矣旋爲權右所嗾量移判福州尋又移
知北徐州竟以不能類仰上官拂衣而歸頴然
見舊令所遺什物曰官有常祿乃復朘民自奉
哉悉罷去隣俗喜訟有兄弟爭田乃引蘇瓊事
泣諭之民亦感泣卒相讓聞風化著甚衆居官
清約囊無贏錢嘗遺書示諸子曰若父惟飲隣

水耳汝曹有先人敬廬薄田可自贍毋侈望不見清白吏子孫引其澤貪穢者一焰卽燼哉卒于官百姓哭聲動地祀名宦子正時有至行別有傳正初中嘉靖戊子鄉試正蒙性至孝居喪廬墓課子裳成嘉靖庚戌進士裳守濟南迎就養無何歸所屬令長遣人餽金道中毅然引四知絕之徐中行有傳贈如子官自是以後科第蟬聯文盛公之清德遠矣哉

龔良傳字起巖御史晟之孫父鍊御史長子

治十三年貢贈浙江僉事良傳中正德庚午鄉試登嘉靖丙戌進士授工部都水司主事治漕有功陞兵部武選司簡良將汰冗卒戎政克詰奉詔往封懷藩一介不受王爲立却金亭以志之陞浙江按察司僉事飲冰自矢斷獄多所貰貸盜除吏肅浙有青天之謠時溺女成風公嚴其禁民誦賈父再生陟河南叅議歲大祲捐俸設粥所全活者甚衆陞山東副使督兵海上威行振肅海波不揚將大擢用竟卒于官長子乾

中嘉靖十七年貢次子乾瑞二十三年貢官霸
州同知三子乾曜隆慶六年貢孫茶棹本曾孫
逢祥皆中鄉試

謝存儒字懋珍幼通經術嘉靖丙戌進士爲行
人遷給事中條陳急務上褒之會論許祭酒失
職狀謫判邛州舉學勸農他郡獄多屬鞫焉歷
禮部郎中調其獻后梓宮如禮擢南昌府後參
政陝西檄諸郡墾田積貯邊餉不匱繕甲兵具
卒乘修城堡邊聲大振民不告擾尋陟山東布

政使以年饑穀貴令民兼錢輸漕穀省漕費過
半東土以安擢副都御史巡撫河南疏請折鈞
州陶器價鈞人便之立石頌焉擢兵部侍郎會
劇賊司尚詔爲亂坐不卽討還杖下獄尋放爲
編氓性慇直不能容人人多憚之閨門重穆家
法凜然

馬練字元素父文獻以貢爲彭山訓練中嘉靖
己丑進士任嘉定知縣除豪奸濬渠塞厥有聲
稱陞南京戶部主事員外郎中遷河南知府歷

官端慎遇事有識接人和易居鄉好施歲飢盡
散廩粟給貧民賴以舉火者千人貸不取償邑
人士高其誼子之猷舉嘉靖甲子鄉試孫介以
貢爲武寧令曾孫天錦中萬曆乙未進士介孫
淑昌中順治壬辰進士

魏正初字汝復隣水令溶之子少博學舉嘉靖
茂子鄉貢知易州涖官公廉不燃官燭諸寮憚
之歲節百金易民不田三年一繇老稚無遺算
正初曰十五成丁六十免役乃復老稚一于二

百有奇招集流徙者裨之會北朝乘秋熟以疾
騎馳蹂稼穡大司馬議城白羊禦之正初行奇
兵二千爲諸郡先值失候某中丞調知蓬州三
年多惠政陞襄府右長史王敬重之相得甚懽
未幾乞歸卒王遣使致奠其敬慕如此家教嚴
肅有法子弟咸受約束至今稟之

龔良猷字起虞御史晟之孫中嘉靖戊子鄉試
爲廣州通判時封川厓黎相繼作亂良猷奉檄
平撫于粵有功

魏表字端甫樂安令泐之嫡孫也父正中淳朴
簡易吟詠自得有古人知止知足意以隱德稱
表自幼敏慧占對應聲卽答四座皆驚甫成童
縣令方一桂強使應童子試三試皆冠軍督學
奇其才復試以古文詞名冠一郡爲文舉筆便
成無所改竄旣而宗于虞都御史守愚謂其文
如易牙之味師曠之音盡得其傳嘉靖甲午應
鄉試以禮經中式數上公車不第自傷不遇卒
不仕日訓邑後學及弟姪爲文詞旋有以詩文
名世者杜門博極羣書所著撰豪宕不羈彷彿
其爲人性孝友母畢氏寢疾躬侍湯藥者逾年
父所遺產盡讓庶弟年四十三卒子翼如有潛
德孫詔登萬曆辛未進士

但偉字邦彥嘉靖辛卯恩貢任四川岳池知縣
政蹟載岳池志偉風度老成政尚敦樸訟簡而
事弗擾刑清而民弗怨邑人有本後思兄子維
城任黃縣丞居官清約辨顏世遠之寃擒剿海
寇有功

饒敬承字象賢祖士亨字行之中嘉靖己卯鄉
試官海豐知縣敬承以嘉靖丙午鄉貢令蒙城
南部二邑陞賓州知州時八寨猺賊阻險攻掠
粵西大震敬承親冒矢石督率兵將奮戰殲其
渠魁捷奏陞平樂府同知旋解任歸原居賓九
載勞瘁勤苦有裨地方賓人戴之勒碑祠祀子
若蒙中萬曆丙午鄉試

鄧廷猷字汝嘉號月泉中嘉靖丙午鄉試登癸
丑進士授戶部主事歷任建昌府知府時流寇

倡亂猷率所屬闕丁壯繕守備寇旋以平積粟
賑民毀淫祠建書院性貞介不阿以公道面忤
直指調雲南大理遂去官歸家法凜然子弟以
嚴見憚子士望萬曆中例貢官至達州同知子
士達字行吾中隆慶庚午鄉試初授嘉定學正
聘試雲南後陞石泉知縣孫日芳中天啟丁卯
鄉試未仕卒

熊兆祥字汝飛別號渭水曾大父梁與邑龔御
史晟華容黎狀元淳相友善應天順七年貢授

青田尉陞淮安鹽場大使父名勝珊幼孤未嘗
學問公幼而穎異刻志讀書有超軼前人之志
中嘉靖壬子鄉試初授四川義眉知縣時經妖
寇蔡百貫之亂公一意休養務從寬恤捐俸修
葺學宮崇尚儒術邑處窮源水不及東郊田往
往不任旱公引龍門洞水作堰開渠灌潤百里
民甚賴之越雋有屯田間雜民田軍官多以屯
混徵積弊百年尺籍亦淆紊不足據公往清之
分別軍民區畫界限民得免徵者三百石有奇

又綏戢都蠻之亂厥功甚鉅巡撫嚴公清廉知
公治狀嗟嘆久之治裁歷五年陞重慶府通判
屬縣凡二十錢糧解送者多淹滯之嘆公臧司
督糧出納惟敏闔郡民戴之在郡三年署合州
篆一年署府篆半年冰蘖如一日有以羨金進
者不受也旋以母孺人春秋高具文乞終養遂
歸公居官政在養民還林下與聞時政有利害
切于民者直辭于令君多所補益平生崇重小
學一言一動悉以爲準邑令王公三宅重其品

舉鄉飲大賓卒年六十三歲子二若虞若虛俱
庠廩生孫崇中萬曆癸卯鄉試

魏樸如字文可山西憲副裳長子性警敏好讀
書更肆力于古文辭厥考與歷下李于鱗吳中
王元美下雉吳明卿廣陵宗子相吳興徐子璠
嶺南梁公實豫章余德甫蜀中張肖甫並講業
燕中一時互相推重焉弱冠領嘉靖辛酉鄉薦
爲衛輝府同知甫一月丁艱歸起補敘州府同
知加意拊循後又復補安慶會巨寇劉汝國爲

亂親履行陳生獲二渠魁厥功居多上旌其功
賜之金擢守潁江歲苦澇百計疏河地方永賴
三年乞休兩臺爲請于朝加副使致仕所著有
怡雲亭集長子詩以例貢爲寧羗州判次子詒
崇禎己卯歲貢未仕卒

鄭之亮字邦采鄆都縣令宗仁之孫也中嘉靖
甲子鄉試授知臨淮縣臨淮爲鳳陽首邑最衝
疲守監使虎而冠輦上貴人頻往來供帳日待
于境上民不堪焉先是令不期月輒以不能去

官公至多惠政不廢民之生以行媚其題于
亭者有曰東南民力竭矣居其位敢忘撫字之
仁西北神京在焉至于斯願賜承宣之澤見者
知其子諒正大不可犯徵拜福建道御史補江
西僉事陞苑馬寺少卿歸懸車二十餘年不與
聞公私事兵巡馮公應京爲諸生時知亮所以
治臨淮狀及入楚聘爲本邑約師不獲辭與有
司朔望集士民申解聖諭卽馮公詢以邑中陰
重事曰鄉正止勸善耳違知其他其侃直類如

此所著有臨淮志

謝師啟字叔蒙號衡冲父三訓其先甘姓蜀之
長壽人也三訓祖洪嘉靖中爲蒲司訓以女適
謝司馬存儒因畱訓隨姑爲謝後遂家焉師啟
兄弟十人隆慶辛未與弟師彥同榜進士授東
昌推官風裁峻肅徵拜御史屢侍經筵論劾冢
宰巡視倉漕凜凜然執法不阿及按兩浙風裁
愈厲已卯大比所錄士如陳懿典等九十人皆
知名士以見忤柄臣旋出爲河南按察司僉事

駐禹州多善政詳見禹州志祀名宦後遷福建
布政司叅政罷歸師啟爲人英俊練達經國籌
邊雅負宏抱黑髮懸車臺省屢薦竟未起用時
論惜之年七十卒著有琅玕艸遊嶽艸行于世
家訓雅飭子姓有烏衣風焉

張書字子中號蒲源蒲圻人隆慶丁卯以錦衣
衛旗籍中順天鄉試戊辰登羅萬化榜進士有
上座師詩十八人中唐學士三千門下魯諸生
之句時相與傳誦之選翰林院庶吉士每于館

中扼腕談天下事故出中秘改授工科給事中
時總河潘公修河糜費鉅萬績用弗成公抗疏
論之羣臣震慄後居刑科戶科其章奏多緩刑
薄賦語旣居兵科有大同都督馬芳恃江陵入
幕賸削行伍公廉得其狀奏劾之芳輦金請救
公面唾之時朝政必先聞權相公懼其中變也
先奏後揭江陵大怒出爲河南布政司叅政分
守河南道有李天公者爲地室聚兵糧樹職將
謀反公密佈偵探一一計獲時兩臺雜爲第一

奇功會江陵薦星士馮瞎子調公馮索金三
不與更辱之其人膚懇江陵故京察遂不免旋
降直隸鳳陽府泗州州判陞直隸真定府元城
縣知縣除補山東鄒平陞南京安慶府同知江
陵敗始遷南京兵部武庫司郎中誥授奉政大
夫陞通政司左叅議調補河東鹽運司副使又
調萬全都司經歷陞廬州府通判進陞刑部主
事致政歸以子時雍贈奉政大夫戶部浙江司
郎中子三人時雍萬曆癸丑進士時熙中癸卯

順天鄉試時麟中乙巳武科進士

謝承範字元疇戶部侍郎鵬舉兄子也父鵬昇
有至行承範領萬曆癸酉鄉薦就職吉安府通
判治行有聲陞梧州府同知梧故多徭賊猖獗
備禦稍弛便弗能禁承範條陳利害簡閱戎器
一切指揮如得夙構居有頃監司委以征討遂
入洞殲其渠魁俘獲若干梧民以綏撫臺上其
功將擢用以久侵瘴厲尋卒

張諧字弼卿雲南僉憲東周之子工詩好臨池

業負性警敏中萬曆丙子鄉試授山東淄川令
寬和爲理設糜賑饑置學田義倉爲淄川永利
邑故有苛稅申請臺司罷之民獲安輯以子侄
得舉棄官歸飄然塵外弟謙有俊才早逝弟謨
以例貢任湖州照磨子于陞中癸卯鄉試侄于
階謨嗣子中甲午鄉試

龔本字心渤御史晟之後山東副史良傅孫也
博學工古文詞時流推重中萬曆丙子鄉試屢
計偕不第勉就學論尋陞沔池知縣釐弊剔蠹
蹟人高其韻藏書數千卷亦號墨莊焉

王廷策字治卿爲諸生時豪邁倜儻遇關風教
事輒侃侃直言以春秋中萬曆己卯鄉試授荆
門州學正乙酉聘試山東拔關揚等皆名人多
成進士陞國子學正補代州知州值歲旱禱雨
有應辨誣盜蘓登高之冤感盜渠帥自服其辜
會有構害之者遂去官歸里一年卒所著所麟

經一班

劉應命字長俞以詩經中萬曆乙酉鄉試初授
着州學正多方造士貧窘者遍周之署篆青神
有民以積逋股骨公力爲釋免轉授夾江知縣
會平播之役徵取棖械公奉檄隨供軍興以濟
或有負枉至大辟者賴湔雪得甦擢知德慶州
值欽州有警征繕一如播事無少闕粵俗薄莖
成風公痛懲曲助民無不懍然知孝者波臣弗
靖塾饑者在在而有公亟爲捐俸設糜全活甚
衆攝南寧屬邑符清徭減權民戴其恩居里中
貢未仕卒

蒲圻縣志

卷之十一

才猷

三

周于蕃字价人中萬曆乙酉鄉試初授竹山諭
以文學造士有聲擢遵義推官遵義舊隸播播
平建郡蕃招集教養備著勤勞悉反土司侵地
署篆江津民勒碑頌德以江津科第寥寥用形
家言審方面特創塔于學前自是登雋者踵接
因稱爲周公塔云嘗涉巫水忽風覆采艇亟自
靡樓船往七命悉援召入爲應天司理決疑獄

禁私錢惠威並著上臺屢薦之里人運餉自下者賴調停力得不負而且獲贏餘無何卒於官公平生孝友其麗藻清操令人景慕所著有寤語及幼科行於世子二長文臣邑庠生次成臣順治七年貢

馬介字于石河南太守練之孫性嗜古以博綜負書簾之譽名聲籍甚太史蕭漢冲輩多折節禮之萬曆八年歲薦授蘄州訓申教作士善談名禮人士多從焉擢武寧令緩征徭捐罰緩與

民不擾施粥活饑民多所軫念偶以踈上官解任歸田課子盡出其所藏書卑之尋卒子天錦中萬曆乙未進士次子天銘太學銘子淑昌順治壬辰進士介以子官贈工部主事

周淳字完初別號海日幼穎敏善屬文年十九赴督學童子試輒冠軍是年萬曆戊子秋遂登賢書嗣是益篤學嗜古冀捷南宮凡七上春官不第謁選授潯陽司理潯陽自稅璫煽虐詐險成風發摘懲勸不遺餘力江州士民爲之一變

行將有殊擢以疏論本府太守某心銜之多方
詛射謫東省運判移鹺之明年當事廉其能各
檄署濟河令適旱魃爲虐焦石流金公全活饑
窶不可勝紀用是聲益藉藉轉東昌之恩縣令
恩復頻年大稔公私無半菽儲公隨地置厰捐
俸資服食食民糜粥卽烈日溽暑猶單騎省視
無倦容民得以甦越三年同郡武城適乏令奉
臺院檄移治武城越兩月疏河濬流舟楫通利
一時漕輓迅導天津軍國之需由是以裕其諸

興利剔蠹善政纍纍有彼都人士三邑紀畧之
可考云歲己未擢交州府同知兼攝大名府事
文符如雨公立時剖決無留滯無何白蓮教倡
綠林蜂起貽憂社稷朝廷謀所以受鉞者而難
其人下臺司酌議屬之公公素嫻韜畧工騎射
率士卒若干力爲剪鋤時顯皇嘉其績晉秩思
恩太守未幾謝病歸年五十九卒所著有座右
十箴課士語皆學行格言鏤行於世子四人麟
仕穎仕亮仕彥仕俱庠生孫珏赫庠生茲詰林

秀朋俱英敏能爲文

本傳出家乘

宋時魁字文可號惺軒登萬曆甲辰進士授行人累官河南府知府爲人醇謹緘默終日不見喜愠之色中實曉暢屹然不可奪尋因福藩就封不堪騷動以親老子予告歸遂杜門絕跡造請出俸餘置義田四百餘畝歲收入爲族衆周貧及重差助又捐金建羅田橋至今利賴之袁昭文號海嶼幼有異表博極羣籍尤喜莊生司馬遷以詩經中萬曆辛卯鄉試辛丑以母老

謁選授湘陰學正湘庠自嘉靖戊午而下未著賢書者四十餘年公爲改遷學宮嗣是獲雋者累累乙巳擢臨洮府通判駐肅州古酒泉故地距臨洮孤懸二千里公殫力運籌形幾爲瘁蒞任甫六月丁內艱歸已酉服闋以舊職補新安尋委署歙篆一秉公廉未匝月又署海陽甫至任汰胥吏繁冗官舍一清其富賈換單常例一切斥革庚戌秋榷關鳩茲一以寬商爲念未幾攝駁縣踰月而治壬子量移禹州禹州爲黃次

公潁川舊治公有意乎其人每事則之至于節
郵傳省供億新學宮懲狡獪善政未易枚舉丙
辰改守邛州州蜀之邊徼地瘠民貧公潔已裕
亦有不便于民者釐之士民稱讚焉會隆昌王
橫據石笋山寺稅公力爭之遂拂衣歸林居二
十餘年掩扉習靜不與外事年八十有二卒

魏詔字奉之嘉靖甲午鄉貢表之壽也父翼如
隆慶中爲太學生詔以詩經領萬曆辛卯鄉薦
登丁未進士廷試二甲二十名例授州牧改教

授得嘉興府杭湖從遊者千入梓文行世曰吳
越雅言去後立石志思遷國子博士轉刑部主
事平反全活甚衆會御史劉光復以直言下獄
爲抗疏免熱審取忤堂官疏上光復得免審又
以都督凌應登擊御史凌漢冲于朝事下部議
諸司三上其議皆不當上意最後屬詔問儘內
召百奏以應登擬戍漢冲免官趨朝入對得稱
旨紀錄調兵部武選司專理清黃一時勳裔稱
快有內監明廉者欲干預黃政詐言勤勞疏請

于上希廩指詔上疏道糾明廉之罪詞旨激烈
疏入上嘉納之褫斥明廉萬曆未陞江西提學
副使質天矢日以崇雅黜浮拔幽疏滯爲已任
再朞周歷十三郡文體士風爲之一變刻行西
江大雅錄會入闈前數日奉旨汰犬收值狂童
鼓噪詔不悅曰以吾風教一方能若士類而不
能馴頑童憲臣之辱也何惜一官不以謝朝廷
卽具疏致仕歸撫按藩臬鄉紳士子百計挽留
不能得歸里杜門布衣蔬食分俸以惠族里居

蒲圻縣志

卷之十一

才猷

二十七

家四載年六十三卒 祀鄉賢

張時熙更名懋雅字仲正蒲圻人萬曆癸卯以
錦衣衛旗籍中順天鄉試授直隸大名府元城
縣教諭陞河南懷慶府武陟縣知縣武陟民作
刁悍公恩威並濟吏民皆畏愛之時流寇猖獗
橫掠修武溫孟之間公修嚴武備境內獲安然
性清介于民一無所取以禮際疏薄多失歡于
上臺遂左遷兩淮鹽運司知事尋陞雲南歸化
縣令遠在天末去京師數千里公于時不無北

風之泣因解綬歸

饒若蒙字完白父敬承嘉靖丙午舉于鄉官至
廣西平樂府同知若蒙以詩經中萬曆丙午鄉
試初授南直淮安府清河縣知縣時淮陽洧凶
飛蝗蔽野民多流竄公緩賦寬徭多方賑貸境
內賴以全活考最進陞戶部主事轉本部員外
郎中以忤權貴左遷長蘆鹽運司知事旋陞福
建興化府仙遊縣令仙遊巖邑也公政平訟簡
樂與休息第密邇莆田其土田多爲豪族侵占

浦圻縣志

卷之十一

才猷

三

又往往逋賦公力爲清覈不避權勢以是獲戾
要人又左遷浙東紹興府經歷公才猷敏練清
介不取紹興守稔知其賢雅相敬重頻攝新昌
餘姚蕭山三縣所至皆有惠政後陞應天府六
合縣令六合路當孔道供億爲煩公憚于折屣
遂解任歸公篤孝先人出俸餘勒歷代祖冢石
碑創建合族享堂置祭田八十畝以供丞嘗令
家督遜掌之以其餘給貧族之婚葬晚年猶開
塾延賓與諸士論文不倦獻逆屠城公避地偏

警山陰年八十以壽終子弘豎奇豎弘望俱庠生

張時雍字存肅蒲圻人河東鹽運副使書之子萬曆丙午以錦衣衛旗籍中順天鄉試癸丑登周延儒榜進士授南京太常寺博士陞兵部職方司主事所掌鎮戍烽候之政事關軍國飲冰受任不敢怠違時疆事戒嚴忽坐偵探失宜歸罪中臺左遷兩淮鹽運司判尋陞刑部雲南司主事補運理刑兼得其職調戶部江西司主事

陞本部員外進本部浙江司郎中除補戶部河南司郎中陞河南府知府時中州荒旱民多流散公加意拊循寬徭緩征民賴以全乃以催科延緩降直隸松江府同知調山東萊州府同知致仕歸子昂中崇禎癸酉科副榜武舉累官錦衣衛正千戶順治五年授明威將軍鑿儀衛雲麾使子晃順天府庠生順治七年禮部考取送監授湖廣德安府應城縣知縣孫應震以父昂恩蔭入監授福建汀州府武平縣知縣

鄧士望字子畏廷猷子萬曆中例貢初授上林丞遷亳州判擢達州同知著練敏聲去後嘗令人見思署雲陽有囚被赦爲猾吏所稽者十年立爲申釋卒于官子日芳中丁卯鄉試

王鼎彥字隨菴生而敏慧讀書日數千行無所忘失好爲古詩文十五歲爲花月賦累數千言人爭誦之性不羈其兄大叅明珍屢戒之公曰兄狷弟狂不相悖也萬曆壬子登鄉薦上公車後卽遍遊吳越間與一時文士交名山佳川妓

館詩壇無不過者間一歸里卽感然曰吾居邑屋如入瓶盎中殊不耐旋去久之爲河南內鄉令以親喪歸復爲粵之藤縣令三年遷江南西城兵馬三年遷刑部郎平刑緩獄然負才好氣多忤其上官雖見謫益強項不顧也崇禎庚辰年擢陝西榆林兵備副使榆林有大將軍張天禮者爲其帳下卒張自得所劫盡有其家資據城以叛殺副將一遊擊一結楊光明等爲外援公議剿邊撫鎮不問也然公竟給楊光明發張

自得而降復招降流寇賀洪啟等六千餘騎
邊以平時邊餉耗減兵皆食草實幾爲變公一
日行邊城見盃中餘飯色淡碧莫辨何物摘嘗
之幾吐旋喙餐日味殊佳市數斗以進饑卒稍
安復百計撫之竟以無事及謝事南還降賊跪
送者五百餘里至有墮淚者癸未遷粵西桂林
叅議值寇入都城未就隱居江南益好客喜遊
不事生業家益貧年七十歸里田廬悉賣盡然
豪爽好爲詩詞飲酒罵坐如少年時無異也嘗

作三聯謂其子姪曰吾死不用置明器惟書此
置旛上導吾歸壙吾地下大笑矣年七十七卒
家貧不能具塋其兄子九功九真爲發喪一如
公教書其聯而塋之其一聯曰埋月林中看生
旦丑淨打諢捱光這本戲文纔散接風天上會
李杜白蘇相邀結伴那回筵宴新開其二曰作
客秦淮二十年幸得生還歸祖壟居官曼容六
百石喜無業產付兒曹其三口生旣索離祗有
青蠅爲弔客死無沾帶不妨素手見瞿曇亦是

以見其豪也所著有正始堂集十卷傳者以爲
謫仙云

余宗宰揆夏號襄陽性嗜古經史無不淹洽中
天啟甲子鄉試再試禮闈不第辛未謁選授知
河南懷慶府孟縣初抵任卽開水利甦驛困固
城池籌餉料厥功甚鉅兩子撫臺陳公必謙疏
稱防河有功四月按臺金公光宸委各府刑廳
查州縣城池考孟縣上上下下丑兩臺合疏具題
補工部虞衡司主事戊寅翰林院大中允黃公

道周以皇太子講學須預修司經局以備藏書
命公董之又督修器皿厥值奉先殿告成禮合
禴祭公監製如式上親御志喜改公本部都水
司員外郎時都城戒嚴又奉旨督修炮臺刻期
告竣准加俸一級河工告急救授督理漕徐中
河兼理徐呂二洪等處河務甫至任首奏分任
河工一疏奉旨報可當卽刊布郡縣各飭河工
邳宿豐碭之間畚插如雲自是河道通行糧運
無阻漕院張公爾忠推爲蓄浚有方濟川巨手

焉庚辰中河饑立請石價銀千八百兩市安東
縣黍麥以濟全活數千人無何上命科臣臬巡
視河工公以禮際疎緩科臣購他事中之遂拂
衣歸林居十餘年惟以詩文自娛歲辛卯卒年
六十九子二人應甲應中俱庠生有聲

李軫字君翼號鯤溟少聰穎萬曆丙申應童子
試拔第一補弟子員凡八入棘闈丙午壬子乙
卯三中副榜丁卯中鄉試時年五十二矣戊辰
下第求補近京教職便上春官授山東東昌府

清平縣諭甫至任卽以敦勵風化爲先務學宮
圯捐俸修葺之方將再試春闈以上臺獎薦陞
北京國子監助教比入雍以助修國史見知于
大司成踰年陞計曹司務旋陞本部主事署雲
南司廣東司郎中數月監督海運新太二倉公
督倉務戴星出入克敬克勤運弁肅如丙子四
月夜半近新太倉居民失火公星馳往救時東
城兵馬司各守衛官俱至見其烈焰莫敢嚮還
公至出袖中手錄書冊一卷傳諭市民曰有以

一器水來者領一字有能嚮邇撲滅領數字次
日頒重賞頃之以大小器盛水來者無數木忽
奏集人爭撲滅頃刻焰息次日以字冊來繳賞
錢數千緡都人士咸服公有庶卒之才丙子秋
都城戒嚴師逼蘆溝橋部堂發勘合運糧六倉
脚役皆畏怖不敢往公先往衆從之遂唱籌起
運爲六倉倡事平彙敘奉旨紀錄積勞成疾屢
請乞休不得未幾而侯部堂解任部總督李以
小吏譖言奏倉口缺豆米若干及奉旨盤查較

算合量尚羨百釜倉額無虧考功欲留而公以
病堅意休致戊寅奉旨致仕優游林下凡十四
年辛卯七月七日卒壽七十六子四人長應壯
郡庠生次應謙中崇禎癸酉鄉試第六名初任
陝西神木令陞廣東崖州刺史撫綏邊方以循
良稱崖積苦牛判新稅每年四百八十兩有奇
解費又若干兩應謙十數申文爲民請命康熙
五年奉旨蠲免崖民德之次應晉庠廩生次
應豫庠生傾篤學能讀父書

謝胤璜字皇黼號紫山甫八齡喜楊億登樓句
遂癖嗜詩自是潛心經術制舉藝亦復擅場性
放宕不羈薄遊漢沔間年近三十不遇歲己卯
夏督學王公澄川首擢之始補弟子員批其卷
額有子殆不畱行之語果印以是秋登賢書五
上春官不第乙未謁選都門逢 章皇帝新行
身言書判用人之法璜考上上等吏部引見
太和殿賜坐賜茶且欽定巖疆得豫章之崇仁

蒲圻縣志

卷之十一

才猷

崇劇邑前令視事輒敗敗輒以累後人公以一年

檄六年之逋負以後官兼前官之考成勸輸有
方疆屬不絕又劇盜聲援六邑彌山谷長子孫
為崇害者數十世璜驅騎入賊壘披心招撫歲
稽首馬前投凶刃于階下崇俗駸駸丕變按季
課士鐫巴山新苑若干卷迄今聯鑣甲第者多
出璜首拔士彼時總督郎直指笄四五紀錄並
疏于朝任滿回京將大用之值 章皇帝賓天
而寢調滇南之河西縣任二年嬰疾瘴鄉卒官

年五十五子二元常元京

鄒應錫字爾圭號荆野其贈君守弘曾爲潼梓尉贊政有聲荆野幼孤性穎敏就傳讀經史成誦後輒記憶不忘稍長學爲文出語不經人道成童克邑庠生性純孝事太夫人定省不少解崇禎戊寅督學王公永祚拔冠諸生壬午舉于鄉出長沙李蔡公道憲門明年蔡公徇獻賊難計聞荆野設位卽哭終心喪順治十六年謁除得知太湖時海氛波沸江南北悉震羽書颺馳

太湖城一帶空荆野以大義徧諭士民訓練鄉勇設席城堦糶糶出入謹斥埃羣情始定或言僞檄且至荆野厲色拒之刻意守禦城以全先是太湖編里五十明季賊據英霍歲蹂太湖數四人土不登手版者幾十餘年國朝操撫李公日芘疏請減其賦役之半至是生齒稍聚荒田漸闢三年奏績誌上考得受封及贈如典例擢知河南汝寧府光州州田賦蕪于太湖荆野拊循有加勸耕桑招流遺剔秕政然自防海以

來形神交瘁不任煩勞遂息心內典有條然塵
外之意因竦畧獲戾被劾以原銜解任歸丙午
旋里見比戶蕭然歎息久之嘗以利弊陳當事
代里人訖謂戊申入會城郡太守候之旅舍茶
話甚歡茗椀甫脫遂別太守掖之牀則冥然逝
矣戊申四月十一日也卒年五十有八子六人
履恒履翼履益色屏生履壯履觀履升俱英俊
所著詩文有影娥池亭艸南歸吟完鉢艸北遊
艸皖吟弋陽退食艸凡十卷

本傳宋顧撰

黃鳴陽字山翹爲御史五世孫早負才名尚
氣誼弱冠中崇禎己卯鄉試房考金陵章公瞻
嘉其五策以遠大期之會蘇逆屠城邑令曾君
棧就難縣丞卑必升性殘忍營署邑篆陽條疏
上臺言其不可直指黃公對臬司洪公天擢服
其方正不阿立返委檄蒲民得免于腹削及筮
仕願就薄俸祿養教諭富陽富陽地近西山賊
壘學宮茂草禘士寄居外屬陽至招集勸課蔚
然興起旋以疾致仕歸

余開熙字時純號嵩山順治戊子己丑聯捷授
江西贛州府會昌令勤撫疲民請除漕運量幫
之累闕七月擢主政旋丁父艱歸服闋補刑部
江西司主事尋遷員外郎癸卯北關同考所拔
皆知名士進吏部文選司郎中康熙初以母老
乞歸養居林下八年著有修月軒集

李應謙字兢受號彥吉李軫次子中崇禎癸酉
鄉試第六名授陝西神木令單車蒞任盡心撫
字時奉檄勾兵數百邑人震驚謙募壯勇者三

蒲圻縣志

卷之十一

才猷

三

十人以應餘力詳免又奉例輸洛銀四百兩復
爲請豁民賴以安旋陞廣東崖州牧兵驕黎悍
土瘠民尪謙內和外戢嘗手牒請題蠲牛判新
稅康熙五年奉 允民喜如釋重負又修葺學
宮聚諸生講學明倫自是絃誦之盛侔於中州
洎解組歸里愛山居日以古籍自娛邑令欽其
德禮致鄉飲者數十次康熙戊辰無疾而卒壽

八十三

任崇字山宗號衡麓順治甲午舉鄉試戊戌會

試中副榜初授蘄州學正轉鄖府教授課士有
法陞河南滎澤令旋以憂歸服闋補福建南安
令南邑濱海多巨寇崇力除之以良吏稱年六
十三卒於官

馬淑昌字穉若號雪峯登崇禎壬午賢書越十
年爲順治壬辰始雋南宮乙未廷對授商水
令邑有夏某者家巨富無子以史某爲贅壻其
猶子璞澁所有計致史於死匿其屍史之妻疑
而控諸上臺璞行多金秘其事累年未決昌泣

任臺省首以此檄訊隨齋沐具疏告神凡七晝
夜庭鞫時璞匿不吐忽有一雀繞集案牘上若
向人語昌卽控騎隨雀以往見雀飛入竹林深
叢中昌命隨以畚鍤而屍以出璞遂伏法他類
此者尚多由是以循良待徵丁酉冬忽緣鄉試
事磨勘波累昌隨歸家食者十年己酉起東平
州倅未幾仍致仕昌性方嚴容貌悃悃能甘淡
泊少刻意舉子業寢食俱忘父寶愛之後獲雋
際以父未見爲憾其居二親喪也哀毀骨立塋

之曰徒跣號慕直達窆所悲動路人晚年尤究
心釋典以嘗慕操巨舟浮大海中人稱爲雪峯
和尚故自號曰雪峯著有聽真軒集

馬之鵬字文淵號新溪中康熙辛酉鄉試乙丑
成進士初任知廣西博白有部民垂老僅一子
必失控縣鵬一日至烏渡河見一人獨居河濱
瞻視錯愕逮訊得狀部民子果其所殺尋得尸
遂伏辜邑巨盜黃叔元集無賴刦殺鵬以計擒
獲械至縣殲之上官廉其能議卓薦旋以憂去

服闋補知滇之元謀邑有盜魁入貲爲院吏隱
其身以毒百姓鵬知之擒于都院轅門外置之
法自是民毋敢爲姦陞工部營繕司主政改虞
衡司旋陞營繕司員外以薦擢兵科給事辛卯
典試山東在兵部日人告皆切時務其一言會
試中額宜分省取中奉

旨允行癸巳縮錢法冰蘖不染舊規罄除甲午轉
戶科給事康熙五十四年卒于官

黃錦字淑嶠康熙丙午中本省鄉試授河南

符令以賑饑廉能擢開封府同知時懷慶有姪盜殺媼者復捕殺叔與滅其踪訟久不決因委錦往勘一訊得實又有掠賣人幼女爲娼女不甘扳轅呼冤錦令聚邑中少年聽女自擇其偶適掠女者亦至女認識之乃按以法上官益廉其明察交章特薦戊辰 召見授河間知府以肺病劇又念母老遂投牒歸癸酉部檄徵起辭不就居林下者十三年絕不營心田廬布衣蔬食晏如也年七十六以無疾去世

雷閔邑太學生康熙癸亥年出宰陝西漢中府褒城縣邑當衝要復遇大兵防駐每歲更番易戍由是居民離散邑井蕭條甫之任卽捐俸倡修文廟整緝城垣給籽種集逃亾褒民漸有起色以其餘閒禮士愛民輕耗却餽範馳驅而斥詭遇有學道愛人之風丁卯夏解組旋里士民郊餞泣送者不絕於道卒年六十有六

徐淑嘉字爾會號誠齋幼而穎異年十四應童子試卽拔第一年二十餘中順治甲午鄉試會

試中辛丑進士戊申冬由推官改授江南績溪
縣令隨以艱去服闋補廣西羅城縣循良報最
簡調上林縣以年暮致政歸杜門不預外事琴
書外日以課孫爲樂康熙庚寅年八十四歲而
終乾隆元年以孫徐而發貴誥封奉政大夫
唐有勲字柱參號琅峯生有異質少郎留心經
世不屑營家人產業由拔貢教習京師所交皆
知名士授山東武城令時東省游饑武邑特甚
勲不待奏報卽開倉捐賑民賴以甦旋丁外艱
起補蜀之綦江其治綦也如治武而不尚苛細
更持大體以故事舉而民不驚當事復交推之
然位不滿才作令十七歲始內轉中書科中書
先期竟卒於官士民多哀之

補遺

王璧字器之文修次子年未弱冠登賢書春闈
中乙榜三掌學教兩聘考官繼擢雲陽尹政績
懋著蜀宦在京師者如名御史劉春唐鍾舟輩
交章薦引璧以年邁不樂于官遂致政歸蜀詠

德以贈

王解字時化應永樂十四年歲貢至春官三試
皆第一解豪氣高邁爲士子時邑有政事不平
必爲建議白諸當事民間滯抑多賴以伸後授
宛平尹

蒲圻縣志

卷之十一

才猷

四十三

人物志下

文章

武功

真叔

仙釋

文章列傳

宋

廖正一字明畧世家廬山之竹林林多竹號竹林居士後居蒲讀書鳳凰山中深造獨得為文汪洋浩肆藻采煥發修寧黃庭堅深器重之與晁補之並稱國士元豐二年登時彥榜進士初授華陰司理叅軍累官至端明殿學士出知常州蔡肇以啟謁之極其褒贊蘇軾亦稱之云毘

海圻縣志

卷之十一

文章

陵異政謠頌藹然後載左遷黃州團練而范純粹亦安置鄂州正一與之交游最善時衡山進士爾暨弟倚咸負才名為時推重蓋與正一後先相望云

張掖理宗時任澧州石門縣主簿性行端雅問學淵博時縣尹薛儀老學正李洪俱極一時之選而緝文揮藻必屬之掖所著有修學記亦其一班云

元

何維延祐元年中鄉試將常德孫以忠沅州李
燾澧陵李明孫才名相埒而維尤爲奇特逸氣
煥發莫之與京是科梓行求賢詔一篇摘辭爾
雅有兩漢詔令之風

王廷揚至治三年中鄉試試登瀛州賦藻思俊
麗考官龍仁夫大加稱賞時同舉者潭州則蒲
宗魯湯原瀏陽則彭宗復皆莫與爲儷

江存禮泰定三年中鄉試試大別山賦體裁古
與考官揭傒斯彭楚玉批云大別屹立江漢是

子奇崛與山爭雄時瀏陽周鏗武昌聶炳同時
登第相與麗澤克樹厥名裔孫師古中弘治六
年進士官至工部員外

何天駿字國正其先自宋季徙蒲卜居于邑西
厥考號毅齋天駿克承考志篤嗜經史游情翰
墨博洽不羣皇慶中授富川學錄轉湘鄉學正
厥子槐孫舉進士孫燭爲名令子姓世居洪山
稱邑望族

陳汝楫字濟民博雅醇實善吟詠工艸書洪武初舉明經授徽州府通判轉秦州茶馬司謫知渭南縣政聲卓異擢知廣平府卒于官

鄧林字時茂洪武二十九年鄉試爲人篤厚和易喜吟詠卽物寄興各有體裁初授江津教諭再調大竹廸士有方秩滿陞秦府教授藩封敬服所著有恂齋集月中桂賦

黃煜字士昭號必齋貴州監軍御史珰之祖也父楫別號雪洲稱詩問禮之外卽煙蓑雨笠放

浪于城南水濱不愧桐江釣叟煜宅心忠懇積學該博當時有奇字不能識遺文不可考者載酒往問輒傾吐若懸河中洪武丙子鄉試爲合肥教諭卽水晶苜蓿風味冷然而啜唔不輟仰紙吮毫樂此無倦屢典文衡爲時所宗未幾棄官歸益肆力于古文詞賦函幣求詩文者填門創修蒲圻縣志所著又有鳳凰山賦三禮說子城墀永樂二十一年同榜舉鄉試孫玟頤俱登進士喬孫圖昇萬曆壬子解元

廖道南字鳴吾南京戶部主事漢之子登正德
辛巳進士嘉靖改元賜進士出身二甲第一名
改庶吉士授翰林院編修四年纂修明倫大典
成陞右春坊太子中允六年陳洪範以懋聖學
因命進講洪範及大學衍義克日講官七年星
變日食應詔陳言進靈雪賦九年奏遵聖諭以
陳舊制申明祀典又陳末議以禋典禮併毀滌
祠淫像罷姚廣孝配享 大廟移祀大興隆寺
又奏稽古樂以禋盛典進大祀園丘賦十年彗

星見陳議修省及議崇典禮等事有詩賦進申
明宗廟大典有頌進又申明禘祭及稽吉禮以
崇帝禘賜甘露進寶露頌祀方澤進方澤頌又
進帝苑農蠶賦十一年進聖駕臨雍頌進景德
崇聖頌十二年坐不代講謫徽州府通判十三
年取回復職賜大報歌進和奉御札和聖製鐘
粹宮步虛詞進九五齊恭默室頌十四年丁憂
該禮部爲進呈訓錄事吏部查奉欽依廖道南
制滿陞一級用十五年紀祀典有頌十八年世

宗駕幸承天恭紀盛烈有頌又奏恭紀瑞應以彰天貺有諸頌進言官拾遺著聞住十九年奏昭聖謨以崇國本二十年奏恭述聖謨以懋昭聖政進獻頌歌箴其前後奏章俱蒙欽依褒譽所進和詩詞歌頌箴賦悉蒙畱覽付史館二十六年卒于家所著有文華大訓殿閣詞林記楚紀蒲圻志元素子集

本傳胡直撰

胡昱字仲陽號次峯成都司訓文之孫右方伯堯元之子也壘柯有父風工詩豪吟文遍史漢

蒲圻縣志

卷之十一

文章

五

中嘉靖乙酉鄉試計偕幾爲南宮第一人以目攝者遂蹶補陝西韓城令意同于棄竟投劾歸徜徉于西橋之墅北江之濱嘗騎射以澆其壯志是真能讀父書者

龔棻號雲石侍御晟曾孫生而穎異比長好讀歐蘇諸大家文一過卽會其意其爲文清真雅淡如公明與子春譚少引聖籍多出天然尤耽翫經史親師友絕無膏梁子弟之氣一時名雋皆樂與之遊中嘉靖甲子鄉試與庚午中式弟

棹丙子中式弟本交欄奮勵不肯就官凡五上
春闈不第勉受司理未赴任卒年四十二子三
逢堯以太學生任益都丞逢達逢誥並邑學生
孫維宗庠生

任文定字兆磨父洛以貢爲廣東都司經歷署
南海諸邑篆委驗賈舶並著清名定以儒士中
隆慶丁卯鄉試幼穎敏日記數萬言爲詩賦及
古文詞刻畧立就喜繪山水人物成一家與人
立談退寫其形貌惟肖書法鍾王平生好蓄古

名書墨蹟有蘇米風韻輕財好施交遊遍海內
邑肇修城垣掘骨纍纍爲大坎具牲文瘞之嘗
割股瘞父洛疾徐司空棧贈有奕世割股卷八
上公車不第選南陽府同知歲屢凶捐俸活人
甚衆壘膺上薦署篆舞陽內鄉禱霖雪枉所過
人皆追思撰兩河全志宦歸琴索蕭然其書畫
人多寶貴之

謝師彥字叔美隆慶辛未與兄師啟同榜進士
座師李翰林維禎以論著高一代少所推許顧

獨喜得師彥卷至後場更極嘆賞新鄭公見所著諸論策擬首館選旋卒都下平生孝友無疾言厲色惜未竟其所至

任文台字位南天性至孝博學劉覽才名早振兩備中式不第年三十以萬曆戊寅選貢司訓瑞昌聞父訃歸起補岳州又丁內艱歸後諭保安遇寇警台戎服登城爲諸生倡齊民無不鼓勇卒賴以完時謂之廣文干城創修保安邑志後轉澧州學正所至教先行誼輒爲上臺所知

諸生有抑代伸之婚塋不給者捐俸以助陞河南教授致仕歸杜門自適所著有家乘及秦楚雜著等書舉鄉飲大賓

徐錦字黃谷少有異姿持身端謹博綜羣籍門下問奇字者踵相錯登萬曆戊子鄉試每上公車止帶蒼頭一二人賞景吟思入店肆亟索紙筆寫日所撰著酒帘青樓弗顧也爲孝廉十餘年不敢以情面枉人曲道一切田廬推之兄與姪無所吝吝幸丑下第簡選令職悵惘久之

病遂作卒于燕邱子邦隆天啟恩選貢士邦嘉
邦靖俱庠生孫維機貢監考選理閩維檀維極
俱庠生有文名維椿廩生曾姪孫美大庚戌進
士

任遇隆號衡雲少年異姿苦志下帷十年不窺
園究心理學明隆慶辛未補邑庠生巳卯戊子
俱中副榜事兩繼母撫諸弟孝友無間言立身
端恪訓子義方一時文學之士爭臯比相迎公
嘖笑不假以經義性理相傳授若魏翰林珩如

王大叅台彥鄧憲副士亮徐司理鳴玉弟孝廉
經世及廩庠名士出門下者以百計數奇不第
應萬曆乙巳歲薦授長沙府司訓日與諸生坐
嶽麓書院訪先儒張栻讀書處禁蛙池上芹香
藻彩豁如也陞臨武諭徘徊舜峯岫嶺之上攜
子弟輩時登高勝使雲水盪其心胸以詩上陳
太守圭云苜蓿羞年儉石匱喫歲豐太守問之
對曰昨泛湘江見二石匱一脚萱草一脚蓮花
知歲豐矣後果然太守異之黃學憲景星委

南嶽課衡士問奇字者屢相屬也山徭亦遣子
入學聽講囊止煙雲餽却脯脰陞四川重慶府
酉陽司教授倪銓部斯蕙重慶人舊蒲父母也
詩招之日吾道南來兼西來飛過回囉又峩眉
辭不就致仕歸里惟督耕課子一字不入偃室
屢請鄉飲亦不出邑令吳炳心儀之式其廬有
兩象三光衡霧今開之額壽八十卒子明俊庠
生明儒廩生孫璇庠生孫崇中順治甲午鄉試
戊戌會試卷填二百二十四名覆闈論有以漸
能爲文

蒲圻縣志

卷之十一

文獻

九

二字忌主考傳公諱改中副榜選蘄州學正陞
鄖陽府教授孫雲庠生曾孫奇澤奇豐庠生皆
張于陞號青如兵憲東周之孫瀛川令諧之子
自幼嗜學隨父宦邸讀書夜分不寐中萬曆癸
卯鄉試歲丙辰以太母春秋高勉就祿養授知
中郟鳳陽縣以性簡傲不能俛仰左遷粵東憲
幕會連州缺刺史上臺委攝連篆連屬連山楊
山素稱多盜難治陞蒞任務從德化盜弭伏不

敢出旋除河南舞陽縣尹甫及歲餘堅意休致
竟解綬歸公性癖好潔更耽山水越郭北門外
踰河有龍翔山樂之爲置別墅舊有窪樽石白
雲臺爲宋人遺蹟爲益之得景六十有四撰于
摩詰輞川嘯詠其中自號小輞川主人年七十
三卒子四人俱庠生

黃圖昇字孟起御史珰之裔係負奇才每讀書
數行俱下詩文駸駸漢魏以上萬曆壬子以春
秋中湖廣鄉試第一人既獲雋遂遨遊吳越禮

南嶽謁參嶺凡山水奇勝無不搜討所結納皆
天下俊傑己未春闈擬元以觸總裁忌改副壬
戌復擬元以用佛經字改副元授工部主事上
疏辭職有墨綬更新如欲富青蠶依舊不知貧
之句尋授黃安諭又有聯云不避疎狂招物議
媿言文字占時名甲子聘黔闈分試掄元胡允
敬餘所錄皆知名士先是祖御史珰以都勻苗
亂監軍進討手植叢桂于黔署公試事竣摩碑
認字展拜流連因築御史臺有題云當年豸繡

驚踏首此日文星照夜郎丁卯以憂歸壬申補
安鄉諭後陞北直大名縣知縣既抵任惟與諸
名人質論經史詩酒相勞不屑屑于簿書未幾
遂致政歸崇禎己卯以疾終所著有洗塵篇濯
纓館十刻孟起常談諸書行世長子金門癸酉
鄉試副榜以歲薦爲安鄉訓次子金閭庠生
龔逢祥字安治一字季緒山東副使良傅之曾
孫幼穎異讀書一覽輒記通子史百家言爲文
一宗先正陝西韓城令胡昱公外王父也家多

藏書公弱冠嘗從舅氏景猷借黃帝素問期三
日卽還舅氏笑之後如期詣送問之無不洞了
遂見稱異比長名噪一時中萬曆乙卯鄉試極
爲房師李公顯稱賞乃益沉湛讀書如諸生時
爲文直逼史漢詩擬盛唐書倣右軍性好結客
交名士擲千金若棄不問家人生產與竟陵鐘
伯敬譚友夏相倡和再試春官不第俛就平涼
府司理縱情詩酒以官爲寄一時碑銘序記多
出其手居官廉明自矢平反無冤惟以不能唯

阿乃爲合沙者所中遂拂衣歸歸裝僅圖書數
篋有法喜艸峯山堂集芙蓉圖諸刻行世

米良崑字彥伯父濟世以萬曆壬子歲薦官永
州府教諭良崑幼穎異成童卽有聲甲寅冬補
博士弟子員乙卯遂以詩經中湖廣試尚未冠
所鐫有浮湘十六執蓋其從尊公官滎陽所作
都人士皆傳誦之辛未初任河南光州學正甲
戌陞涉縣知縣旋丁內艱歸己卯復補豐縣庚
辰調恩縣三宰繁劇公退之暇游意翰墨優如
蒲圻縣志

卷之十一

文章

七

也是年十二月告病歸田歲乙酉冬卒襟韻灑
灑表表塵上所爲詩有晉魏風格尤工臨池藝
所善不一家腕法尤類南宮人多寶之于筋入
崇庠克繼父業

徐邦隆字孟昌父錦登明萬曆戊子鄉試未仕
卒隆早孤克承家訓刻志勵學力參經史屢試
冠軍食餼十餘年八入棘闈不第以天啟元年
恩貢入太學大司成賞其文拔取監元居都中
兩載所交皆天下名士與嘉奩金子駿竟陵譚

友夏相訓唱晚年林居絕意仕進惟日與故人
耆宿載酒臨高不履城市遇有小釁解以醇酒
發藏賑饑捐舟濟河樂行其善誠慧業文人亦
厚德君子也年七十一卒

龔維三字位中號衡湘其先自御史起家代有
達者三髻齡稱敏異好窮治經史邑大夫無不
推轂甲子年二十五舉于鄉益肆力于文南維
可成方公逢年中臺程公正撰大加器賞所著
有南遊艸又自念其尊公嘗發憤縱棄以終不

遇又不及待其膺仕馳封也更號昔莪以識餘
慕上公車者九庚辰謁選當除授終不就曰吾
寧乘下澤車徜徉閭里不賤坐弄煙雲竹樹間
耳其爲文直舉胸臆見子弟有蓄文選者輒不
憚恐墮六朝駢麗習家訓以行誼先同時先後
輩互師資之年五十餘卒惜未竟其志子四瑗
珈璋瓊皆能讀父書世其業康熙壬子子璋以
詩獲雋孫世哲以是科武闈中副車諸孫英多
論者卜其滋大云

國朝

唐徵汝字惕菴幼受學于父之夔年十二能制
舉義稍長博搜經史遂工古文詞累舉不售順
治戊子督學黃公澍拔冠諸生應是年恩拔戊
戌授江西建昌府通判到任後清署雍容紙窗
燈火不異諸生奉上委運糧至淮著淮遊艸巡
撫張公朝麟嘉其才幹委攝泰和縣篆泰和多
逋租惕菴署事兩閱月疆屬不絕政聲益著復
委署新建新城南豐廣昌四縣政治民和游刃
著詩文稿多散軼士論惜之

蒲圻縣志

卷之十一

文章

而理辛丑冬代覲北上卒于燕邸江西有官
京師者具棺送任子有功扶櫬歸塋百姓哭奠
于路爲官三年囊橐蕭然止載書籍數十乘所
張瑾光字子待號陸蒲諸生時文名藉甚順治
戊子科以詩經中鄉試第七人己亥科 特旨
再行會試遂成進士放榜之次日 詔儀制司
引見 乾清宮賜坐賜茶盛典創見遠近榮之
恭紀有詩殿試後補推官時江寧徐公惺居諫

垣爲較定雲心亭制義行世江浙諸名家坊刻
備選其文海內傳誦爲人靜遠有大畧自解褐
歸里益加揣摩畱心當世于時直指奉裁司理
多溺其臧慨嘆久之日與同學研求名臣經濟
以正已率屬自期先後薦紳咸仰其丰采又雅
量娛人獎進後學其懷抱有大過人者積詩文
論議若干卷丙午冬以疾卒于家聞者傷之壽
五十子二人達佶達任

龔璋字玉特蒲邑人父文林舉天啟甲子璋其

叔子也幼穎悟行文不屬草下筆灑灑立就十
五遊黌序累試輒受知于宗工顧久躋塲屋康
熙壬子始雋賢書復阨于南宮晚乃秉鐸黃安
課士有程法黃人士多尸祝之璋工詩古文詞
兼饒濟勝具凡匡廬泰岱無不探竒抉奧又多
筆之于詩若文以故著述益富其詩沉雄巉削
似得昌黎昌谷之遺古文雜著則旁搜百氏自
成一家淵湛奧博駁七乎入班揚之室矣所著
有秘園集藏于家與邑諸生張竒勲齊各人稱

龔張云

張璪光年十八補邑弟子員後以病棄舉子業
留心詩古文詞性喜書常購數十萬卷作千里
樓貯之又工於繪事蕭疎蒼古人競珍之故居
城西北隅有園林花木之勝值康熙甲寅滇逆
叛遂築室幽蘭山自營兆域於山之麓年七十
有六卒

龔逢烈字無競號友王少穎異博通羣書年十
四補邑弟子員旋食餼三中副軍不售以恩貢
授華容教諭及致歸蕭條四壁晏如也卒年八
十有六所著有西爽明聖二集藏于家

蒲圻縣志

卷之十一

文章

十六

徐美大字亦人號石峯年十三補邑弟子員十
八食餼中康熙己酉鄉試庚戌登進士所刻時
藝見賞督學魏公與周之麟鄭昱胡鳴舉爲四
名家丁巳入都考中書未任而卒著有金紫軒
詩集二卷

李應晉字明上司徒軫之申子幼聰穎勤學好
古年十九列邑庠廿五食餼以明經遷公安縣

訓導未任而卒年七十有五

黃鳴鐘少負奇質俯視一切酷嗜酒醉後作文輒洋灑數千言年十八南遊荊州多士異之久困諸生卒限于歲貢將終前數日策蹇辭族戚及期命子煇香藥湯浴後盤坐延壽寺以卒

張達仔瀟灑嗜古父積書數千卷達仔寢食其中後遭兵燹散失殆盡復斥橐金重購之得若干卷愛之鬻雪峯山川之勝讓美田宅于諸弟身居百合山中雖頽垣蔬食而謳吟弗輟有詩

蒲圻縣志

卷之十一

文章

十七

二百餘篇集爲四卷曰百合山房詩集

徐極字維建號毅亭淑嘉之長子也幼沉潛流覽經籍不待訓督一動一靜必循理法比長學識日富尤工書法練達世務淑嘉蒞廣西羅城地僻俗悍諸籍極爲倚辦其在澄州時亦如之年至六十三而卒長子文柳邑庠生幼子而發由直隸天津縣陞河間府司馬雍正十三年極以子貴勅贈文林郎乾隆元年一加贈奉政大夫

宋曰者嗜古博學淡然於世故惟以讀書爲樂
所著有留雲堂集古詩數百篇人多稱之
張竒勲善屬文章試冠軍抱大志以不遇故恣
情山水所著詩序有霍岑留稿行世書法尤妙
一時罕有其匹至今重之卒以明經終老且乏
嗣聞者莫不悼焉

周天垣邑庠生性孤介少時淹貫經史作文率
多竒字古調雖老宿猶畏之乃屢試棘闈不售
竟及身而絕

蒲圻縣志

卷之十一

文章

十六

程伊傳器度宏深事親孝撫孤姪如己子讀書
究濂洛務爲有本之學所構時藝皆沉蘊精嚴
邑侯佟公聘掌文衡後復延爲義學師其徒皆
成佳士將歲薦而歿士林憾其不售捐貲梓其
文

李闢地少以文章名每試冠軍食餼于郡朱孝
廉稱其著述動盪變化機杼新竒身爲三世師
子伍登賢書孫列膠庠

熊毓南性沉靜嗜讀弱冠冠諸生聲名籍甚過

失意事以詩酒寄之與弟壽南有兄猶弟狂之
號乾隆元年恩貢年八十一卒

熊必俊邑庠生幼嗜書苦不得舉于鄉怡情山
水發爲詩歌一時往來贈答者甚多

補遺

王文友字三益性和易永樂甲午登賢書司鐸
峩省教諸生有法督學使者重之才學克贍蜀
誌多裁其手

王文修字三省少不理家務篤志好學正統六
年中鄉試授四川涪州學訓暮年以疾歸教訓
子弟鄉閭皆慕其德

武功列傳

明

汪清世居新溪太祖既平陳友諒清首謁轅門
委質弗貳扈從征討累立戰功進階明威將軍
後以事改觀海衛指揮姪旻及孫迥元孫鏞襲
蔭

但應隆國初以功擢指揮後繇北平從高皇帝
征陳友諒于鄱陽湖有功因敘功不及格遂逃

山中如介之推故事人之論定御史羅洪題請

蒲圻縣志

卷之十一

武功

拜武德將軍洪有贊曰天威赫赫統屬羣心載
剿亂賊雲集于征神武張皇掃境清明惟公抗
志不久宦名懋賞其功武德將軍

漆永受洪武二十四年謫戍梧州永樂四年英
國公張輔征交趾永受時從指揮王諒千戶姚
真進攻黃江身先士衆敗之于鹹子關又敗之
于平海口七年從征清化擒敵首簡定于美良
縣欽授交州中衛千戶後于慈廉廣威二州節
建奇功宣德四年調征乂安亡于陣弟永奉襲

蔭仍守梧州姪景訓學溪

劉鐸字振遠父志清沒于陣鐸年甫十四慨然與衆泣別有馬都鬪者奇其狀貌畱置記室初入武昌左衛前所軍天順元年從元戎楊公征銅鼓五開等處苗賊有功授小旗又從元戎李公征交洞城步苗賊陞總旗天順九年奉勅令以前征東苗功陞百戶成化元年復征兩廣等賊陞副千戶授武畧將軍次年征荆襄倡亂流民陞正千戶成化十二年復征靖州八寨欽陞

指揮僉事加陞明威將軍弘治六年鎮遠侯顧公溥檄征貴州叛苗陞指揮同知加封安遠將軍世襲武昌左衛鐸雖從事武功而篤好文墨有敦詩說禮之風手不釋卷晚居山軒精于黃老之學壽九十七無疾而終孫閑襲職

余開衡字衡山體貌魁岸性軒豁亢爽雅尚氣誼少同弟今銓部學舉子業不肯竟學輒棄去好擊劍以齊力技勇冠邑中嘗與武生侯定國角技野外定國以命中勝開衡以擊刺勝七年

秋直指按蒲以寇氛震隣閱武衆推衡以雙刀
試直指公善之欲薦授之官以嚴親命不赴崇
禎癸未獻賊破楚會城分掠郡邑邑令曾公栻
練忠勇百有餘人及煙兵千人爲城守計屬開
衡與定國督之六月二十四日賊以輕騎百人
爲探哨曾令命侯定國射之摧其前鋒衡領衆
兵追躡賊急反騎殊死鬪開衡持短刀大呼賊
鋒大挫先是曾令申請上臺命何副將鎮蒲至
七月十二日賊大衆壓境曾令將阻河與戰官
其義烈子歟楚邑庠生

兵反走開衡被重傷幾絕後撫軍列名上之嘉
侯定國字正君邑武庠生性孝友沈毅多權智
少善騎射好讀史傳星輿韜畧之書明崇禎己
卯以其技試兵巡使者首拔之累舉不第嘗張
幕野外習其技堵列而觀者嘆羨忘歸每憤惋
時事輒太息泣下癸未春獻賊破蘄黃邑令曾
公栻募鄉兵爲守禦計簡定國與余開衡率練
之又請募兵千餘叻泚守及賊破會城屬邑風

靡獨曾令傳檄討賊稱忠勇萬人六月二十四
賊遣偵騎百餘走間道奄至河北拏船欲渡曾
令命定國隔河發三矢貫前騎二人賊驚遁至
七月十二日賊大衆壓境曾令將阻河與戰官
兵先走定國與開衡同時被創撫軍以曾杌死
事聞定國列名疏中及

國朝順治甲午經畧洪公承疇督大軍駐楚聞定
國名召置水師鎮叅謀尋病歸卒知者咸惋惜
之子于周邑庠生以文行稱

國朝

張時麟字季昭書之季子精武藝萬曆癸卯以
錦衣衛籍中順天京衛武舉又中乙巳會試授
密雲道中軍守備陞京營巡捕都司又陞真定
左營遊擊鮎灸關叅將屢有戰功以偏帥失利
降山東都司僉書順治元年投誠加陞二級都
司同知年七十餘以壽終子昇以鑿儀衛旗籍
中山東戊子武舉

李侍義門珉之裔世居樓下爲人沉靜有智畧

崇禎癸未獻賊破會城圍練總勇爲保境計及賊入蒲堵禦有法一方以全乙酉闖賊來焚殺無虛日侍率鄉勇逆戰于大田畝賊潰走生擒數人賊追及花路亭侍礮示之賊反屯黃茅山楊林等處侍討劫其營發伏截其要路賊驚散遂屯新溪渡臨湘河而南自是邑西南隅無賊害嘉沔湘之民避賊洪山者得室家完皆侍之力撫鎮聞其名屢聘不就年七十五卒子世紀饒郡庠世奇孫正箕俱邑庠

馬際昌崇禎庚午武舉初授巡撫軍前贊畫後撫軍盧公象昇疏薦云智謀沉靜氣度優閑有儒將風尋擢中軍叅將署副將事乙酉左鎮擁兵謀廢立脅之南下不從竟遇害

馬天將明末人之鵬之祖性豪宕不羈家世以科名顯天將獨慷慨從戎值東萊白蓮盜起經畧游招致幕下所上方畧切中機宜渠魁授首脅從解散薦授登萊守備遷粵東遊擊子際昌際盛俱以武功顯

馬際盛明末人少曾傭于人狀貌驍勇天將乃
鞠爲子從兄際昌軍中撫軍何騰蛟一見大噐
之授贊畫先是際昌爲叅戎晉中軍及陞去何
卽以際盛代其職後隨何視師閩中有殊功擢
掛印總兵益感激矢死報國會戰猝遇困寡援
絕餉軍士疲饑際盛激以義二千餘人無一怨
畔者或脅之降際盛怒髮裂眦大詈曰汝不聞
奉撫軍令招散卒殉難于鄂郡金牛大冶之間
者乃吾兄際昌乎屈志醜顏生不如死遂殉難

南楚西粵及閩中俱立忠臣廟祀之

王武臣字筦庵以武舉爲內院幕順治中薦署
安化令有聲尋擢遊擊陞任居庸生平儼不
羣有吳越菜根戎郊刼夢二集慷慨悲壯讀者
偉其爲人過闕里錄聖賢贊摹聖像以歸刻之
板以志欽慕焉

但尅卿字蓋臣其先世以武功起家至尅卿少
孤與其弟超卿起卿互相友愛及長奮志王事
初值甲寅吳醜騷動依左營把總王某征洞庭

得功授守備旋從萬提督征福建廈門等處奏捷授懷遠將軍甲子正月朔以疾卒於燕邸

宋長春事母以孝稱性倜儻從軍岳州隨征吳逆授大噐把總舟次蘆蓆口賊以椿植水中堅不可拔春入水連拔數十旋用火焚賊船岳州平從提督萬入閩配船入洋克復南日等處直抵廈門功上授都督僉事管西安州遊擊事捐俸入義學教軍民子弟獲大盜金維正等寘之法陞紫金關叅將晉雲與右協副總統叅將李

達等擒逆苗陸尚賢將卒欲盡誅餘黨春日彼旣歸誠苗民郎吾民也何多殺爲由是廣南患悉平以積勞染瘴年五十七卒子如璟任山西雁門關守禦後改授浙江昌國營守備

項楷字玉軒于順治初年平雲貴有功改授陸涼州牧後以母年九十乞歸養

傅奇俊號南竹幼習韜畧膽識膂力倜儻不羣癸丑甲寅吳逆叛滇孫逆叛粵洞庭南北干戈相尋奇俊摧鋒陷陣所向披靡有疾復房縣功

冊衛守備及進勦白河上津等處皆戰勝又勦西蜀恢復巫山川東題補廣西左江鎮前營守備甲子歲前征西蜀敘議優加二等爲都司僉書隨移湖南永州遊擊卒時年七十長子得勝官南贛鎮中軍遊擊亦以年六十有六致仕

補遺

劉錫乾字從甫號昇寰安遠將軍鐸五世孫萬曆間人也幼穎異好勇而能文廕武昌左衛指揮四歷漕運乃特授貴州銅仁守備時苗賊叛蒲圻縣志

乾單騎赴之一日斬首級并生擒不下百餘陞四川松潘遊擊萬曆四十六年特陞廣東叅軍將孫寧國襲前職遇李寇破楚致身死難



端方列傳

宋

任獻夫字安世縣北長澥人登政和八年嘉王榜進士及第爲人溫厚淳雅若不能言而中抱淵實立志甚遠大爲文冲澹平易不甚求異于衆而理致精密人自不能及娶南嘉李宗儀季女終其身夫婦相敬如賓有龐德公之風仕歷荆門刑曹著有異績民懷其惠

祀鄉賢

明

蒲圻縣志

卷之十一

端方

田賦字信立性通敏熟知典故洪武初應求賢詔授知諸暨縣有惠政民懷思之後以事左遷祥符簿歷一考休告歸養恬自樂人多稱之

王德原字克明性行純篤精于藝能洪武十三年舉聰明正直授知招遠縣再調丹陽勞績用熙

余恭字尚欽孝婦戴氏子也先是恭大母阮邁危疾將革恭母戴焚香告天請以身代割左臂肉煮糜以進姑食之霍然色起戴生五子恭以



詩經中永樂丁酉鄉試上春官不第入太學時
朝廷營大工選太學生有幹具者分遣督役恭
于役浙江力圖報稱不苟一介以傷名義邑侯
嚴重之因豎忠孝坊以旌其母子至今傳爲忠
孝坊云至五世孫曰鶴曰宸補庠生有聲曰宗
中天啟甲子鄉試曾孫開熙順治乙未進士

王貴高字明遠邑庠生左春坊左中允之姪也
應永樂二十年辟舉授四川成都府經歷陞義
眉縣知縣勸農興學士民賴之辭政歸里葛巾
藜杖日與二三知己山水自適長子禎次子祥
俱庠生

黃城字孟高合肥教諭煜之子以詩經中永樂
癸卯鄉試爲富順訓弟墀以禮記同年中式爲
內江諭皆好古力行綽有父風俱見四川名宦
志城嘗遺墀書曰先人諭合肥清操自勵吾輩
讀父書俱得爲諸生師表不墜家法足矣此外
何侈望焉各棄官歸城守清白歸橐蕭然時釣
于邑南之河干里人傳爲黃城埠潭子玆登成

化乙未進士官至大理寺丞

徐思賢字從哲以正統十二年選貢任廣西蒼梧縣知縣居官有廉介聲林下醇謹人敬仰之壽九十五以期頤稱六世孫鳴玉中萬曆己酉鄉試官至貴陽司理鳴玉姪淑嘉中順治辛丑進士現任廣西羅城令

但存學字宗儒成化二十二年中鄉試第二人授四川敘州府推官持已端恪禮士恤民痛斥舞文屢辨疑獄及陟判重慶值采木之役僉舉蒲圻縣志

卷之十一

端方

三

以任存學躬歷險阻采入松喬葬落調度有方民咸德之

鄭宗仁字純夫大父潮海精岐黃術賣藥多不計直值歲大疫所全活甚衆宗仁爲其家孫中弘治壬子鄉試爲建安知縣復補鄞都弟宗儒中甲子鄉試爲鎮江府通判兄弟郡縣俱有政聲俱年未五十致仕宗仁子琳贈臨淮知縣子理字仲鳴中正德己卯鄉試才名橫視一世高遷不仕參太史推重之孫之亮中嘉靖甲子鄉試

宮至苑馬寺少卿撰有繼疏傳言厥祖兄弟能繼疏廣疏受之勇退也

馬文獻字世徵崖州別駕駿之孫蚤穎慧稍長淹博聲隆隆諸生間每試輒冠軍初名敷督學奇其文因更今名敷奇不第以詩經應弘治七年貢授彭山司訓旋以外艱起復補瑞州郡庠兩地所識拔士上賢書春官者接踵恬退引去居家優遊嘯詠非公事未嘗一造請里中稱爲長者子練登嘉靖八年羅洪先榜進士贈南京

戶部主事孫之猷曾孫天錦淑昌俱以科第顯傳卿字獻卿福建莆田籍本縣人登嘉靖甲辰進士歷官南京戶部主事轉員外郎楚臺檄邑令李公桂爲公鑿坊因歲屢稔未果爲人坦介不阿其于梓里誼極篤凡解糧白下者公爲之周旋無不戴德陞廣西僉事丁艱歸哀毀踰禮以至孝稱壯年掛冠當事者力爲勸駕堅臥不就子姓居莆田仙遊英才接武在蒲者多斤斤自好署縣同知葉文懋旌表其門裔孫庠生鼎

新博學多才屢舉不遇識者傷之

張東周字子川嘉靖丁未進士授刑部主事先是臺中有許福疑獄歲餘不能決公命胥吏繕寫其從前積案窮四日夜勘得其情全活甚衆世宗大悅書名屏左陞禮部主客司員外郎提督四譯館上疏言崇正學等七事而分宜以賄冊一富藩東周力爭分宜深銜之出僉滇憲兵備普安緬甸恬息以積忤權璫謫潼州倅著勤力榜數條吏畏民安州人頌之居一年卒于官

子諧中萬曆丙子鄉試子謨以例貢任湖州照磨孫于階中萬曆甲午鄉試孫于陞中萬曆癸卯鄉試

祀鄉賢

張于階號八溟雲南僉事東周之孫湖州照磨謨之嗣子謨病于階衣不解帶者三月撫愛庶弟若出同胞萬曆甲午中鄉試有署篆君羅一族人于獄階知其冤申救之一日七牘得釋乃止才情磊落與弟于陞以文學競爽年僅二十九卒

龔良衡字起莘御史晟之孫嗜學工文補諸生
十試弗第以嘉靖二十一年歲貢補浙江嚴州
府訓導一時篤古之士爭嚮慕之相與質經讐
史弗輟一日動念湖山告假歸士紳咸祖道嚴
陵臺賦詩以華其行

袁壁字輝東父慶有潛德俶儻好施一鄉歸心
焉壁以嘉靖三十五年歲薦爲英山司訓課文
講稅督率士類有成卒于官英人士多爲之經
紀其喪扶觀歸甚哀之壁性伉直無所阿且開

示人必盡其誠士故多服焉弟盛有至性盛子
昭文中萬曆辛卯鄉試壁教誨之力爲多云
馬之猊字威如河南太守練之子弱冠舉嘉靖
甲子鄉試後授知養利州申明禮法上司束手
舊有藥魚有鴨市有官畜牛馬歲收利官得多
金之猊悉罷之土產多異品亦不問其清正類
如此未幾以丁艱去起補茂州州軍倍于民牧
兼監軍餉因著包封事宜刻之以爲每封多一
分則軍受一分之利諸軍感悅居年餘每不能

媚監司意值安撫爭封監司意有所屬之覘執
例不聽左遷齊邸歸性至孝每逢先人忌辰行
禮畢猶泣下沾襟年八十三卒著有居業錄粹
白堂集

魏正恭字汝敬樂安令滋之子長厚好義解衣
推食以急宗黨以嘉靖四十三年貢爲長興丞
督糧理鹽毫不苟取擢資陽縣有善政清操自
勵卒于官子桂中萬曆丙子應天鄉試

邱岡字鳴鳳博學多聞累舉不第以嘉靖四十

五年歲薦爲魯山教諭在官清約自守往往進
諸生陳說經義多所興起未幾致仕歸居家篤
義好施父所遺產恒以周急厚貲半散置祭田
立家約教子有方性寧澹質素不嫻趨謁徜徉
河干吟咏瀟洒以壽終子六人皆庠生各治一
經日之櫛以萬曆二十四年貢爲項城教諭造士
設教不渝父志日之梗好義有父風每節縮衣
食以贍族黨毫無德色今子姓濟濟繼其家學
云

魏正叅字汝三樂安令法之子以隆慶元年貢
爲吳縣丞日了公事卽與文士張幼于王百穀
詩酒倡和數月致仕歸行李蕭然吳李石麓徐
存齋諸大老贈有少雲篇及去思圖詠居身端
謹敦族睦隣與物無忤足不履縣廷督學副使
金學曾旌異之仲子科字冲完醇厚灑脫表率
族里人多服從科子珩如中萬曆辛丑進士官
翰林檢討贈父如其官

熊萬仞字立卿其先在宋名時昭者自洪州遷

蒲之義豐其後愷舉元天曆二年鄉試第四人
萬仞天資穎邁讀書一覽輒記明隆慶庚午領
鄉薦萬曆癸未會試已註名四百人中時江陵
當國以銓選未通汰去五十人適當其數凡八
上春官不第壬辰授知樂安有惠政西江人士
迄今思之里居一籃輿往來族黨間觴詠自娛
邑令倪公禹同汪公雪艇雅重其品誼焉子孫
以文學世其家

龔棹字時發廣州通判良猷之孫也中隆慶庚

午鄉試任東鄉知縣有要津冤害良民者棹聽斷一無所避後補樂安遷淮安府通判卒
魏旌字上甫樂安令法之孫資陽令正恭長子以恩貢入太學中萬曆丙子應天鄉試任隆昌令調通江有惠政爲人孝友溫恭不苟取與雖童稚僕隸亦婉容待之邑中稱爲長者與鄉賓筵者十四有司莫不欲得之以光鉅典徐撫院兆魁下檄講聖諭特令主盟年七十卒

余登字懋庸中萬曆丙子鄉試鎮靜自守不妄通刺謁嘗署其家云不說人情鄉里須當相諒但存天理鬼神豈得無知邑大夫敬重焉爲廣平諭署縣事者風力聲民畏憚之卒于官

王進臣字東洪義眉知縣貴高之元孫也幼穎悟博極羣籍尤精于易理一時名士多出其門
萬曆十七年歲貢授桃源縣訓導力行勸士雖祁寒暑雨不輟後轉石門教諭吏部江公深蘿以詩餞之有洞口晴光催去騎石門山色引仙旌之句任石門六年力行勸士如初致仕歸

里方正自持閨門之禮肅若朝廷子弟不衣冠
不敢見著有易乘仙源集行世子樹屏樹德樹
石俱邑庠生

魏彬如號似川山西憲副裳之仲子兄樸如爲
激江守進階雲南憲副彬如雖累世簪紱瀟洒
恢諧無貴介氣性嗜古讀先大人藏書編纂凡
若干帙事繼母鄧以孝聞復精岐黃術歲買藥
數十金全活甚衆爲諸生應試武昌族叔祛患
病亟買舟送歸躬侍藥餌得愈後始冒風濤就

試其篤義類如此屢蹶場屋不第以萬曆二十
年貢爲衡州府耒陽縣教諭先是耒陽科第寂
寥彬如精形家言爲改遷學宮繇是人文蔚起
時子說舉戊戌進士授南直都水司主事彬及
元配錢氏俱卒于耒陽學署士人無不哀思之
後以子說誥贈戶部侍郎

任經世字達生文品馴雅恒肆力于古每試輒
首錄與弟經邦相勗勉廩餼與共之明萬曆己
酉中鄉試十一名制墨盛行生平不問家人業

有緩急則驚產以應爲孝廉數年居然寒素諸
重溫良鄉里稱之未仕卒子熙聯舉康熙元年
恩貢

徐鳴玉字振之一字崑璞明成化時蒼梧令思
賢父方憲始徙蒲邑自思賢以明經爲縣令代
有文人玉父謨尤博學多聞兩中副榜數奇未
第課子鳴玉鳴瑞鳴珍鳴琪俱有聲庠校鳴玉
以詩經中萬曆己酉鄉試初任福建長樂知縣
清介不取斷事嚴明吏畏民懷未暮年丁父艱

服闋遷貴州貴陽府司李屢平冤獄臺司推重
焉時有劇賊猖獗玉同太守剿除之郡內肅然
任三年陞陝西臨洮府通判尋致仕杜門自守
不妄通晉謁年六十六卒

馬天銘字新生武寧令介之仲子也兄天錦中
萬曆乙未科進士官至兵部少司馬天銘八歲
失怙穎異夙成司馬公篤愛之比長隨司馬公
官閩中興化司理日與名士林公贊輩爲文字
交名動一時後遊太學聲稱益著司馬公氣骨

麟岫人望之如秋霜夏日公嘗以和平濟之司
馬公蚤世公送往事居分甘茹淡泊如也魏司
徒肖生嘗謂公季子曰君家友于無間言伯公
爲其易尊公爲其難其處家庭也如是至于族
黨則憂人憂樂人樂時岐黃家有向姓者將死
懼幼子見侵強暴以五十金爲託公爲卯翼畢
婚原封還之何外之宦鄱陽拙直賈罪公扁舟
千里周旋危困其與人多類此自好家居于人
物臧否才流高下民生苦樂時政得失嘗厘心

焉每見少年篤學者輒汲汲揚詡不倦集邑中
諸名士與諸子樽酒論文交相切劘以故諸子
皆表表文場不媿司馬公阿咸長子世昌數奇
蚤歿季子淑昌中順治壬辰科進士公以崇禎
乙亥歲考終祔塋武寧公墓以季君令河南商
水贈文林郎

劉光輝字大者號八柱先祖慶以孝聞祖母魏
以節聞載蒲舊志父時敬庠生謹儀教子顧都
諫其仁有祥發過庭之贈大者苦志篤學屢試

冠軍設教蒲湘聘金蓋歸父所不有私財弟庠
生光煒年踰強仕未有嗣息爲置側室生子來
暹在泮有聲自置田廬與弟共之九入棘闈不
售拜泰昌元年恩選初任松江華亭縣主簿水
利則開河成績巡鹽則足國無私齎餉三吳何
尚書喬遠有漆園柱下之句講諭兩浙丁尚書
賓有仙吏清風之詩孫澗黃浦解害冤獄耿介
自持苞苴不行叅軍黔衛攝篆涪潭一童一騎
扶義除苛以不媚當道遂掛冠歸士民泣畱碑

亭賦別蕭方伯丁泰贈云廉吏心湛聖水白甘
思淚苦鷓鴣啼著有桃花園稿蒲志闕編壽六
十九卒子來遠郡庠生著南北二京賦來庭庠
生孫開輟庠生有文名曾孫丹仙丹月丹濟皆
能爲文 本傳劉肇國撰

鄧日芳字茂叔士望之子弱冠隨父任達州父
卒于官日芳間關重趼昇櫬歸里苦志讀書手
輯四書詩經講義積百餘卷所錄他書復畧相
等平生寡言笑重然諾嚴取與文章德行並推

里閉邑令吳公可先特器重之中天啟丁卯鄉
試明末縉紳勢焰方張獨日芳杜門掃軌淡泊
自甘半刺不入公門兄日華早世嫂魏氏年甫
二十餘孀居日芳經理其田產差徭俾贍養無
缺嫁其遺女表其節于南司後魏氏年至八十
以壽終叔士亮任馬湖太守暴卒于蜀中家貲
頗厚值繼嗣未定族人剖其貲產據而有之日
芳毫無染指有以利相啖者答曰此等事余不
忍聞也其耿介之性大率類此三上公車不第

蒲圻縣志

卷之十一

端方

十四

卒年四十八子之奇孫宗彥俱邑庠生

補遺

明王瑩字潤之美如劉玉年十九領鄉薦春闈
七試不第乃就銓刑部司務快不滿志爲舉子
時急于蘓民困屢與長吏爭論政至忿怒不辭
而出家居好友恭讓居位一月政事明敏銓宰
竒其狀并重其才欲易爲吏部瑩知而辭曰惟
天子命有官斯守豈可有去就也會有犯大獄
者中官利其金求出之瑩曰此首可斷此律不

可易也方六月病卒

明王璽字奇之貌奇縉體度罄如領鄉薦南宮
不第通判濟南府有才望復監益州稅厰閣臣
萬諷以賂當爲徙美官璽曰此豈賢者所爲抑
豈吾家訓也遂拂衣歸

行誼列傳

明

戴思明上三都人性篤孝洪武初父祥遭虎吻
思明聞之奔赴于野手扼虎吭虎死祥乃復甦
劉慶字善餘母葉氏病劇諸醫望之却走慶剖
股躬侍三月母痊又十年邑人大學士魏觀贈
以詩有剖股刀前血捨身膝下情之句

廖崇信字德恒宋學士明畧之後父均用有高
義廣施濟邑人德之崇信幼學葩經洪武中貢

蒲圻縣志

卷之十一

行誼

入太學選武功衛經歷永樂靖難調雲南景東
諭少汶哀毀踰禮服闋補任之滇扶母偕室嘉
奩李氏步行萬里餘時驛郵遣騎迓之却而弗
乘日夕供膳極其孝養後歸母沒廬墓終其身
子清孫傳佐俊俱中鄉試

黃宗榮御史珰之孫性至孝母盲每日舐其目
遂復明母嗜猪肝每飯必致無缺薦紳高之子
祐禱俱有行壽九十五卒

饒承教萬曆中人庠生若驥父也未事詩書母

病奉藥物不愈乃割股作羹以進母啖之尋愈
後承教妻病子若驥若騮亦割股作羹以進母
病亦尋瘳父子兄弟皆具至性署篆同知葉文
懋題孝萃一門額旌之

彭楚書十八都上里人生五月而孤其母艱辛
育之稍長傭力以食其母崇禎庚午歲母病篤
聞人言割股可以起母割其左乳肉進母食之
遂愈書固無恙邑侯林增志旌之

國朝

蒲圻縣志

卷之十一

行誼

二

賀世麟字景瑗性淳謹年十二補邑庠生旋薄
時執博古講學母錢氏病篤嘗糞割股以憂卒

元

廖均用宋端明殿學士明畧之裔也父昇三卜
塋于邑之楂林均用負土成墳手植異松陰森
秀茂歲時風鳴迴掃若鬼神護呵元末避亂南
山散財饗士鄉民賴以全活躬耕南山下儲穀
至二十萬石值歲大旱有司勸賑均用盡發所
儲崇咸嘉蒲四邑咸取濟焉粒米未償于崇信

以貢補武衛經歷孫清中鄉試孫漢登進士曾
孫傳佐俊俱中鄉試曾孫道南中會魁官侍講
學士 本傳

明

李玘世居樓下其先自宋寧宗母黨封雍王者
徙居于此玘敦孝義與弟瑞創立家規廣置義
田子孫七世同居成化中旌表其門今大孤橋
有李雍王墓大濟寺側有李夫人墓 載一統志

李興賢字廷賓中弘治甲子鄉試先是天順三

蒲圻縣志

卷之十一

行誼

三

年大旱父仲高出銀穀各萬濟之所全活甚衆
興賢事庶母甚謹慕義門鄭氏貲富族大誓不
分析衣食自甘粗惡每飲食集一堂長少男女
各爲席親戚鄉里有婚葬不能舉者助之正德
四年大旱以舟載穀分濟親友有鄉官以疾卒
一子病且貧無以爲歛興賢在八十里外以曾
受業聞訃合諸友具衣冠歛之其仗義如此未
仕卒

何珍字承聘號天石鎮南知州燭之七代孫白

澹之孫震至珍父庠生文質子姓干指同居五世珍以嘉靖三十七年貢初訓餘杭轉武康教諭文行爲諸生所宗年五十九致仕湖州別駕王育仁書清風高尚旌之爲人朴直家無擔石之儲淡然自適吟詠終日壽七十八以子思登兩膺褒封

魏正中法長子淳朴真簡蔬食布衣吟詠自得父分產則辭附郭良田受僻壤數十畝混跡樵牧親農桑嘗自題其舍云只如此也罷要怎麼

是好真如古人知止知足意云以隱德推重有司屢舉鄉賓不就子表中鄉試孫累貴顯曾孫詡有祖風爲庠生讀書外若不解一事者人稱爲羲皇上人

魏正時字汝行隣水令溶之子爲人任俠有氣節性好施予慕魯朱家原巨先之風趨人之急甚已之私二弟正蒙正初皆不任家事正時治產三十餘年一錢尺帛不已有也勉弟正初力學中式正初艱舉子後舉子而母亡正時命已

妾棄其女以哺之曰吾弟久商瞿憂抱子始今日吾何愛一女哉天性篤義可概見云
魏襄樂安令法之孫蚤失父與弟褻甚相友愛里中大饑道瑾相望襄授食掩骼竭力所至鄭伯讓負京紙若干襄兩代償之義聲載道舉鄉賓子登如有父風

魏翼如字進可樂安令法曾孫嘉靖甲午鄉貢表之子隆慶中例貢性簡嚴無假貸不能容惡每面折人過鄉里畏憚之然篤于族黨交遊敦

義好施仲父有誣以殺人沉獄者貧不能自免爲鬻產求脫于仇家又友有謁選不能具行資亦爲割腴田售人得金貸之始得治裝已而焚券族人困于徭役欲割產他有所造請翼如憂念不置會子詔領鄉薦率詣縣庭請蠲之尤方介無所依阿萬曆中南嘉方司馬逢時與爲姻戚攝冢宰正應謁選時也司馬貽書勸之仕辭之有說以乘時者竟不往人以此高之年七十去卒子詔萬曆丁未進士官江西按察司副使

翼如贈子官 祀鄉賢

鄧廷珮號亞泉食餼數十年臨貢不仕樂施予鄰有鬻婦償稅者廷珮捐金代償之全其婦年歉施粥貴糴賤糶凡可行義者多爲之子士亮舉萬曆辛卯鄉試官至四川分巡上川南道孫日崇中乙卯鄉試官贛州府司理曾孫之梅中崇禎庚午鄉試以子亮贈肇慶府推官

徐邦巡字豫郎號古愚少聰慧淹洽經史行文豪邁天性孝友外祖司徒謝公鵬舉器愛之未

冠補邑庠生聯中庚子癸卯科副榜屢錄觀光不售惋者久之忽夜夢神人與語云汝年未三

十吾暫靳汝科名以綿爾算光大門閥在汝後人未幾感月華之祥生子爲梅喜曰吾後世必有達者茲其兆已孫美大果以康熙己酉舉鄉試庚戌登進士諸子孫日益俊茂並光祖澤焉巡胞兄邦和庶兄邦錄俱生而穎異五歲就塾便工屬對師命和曰人行四方天井卽應聲曰我步萬里雲程又命錄曰弟手拍兄肩亦應

聲曰臣足加帝腹諸如此類勿可枚舉四書五
經一讀而通邑侯王公之傑彙其著作以神童
舉疏未上而殤今徐氏後昆類多俊穎云

本傳
祝昌

謝師古字我思號尚友蒲逸叟也遵司馬司徒
公清白家訓不事貨殖以故家日落然柱門却
掃雖晨炊竈冷晏如也早歲習博士家言可芥
拾青紫竟騰然蟬蛻尤工于詩非漢魏以上不
道誅茅剪棘結廬澤畔日偕其仲子紫山讀書

作賦其中倦則垂絲把釣貫村膠自適去城五
里許經歲裹足市廛卽左右居人罕見其面嘗
自言曰明月穿窗白雲撲地好鳥來庭開花夫
位可主可賓何寤何寐浩然無營懷葛之意三
復斯言可知公之槩矣公每謂紫山曰我生平
不喜見要人第以子之才他日必踵武先賢繼
兩中丞公大我門戶然須作好官毋徒爲富貴
地美田宅以累子孫吾雖老不及見以此告我
地下亦一段佳話年六十有奇正坐整衣冠而

逝仲子胤璜中崇禎己卯鄉試兩任邑令有政聲季子胤琮孫元韜邑庠

龔逢壁字楚白承父檉之訓與邑鉅公相砥礪然數奇弗遇慷慨自喜戚黨中有貧不克振者必恤之亦不樂有惠物名晚歲益頽然自放每遇知己酣適後狂叫絕倒依稀阮遺風邑林太史增志誄詞有繼酒人而傲義黃之語亦足見其生平己子維三登天啟甲子鄉薦季子維八中崇禎壬午副榜孫璋中康熙壬子鄉試其

後讀書者藉藉有聲人以爲力學賁志之報云雷驚號百里少精經義能文章不遇刻意庭訓集古聖賢性理微言及名臣經濟事蹟成帙課諸子不營生產輕財好施勉人爲善多指報施往事相勗聞者悚勸持身端謹宗黨無間言年八十終子動龍邑庠御龍字髻望崇禎乙亥拔貢

國朝考選通判歷佐大名保寧郡署府州縣篆所至多循績今任鳳陽郡丞孫豫聲霖聞閩閩

邑庠以文行著克述先志

黃門相號龍躍其先豫章籍山谷先生之後家于豐城縣之雪家渡累世有顯人至明末猶然來蒲爲封公始祖者則黃子曙也以友諒作逆鄱陽于洪武三年避亂居蒲新店三世遷封公一支于蒲今之鳳山驛其時非驛也六世讓其宅爲驛而自居于城內之舊驛八世萬曆庚辰封公生至甲辰冢君中適生封公厭市喧雜且庠塾囂咻難以課子遂遷官田之鄉庄同鄭孺

人出入耕鑿僮僕數十指荒田百畝瓦屋三間家食粗給其時冢君甫十齡餘子生者襤褸而封公知冢君之可與有成也質衣拜師節食餽餉故冢君年方志學嘖嘖有聲升黌戊辰遂膺崇禎里選而封公志未歷也曰汝年方弱冠豈盛年嫁青樓乎後事方新耳冢君亦體封公志茹壑不輟卷丙子舉于鄉而封公乃少宴也析諸子食日夕惟徭徭鄉市親黨間皂帽青衫革鞵布襪或旬日不返或朝出暮還步趾一履而

已冢君整鞍以待乘未半里卽叱返曰凡此里道皆我親知共者一遇于陵谷阡陌之際彼不得避我不得下中心忡忡汗出大苦難耳癸未秋獻逆蹂縣所過腥聞封公抱恙居鄉不克同冢君徙遠賊渠魁至門戒其徒不得入室問冢君子僕僕曰往南山賊悵然曰今正糾旅搜南山汝主驚矣可奈何復問封公孺人僕曰在家問年壽幾何僕曰俱八十賊怡然曰高壽且云我雖作此行徑甚知好友你家素好人也往返

五日與僮僕作禮而過其年八月封公逝鄭孺人孤幃弄孫孀居十九年辛丑逝合塋本縣橫崗石馬壠之唐山是年冢君已筮仕蜀之鹽亭矣後除服補秦之朝邑封公以子爵贈文林郎孺人封太孺人

本傳出家乘

龔木字軫野邑庠生御史晟曾孫副使良傳之孫霸州同知乾瑞之中子累世簪纓安貧樂善布衣蔬食晝之所爲夜必焚香告天子逢周庠生次子逢烈總角泮遊屢試冠軍中副榜三次

不第以恩貢考選知縣自呈改授華容教諭甫
一年休致蓋襲公隱德焉

龔逢旦字海曙邑庠生節婦余氏之嗣子也幼
負才名雅薄仕進嘗曰吾高曾祖叔代有冠裳
吾惟萱堂菽水所當承歡燕山義方所宜樂教
耳用是族黨稱之式穀爾似邑大夫高其行造
請鄉賓不赴輿論益推服焉次子維祚爲湖南
三學博士聲教奕奕人謂讀父書可矣然不足
酬公盛德也子姓振振後當益大云

蒲圻縣志

卷之十一

行誼

十一

但仕字汝季爲邑諸生嘗拾遺金于塗必俟其
人還故處畀之其人願割半以謝辭弗受有醉
罵之者家人欲毆之仕弗許其人歸明日暴卒
仕得不波人謂厚德之報

國朝

余應瑞號五雲明鄉貢進士余恭三裔其大父
尚志惇樞愷悌好行其德父實嘗施棺木草履
以濟貧獨遠近懷之應瑞率祖攸行救災恤患
恒爲人排難解紛而無所取有魯仲連陳仲弓

之高致無論疏戚咸欽仰之性至孝事二人曲盡色養撫孤姪如已出爲之婚娶俾得成立初爲邑掾史將入京謁選乃奮然曰吾安必以刀筆吏干升斗之祿哉遂棄去念先後世有名達惓惓以教子爲務開西塾延待名儒兢兢篤誨一切佻達之輩屏勿與通以故家聲克振文學彬彬年六十餘以壽終仲子開熙中順治乙未科進士見任吏部文選司郎中季子開然孫殿楚適楚宣楚俱補邑弟子員有聲稱望族焉本傳

蒲圻縣志

卷之十一

行誼

十三

沈以
巖撰

張拱壁字正陽自幼失怙母劉氏耄年多疾壁竭力侍奉雖厠隤必躬承歷數十年如一日里中以純孝稱爲人端方誠懇規模弘遠尤勤教子禮聘名師擇邑中佳兒與共筆硯凡同學子弟與其子先後掇科名者甚衆至好善樂施尤其天性不能娶者助以財不能殯者佐之觀或遇患難而不能理者嘗陰爲解救不令之知壬辰邑大旱流離載道次年穀價騰涌每石至二

兩有奇璧所積穀千餘石盡設糜粥餉飢人自
春徂夏三閱月遠近多以全活晚年嘗延羽流
誦皇經其惻狀惟云以報親恩匪邀福也將終
之前一歲聞形家言母坐未安晨夕憂惶促諸
子姪覓堪輿卜吉改遷備塋禮如初曰吾藉是
可以瞑目矣璧生二十誠孝篤行大槩如此年七
十以壽終伯子瑾光中己亥科進士仲子瑜光
季子璉光俱以學行著于庠孫達仔佶价位修
偉侔任佺有文名

徐鳴珍字席之黃陽司李鳴玉弟也性剛直樸
厚不事文飾幼懷大志勤學不倦與兄玉並有
聲庠校仁孝性成父謨性方嚴珍事之順意承
志未嘗稍違居父喪水漿不入口者六日母陳
孺人勸之食勉進糜粥少許三年內未嘗嬉笑
入室癸未秋母陳孺人病篤會流寇入城衆皆
奔竄珍獨侍母疾號泣不去賊執之告以故賊
衆惻然不忍加害居家嚴肅雖燕居閒處諸子
非冠帶不敢見篤誨二子未嘗一就外傅長子

淑亨補邑庠弟子員次子淑嘉中順治辛丑進士公淡然處之不以介意晚年閒放自適遇山水梵宇佳要處恒命一奚童隨之任意所往興盡而返有隱君子風年七十五以壽終

黃金莖號白峯少補邑弟子員性嚴毅持已甚正人不敢犯事父鬱林母魏氏壽俱九旬溫清無懈朝夕友愛兄弟出入追隨視童習如一日年三十餘卽棄業世外邑侯林太史增志折爲性命友未嘗隻字干謁惟篤意課子長君鳴陽蒲圻縣志

卷之十一

行誼

十四

中崇禎己卯鄉試訓誨益嚴著有月葢菴集年八十以壽終

張拱翼字念川蚤孤家貧棄書謀治生以貲稱里間性誠樸醇謹不逐時尚然好急公義樂施予遇危渡險徑輒捐數十百金倡修治之今邑西宣公堤畔瓦窰港橋其一也明崇禎庚辰大饑傾廩困治米若干石到門者輒賑給康熙中邑紳士舉翼耆德于公牘稱年近古稀不僅鄉黨之杖德超時尚居然懷葛之風雖子姓之飛

騰一塵不染真艸茅之隱逸衆善咸歸兩舉鄉
飲禮成邑令任書香山一老榜其門時論觀者
榮之康熙四年以疾卒任令君親製誄詞躬弔
焉年七十四歲子一人文光庠生孫達憲孺子
昌言俱庠生達兼達材達可達繼皆英俊蓋繩
繩未艾云 本傳沈以曦撰

朱維舉字四隅世居洪山明萬曆甲辰進士時
魁之叔也天性孝友豪爽好施身之所遇無不
畢獻其誠與姪時魁捐貲修復義田三百餘畝

蒲圻縣志

卷之十一

行誼

七

每歲入自輸公及蒸嘗而外族之冠婚有贈喪
殯有賻貧塾有賑迄崇禎末年荒亂相續里中
多待以舉火尤敦禮義崇文雅讀顏氏家訓至
老不倦自署其居曰積善種德之樓子時堯時
箎以文名郡庠長孫希若中康熙壬子鄉試姪
時克孫希珮俱庠生

任經邦字文生號梓林性嚴毅質直以孝友著
爲邑庠生與兄孝廉經世俱抱遠志互相切礪
淹博經史聲重執林數舉不第日惟子若孫是

訓身有紛難相叩者爲排解之晚好吟詠大雅
攸惟有松節集二十卷抑肆元禪之學修祖任
家橋建慈救閣增新南泉寺年八十二終于
人長熙典庠增生次熙聯康熙元年恩貢嗣由
父孝廉經世後次熙會官廣西奉議候補次明
礪熙舉俱庠生孫寧宦宮庠生

張大綱字伯常大性孝友督學王公志堅錄其
行達部云籲天起危父之疾捐金解叔弟之訟
戚里咸稱道之爲文沈厚有氣宇數受知于富

路年六十應順治丁酉歲薦恬然仕進陶情山水
每歲時展先墓涕泣如兒啼其至性有過人
者以壽終弟大綱大善大紀從綱學有聲庠中
子若孫俱邑庠從子若孫或庠或貢克繼書聲
張士達天性孝友遇從子族子如已出有無相
周慶弔必以禮克開家訓明季庚辰辛巳游飢
里中賴以舉火者幾百家癸未獻賦陷城掠四
鄉騾馬士達悉出所畜一境以全又捐金贖里
人石坤生丁刀鋸中順治丙戌丁亥壬辰癸巳

間豐遇奇荒捐貲如曩時施予不倦其高義有
過人者三舉鄉賓年九十終子暨孫居邑庠者
有文名

葛嶸字山榮幼讀書工文歷試未遇及壯好導
引術手植青松萬株旦夕吟詠其間儉取多與
排難釋紛時有公庭僕僕及俠少蕩遊者誠子
孫勿學惟力田讀書無墜世業由是子若孫胥
遵訓惟謹族里欽之儼對師模順治丁酉春舉
耆德贖稱生平孝友不媿二人言動剛方靡私
賓也子一名繼日孫五俱庠生

蒲圻縣志

卷之十一

行誼

七十六

一事宅心惟存忠恕課業不外詩書誠盛世嘉
龔逢顏字德愚御史晟之裔孫天性孝友規模
弘遠好賢重士有樽酒不空坐客常滿之意遇
人忿爭常以片言解息時論以蒼松古柏目之
累舉鄉耆謙讓不就自念先世家聲貴繩祖武
兢兢以課督子姓為務年六十有六乾揚如一
日子維公邑庠生孫玘庠廩生胤類冠振善慶

末敦云

熊賁來邑庠生肄業心山社二歲父喪事寡母
劉氏不遺餘力及母衰邁賁來亦且老溫清定
省常如孺慕邑令佟嘗過其齋與談竟日至不
忍去云

張文誨行誼過人父驟疾額天求代迨父死嘔
血數升友愛昆季垂老無間言人有急隨力周
濟爲族屬婚嫁喪葬者十餘人晚年藏書教子
三舉賓筵不就年八十二而終

龔瓊孝廉璋之兄年二十補邑弟子員性方正
多面折人過生平不尚華靡雖拓地數千餘畝
奴婢千指處之淡如也樂善好施鄉里有貧不
能厝者輒殯葬之地土與人坵墓居室相連聽
其蓄闢曰吾何吝一丸令人缺陷耶有司高其
德累舉鄉耆年七十卒

朱希明當明末闖逆猖獗饑饉薦臻希明負父
母潛入荆紫山採薇侍養邑以孝稱生平好善
樂施人有家貧售妻者明解囊以贖事得寢舉
鄉飲賓庚子歲卒年九十有二子瑚登壬午鄉

萬昂甫六齡父母俱喪時叔用卿未舉子乃撫之尋用卿生子二昂友愛倍篤兩弟長求析產昂不忍多所推讓焉嘗越洞庭求孤姪於澧州歸爲之婚配置祭田以厚宗族窮乏者偶拾遺金於道求其人還之邑令趙舉鄉飲卒時年七十子大中以拔貢中雍正甲辰鄉試任竹谿教諭

張文光十五歲補邑弟子員及兄瑾光登進士益自勵五入闈不售乃棄舉子業勿事邑令高

其行每遇大事輒諮商之先其父念川嘗煮粥賑饑人飽其惠文光克承先志值凶年盡免佃戶之租并火其借券戚友有不能贍者輒延款厚贈恤焉

馬宗昌邑庠生叅戎天將子給諫之鵬父也甲申鼎革困於兵亂宗昌奉其母馮氏崎嶇顧養以孝稱與人交至誠達於面日年四十不第卽奮志遊覽多所經歷以進其學晚年尤究心內典子之鵬歲進士自令博白及入諫垣無不奉

庭訓爲兢兢嘗自述有曰年二十五以前豪縱無羈繼旣乃勵名教三十以後無不可於人者考之鄉里所稱良不謬云

丁昀元邑庠生爲人孝友父母早喪遇諱辰輒哀慟終日至年八十餘不衰事伯父如父疾痛求以身代伯父死躄踴幾絕從昆弟求異居昀元止之不得晰產後從弟家中落黜元復召同爨不分居者三世食指至五十餘人昀元博雅好學門下多俊彥其甘貧敦行士大夫皆重之

蒲圻縣志

卷之十一

行誼

三

舒鳳翔字岐陽母死哀號墓次父爲葺廬於母壠三月翔始入居哭益哀有狐魅夜爲哭聲翔驚以爲母開戶迎之則魅以冶容相犯翔但哭其母魅自滅後爲方外遊刻母像隨身哭拜之張達佐以邑庠生遷上舍入選版未仕爲人謙退敦行好古事父數十年寢膳必躬親嫡庶母三敬之如一兄弟六人怡怡相得無間迨兄弟皆早卒佐撫孤恤幼不遺餘力生辛樂周貧乏丁未春淫雨連旬禾秧盡損佐乃發租種以濟

全活多人卒年六十八

舒恒言十三歲時父母病刺血書表禱延父母死兩柩未厝痛自懲恨至年三十四乃葬始娶妻遂家于鄂城囊漸豐兄產中落復購田營室與兄共之更爲兄子娶婦另以腴田資兄頤養有族叔以產質金焚券而與嘗散穀賑荒有負其金而死者其妻邀飲于內室叱之曰少而寡何可無媿耻心其行已光明類如此

張達材方正端嚴不苟言笑雖甚暑遇後生小

蒲圻縣志

卷之十一

行誼

三

子必揖衣冠接見之衙吏有名呼紳士者正詞直斥以故人皆嚴憚焉弱冠入邑庠嘗訓子弟曰與其以委曲來衆譽毋寧以方嚴正是非人謂我迂我慙我唯率性而已康熙辛丑有沔民鬻其女爲婢達材已捐多金後見女父母不忍離卽棄其金另裹餼糧以還之其年生孫開楸有神童之目十八歲領鄉薦

鄭鎬姿性穎異入邑庠有聲重然諾好施予尤倦倦於宗黨有我行收卹之義歲壬寅舉族困

於軍徭鎬一人走臺省白其寃狀費幾數百金
悉斤已產以應不以絲毫累族姓也事竣宗老
謀所以償之鎬大聲曰吾慮軍累重困吾宗今
累幸蠲雖蕩吾產吾殊安之胡用償爲掉頭不
一顧其豁達類如此

費成禘少穎異博極羣書嘗講學心山上方諸
社親死廬墓三年有無祀白骨必收瘞之兩舉
鄉飲子珪登辛酉鄉薦年八十卒

歐陽斌邑庠生幼失怙母李氏苦志教之學斌

遵母訓手不釋卷母嘗病劇爲文祝於祖願以
身代性仁慈品行端儼至如篤宗重故愛士濟
貧七十年如一日初其先廬陵公之孫炳和以
長沙教諭遷居鳳山監卽今縣堂處與駱同基
址學嶺後所祀歐駱父老是也

劉名鳳邑庠生父早喪家貧憤苦讀書日登山
取松脂以代燈寒則以棉實盛筐煖其足十年
學遂成名鳳性溫和容貌盎然年五十未舉子
事老母依依不忍離邑中張鍾元延爲西席助

以金勸其聘妾鳳以已老乃爲弟鳳續妻焉踰
年弟生一子鳳卒無子

歐陽振其父世生以忠厚傳家嘗捐金爲人解
紛振庶出十四而孤狀貌魁偉力學不倦生平
豁達大度橫逆頻加晏如也事兩母以孝聞

廖應榜邑庠生嘗從潘穆仲講學心山稍長力
學名噪一時性侃直能決大事生母早世每追
念輒嗚咽終日泣下交頤事繼母如其母乾隆
元年舉力行積學 恩賜八品頂帶壽八十二

蒲圻縣志

卷之十一

行誼

三

馬登源字祖泉國學生給諫公之鵬孟鬼也父
宗昌學識通達藩憲李慕其才聘入滇黔幕者
十餘年源綜理家政之餘築室藏經偕兄弟沉
酣辨論其中未幾弟之鵬成進士任粵任滇以
賢聲擢入諫垣典試山左源亦多所佐助焉源
爲人有志畧遇人急難不惜財不憚勞以救之
妻謝氏事其姑族人以爲孝子三杰祖暹柱祖
俱列庠序爲一時知名士

盧逢益字維夏生七歲而孤母朱氏守節益事

之以孝聞母嘗病疫將革益由遠館匍匐歸呼
天請代侍母旁神疲昏寐見神人可其請既醒
知母必甦以語家人已而母索酒進之心三果愈
益病作戒其子勿進藥曰幸神鑒吾誠許代汝
祖母死何敢欺神不去哉病數日亦愈後母享
長年詳節婦傳益年八十妻魏氏六姑殞子著
哭母殞孝行萃於一門

徐維機字陽伯維椿弟也順治十年歲貢生性
嚴毅言笑不苟一遇文人學士則與清談竟日

夜不倦所居渡口急湍病洗其先人素有志建
橋而未逮機乃捐貲獨成之名曰繩先橋晚年
卽于橋旁構室讀書其中嗣子美睿年十三入
岳州郡庠爲人慷慨喜施予亦有父風

陳學義本周文卿子文卿與陳華楚爲中表親
見楚四十未舉子已妻有娠甫生義卽俾楚抱
歸鞠爲子六七歲時母思魚義持竿往釣以奉
既而母先後舉子二義親愛之人笑其爲周氏
兒輒啼泣甲寅值吳逆變義奉父母逃匿山中

自往來江濱求生活娶妻鄧氏賢二弟成立欲析產義止之不得乃讓其所應得與弟又獨養其父母其周氏父母既早喪墳爲隣所侵獨捐價買餘山以培護父病禱于白石三顏祠路遇虎哀告以故虎遁去適驛馬至載以歸母病目發愿捐修道路母目復明父母卒廬墓五年年六十一死

廖金聲四歲失怙事母盡孝其嫡祖母與祖母俱少寡聲事之如一二弟早喪撫侄如已子雍

正七年選拔卒於太學

黃蔚字豹文邑廩生爲人博學淹貫經史家素貧處之裕如也性最孝友事父母色養倍至厚於宗族手輯譜帙於訓誨子弟之道三致意焉徐文輝歲貢生爲人謹守矩度鍵戶讀書家貧惟以課徒爲業修集家乘創建宗祠事未竟而卒族人哀之

行誼附

夫鄉飲酒禮舉之學宮所以勸善導民與綦重矣
倘舉非其人則濫踰其期則褻律誥所飭何以稱
焉舊志所列賓筵者若而人其行雖不可考然不
忍沒其姓氏仍錄如左并載近年齒德可傳者數
人以附其後

李正蔚 田有年 周維新 熊崑 俱庠生

萬啟明 魏 崙 汪應華 鄧明崑

葛蒙校 何凝思 以上舊志

蒲圻縣志

卷之十一

行誼

二十七

田應元 吳仕崇 張蕤賓 周日春

盧仲懷 陳 岱 熊裕占 邑庠生

文勝崧 子振卓癸卯舉人 馬世圖 梅文銓 子仔肩癸巳副貢

周 栢 居親喪廬墓三年 李成勳 盧義先 四歲失父事其母孝

魏方孔 彭應勅 劉天錫 黃道日

補遺

王悛居縣城登瀛坊後遷土礪大梅畷治鐵爲生值母盧氏病將死悛食不入口衣不解帶祀祖堂三夜乃私割其左肱肉和藥進之明日病瘳母後至八十餘壽終悛亦以哀毀壽卒趙令旌其閭曰又是一祥

熊若虞嘉靖壬子舉人重慶府通判熊兆祥之子年十七入縣庠旋食餽屢舉不售絕意進取性仁恕頗敦任郵風萬曆戊子曾貸里人穀一

蒲圻縣志

卷之十一

行誼

三六

千五百石是年大旱游饑負者不能償虞悉火其券舉家啜粥糜晏如也年六十九卒

舒春野明末庠生方面廣額望而知爲偉人尤積學敦行氣識超遠前後配舉十子俱英俊萬曆十六七年歲凶春野賑饑者再繼配魏氏尤賢待前室五子倍于已出春野卒後督諸子就學未幾其長子遂領鄉薦

謝竒杏爲人沉潛篤摯善經史學所著詩藝皆精悍年五十三以歲貢終幼弟竒梅爲父元韻

所鍾愛杏以田十餘畝讓予之
周玉寰明末清初人明季流寇作虐殺人如麻
白骨枕籍遍原谷間寰日背篋囊荷畚插上下
山原收殘骨瘞之不可數計鄉里上其事於前
任戴公賜之額曰義喻天和寰死無嗣事且湮
沒蒲誌已成其族中諸生周應斌者臧異夢而
爲之紀傳因編入補遺中

學品列傳

明

黃師魯字希聖號清河道人洪武中其先自桃溪徙居蒲嘗慕山谷太史之風每遇佳山水輒吟咏忘返精于篆籀風韻飄逸洪武初辟爲崇陽訓導

吳童字求叔居霞落溪不得志于時遂工詩與下雉吳明卿京山李本寧諸先達狎主詩壇邑薦紳多從之遊所著有吳山人大隱堂集

蒲圻縣志

卷之十一

學品

一

何夢周字伯莊憲副思登之長子以萬曆三十六年貢厥考官遊屬獨肆力文學暇則絲竹相隨放曠山水間耻與諸裘馬少年伍時競誇鳳毛云晚薦明經以憲副恭人春秋高不忍朝夕離膝下色養十餘年終喪後司訓永郡攝篆零庠得徘徊愚溪墨池間遂其懷古搜奇之志弟夢相蚤逝孤姪惇惇夢周辛苦維持不啻其子卒于官永人士繪春風化日圖以志去思何夢相字次公一字心寰憲副思登仲子也博

學工文受知于督學鄒公廸光八舉孝廉不第
捐貲修刻邑乘縣令張公光前稱之爲人慷慨
有大節以名教是非爲已任表章忠臣節婦條
陳里役當事者悉嘉納之復精隸書大書以著
述聞于當世惜早逝不克竟其志云子冲然庠
生從子卓然餼邑庠以文行稱

李彙字素民形貌古怪面赤如點丹砂髯長過
腹癯然若不勝衣自幼稽古博學騷狂嗜酒邑
令宜興吳石渠一見其文大奇之期以遠到而

督學蔡公官治暨王公永祚俱首拔之于郡庠
千餘人中楚中人士莫不知有素民者尤長于
古文詞金陵章公于野知沔州彙代魏司徒肖
生爲文壽之于野賞嘆詢之知出彙手以示白
門諸君無不贊服是時彙之名強半在海內矣
迨累入棘闈不遇退而著書三十餘年比之犀
愛其角象愛其齒曰藏編四方士大夫乞文者
踵至自以其文深沉博大如深衣板襜之叟不
同時尚花樣必不得已而應其求曰迂編及夫

仰山亭見夫垂絲舞絮郁郁紛紛即其中所得詩文名曰深柳堂集三書不下數十餘卷俱行于世明末催科甚急民間苦之彙爲書啟邑令其畧曰朝廷多事不敢于重之中求一分之輕父母有心何難于急之際存一刻之緩邑令感悟詳請停征其激烈敢言多如此平生嘔心爲文大類長吉卒年四十有五門下士近百人如銓部余嵩山司理張陸浦皆出其門弟采邑庠生有文名

黃圖南號海若御史玆曾孫庠廩生篤學好古徧讀經史百家言與弟圖昇樹幟文壇爭爲雄長尤善古文詞邑令林太史增志聘修邑乘學憲王公志堅聞其名招爲館客多所著撰惜無傳其稿者

何冲然字湛真副使思登之孫夢相之子少時讀書過目輒記博涉經史尤長于古文詩歌年三十餘始遊黌序然傲然不屑也飲酒豪放有劉阮風致邑令林太史重之聘修邑志才名益

噴噴焉年少早逝未竟厥志

楊四智字伯起邑庠生積學篤行老而不倦回
寸始得遊泮家貧設教六口見江干白骨纍纍
出館穀造舟收瘞之及歸囊橐蕭然晏如也南
嘉銓諫熊公開元題其舟曰慈航邑侯林大史
增志贈以贊云埋骹掩骼王政所先堊死澤枯
陰德之最有力者爲之已當長世寒生辦此誠
足動天屢試棘闈不第未獲其報時論惜之
袁昊字昌明海嶼叔子少負才氣舉止倜儻不

猶人曾以郡庠生備春秋房副卷爲當道所重
生平不營產業好施予與人言期期若吃遇公
事輒發憤敢前雖大吏不能撓屢躡闈試士論
惜之所著有春秋全旨拔薤錄憤餘艸存世

國朝

魏方振字宜爾庠生詔之子副使詔之姪也生
而英敏言笑不苟取予必嚴父蚤世與其兄方
揚弟方大相砥礪俱有聲菘苑事孀母卽五十
餘年如一日弱冠見擢于文宗葛屺瞻食餼三

十年歷試前矛入棘闈十二後學多師事之邑侯林太史高其品聘修邑乘生平肆力經史手不釋卷讀書白龍寺著有皇極敷言涉園合編世史大書易象明書梅莊艸諸書晚年學易畱心性命之理臨貢而卒

本傳馬淑昌撰

丘今芳號蓮石幼慧穎年十三補邑庠生十四擢高等食餼縣庠數舉棘闈不利耽詩酒別號醉鄉侯曠達不羈怡情騷雅似稽阮一流著有寒山集應順治五年歲貢恬隱不仕卒之前五

年預擬文自祭子二人長僧乾郡庠生友愛其弟僧軋堅不析箸集孝友傳以自觀省克成父志孫磻武庠

馬履昌生而穎悟年十六補博士弟子員毅然以斯道爲己任搜集二程遺書朱子全集研思討論不輟一時皆聞風興起生平未嘗廢學所訂有春秋四傳程傳左傳諸書

彭大章邑弟子員康熙壬申貢於鄉幼穎慧端慤勤學如不及尤嗜左國秦漢之書同熊繹山

馬南屏諸人建心山書屋講學口微吃不能劇
談及授生徒誦說徃復洞達生平處兄弟友愛
多所推讓老年結廬室西偏日自在園鍵戶不
出自號園隱

王祚垣字紫階幼英敏磊落不羣及弱冠列邑
庠卽食餼康熙丙午以毛詩魁鄉試嘗講學心
山社當時宗之出授彭水令治小醜多善政歌
聲載道任滿致仕惟以睦宗族爲務所著有燕
遊草蜀遊草

李世紀博學能文章有勇畧獻闖之亂以諸生
倡義殺賊生平樸貌古心衣冠不隨時尚與馬
南屏倡心山社四仲講學講莠執耳文壇性不
佞佛屬纊時朗吟而逝

宋希若字夔夫苦志力學朝夕督課文風遂振
事後母備極色養丁內外艱廬墓六年有雙白
燕巢其側後補黃安教諭安邑內翰宋如辰歸
養囚入氈署就學工草書得者珍之值歲歉出
倉穀以濟月塘等處年七十四卒所著詩有涉

園集鴻爪吟文有栢堂草

謝登啟號石郎御史師啟孫家貧苦志力學中
康熙戊午鄉試孝友性成族黨稱焉未仕而卒
張孺子字遇黃素嗜學漢陽江中丞采伯尤重
其文性孝友事父隅菴體志備養與人交不爲
翁七熱人有急輒應之其著作甚多康熙甲戌
歲貢授寶慶府城步縣博士年六十九卒

袁吉暉性嚴冷無戲容崇禎己卯補郡學弟子
員父元明卒幾哀毀滅性與黃陂左旦若同邑

蒲圻縣志

卷之十一

學品

七

熊繹山諸人講陽明知行合一之旨學日益進
家貧兄弟妻子怡七然如有餘弟吉佑卒一女
二男撫教婚嫁如其子平生無意爲文然真樸
得古人意先達言行經其手述者多有可觀及
卒學者稱爲月坡先生

李應泰本邑人生明萬曆年間未四十郎謝去
諸生以酒與書自娛酒盡數斗不醉于書觀大
意而已自謂有得于性命之旨叅之二氏家言
亦無不合然觀其所著撰大都以習靜爲宗亦

良知家半夜黑腰子耳下筆頗兀鼻不羈惜未能繩于法要其胸中浩浩落落自有旁若無人之概故能葆元養真壽登大耋自製有禿崑子傳亦足肖其爲人

何佳然年十四補弟子員博極羣書尤邃于禮年八十猶手錄禮記三冊以貽子孫治家嚴肅子孫世守之

唐有恒字天常號南湖性極穎慧弱冠補弟子員旋食廩餼甲午膺里選以母高年徜徉澗谷

蒲圻縣志

卷之十一

學品

八

承歡課子足不入城市兄有勲作令蜀綦致書相招辭不往舉鄉飲賓康熙丁酉年卒於家熊纘武未弱冠補弟子員旋食餼與王燕飛潘木仲馬南屏聚友講學心山社中沉酣於古至老不倦性恬退寡所經營足跡終年不入城市士林重之

潘之砥與其昆季之紀之楨皆入心山社師事南屏爲人終身繩墨不敢稍爲縱恣馬文淵先生序其所爲文曰勤苦堅確銖積而櫛比以漸

幾於廓然之域則其於聖賢之道蓋終身不敢
畔者歟之楨仕爲雲南楚雄令有治聲

徐維椿號疊峰以恩貢授安鄉縣教諭訓諸生
首孝弟而次文章 聖廟圯邑人士憚於修復
椿捐已貲獨新之嗣以母憂去服闋補興寧鐸
造士如在安鄉時爲人剛直喜面規人過士林
多所嚴憚居家以孝友稱晚年怡情山水課子
弟以禮法自守弟維機另有傳

盧逢垣邑庠生性至孝與其妻吳氏奉甘旨不
以貧缺養居父母喪盡哀垣學問古茂爲諸生
六十餘年有司重其行再列賓筵年八十二卒
所著有挹泉軒詩

彭祖武幼慧過人六歲入家塾卽善屬對稍長
工制舉業年二十補博士弟子員二十七食餼
五十九貢於廷武爲人循匕槩獲不敢稍自放
軼家貧授徒束修盡所入藉以餬口而已所著
詩文甚夥大都牽率應酬無足存者

隱逸列傳

明

燕遺民字逸德號空谷老人累以賢良徵高臥不起每脩然獨往或深山絕壁或碧澗清流則嘯歌終日感物寫懷濡毫揮藻逸氣浩發識者重之

魏正潛文雅脫塵正且表俗尤篤族黨見有賢良子弟多激勵之族有登鄉會試者輒喜慰不已所著有字學易通行世修家乘家約等書

蒲圻縣志

卷之十一

隱逸

龔乾曜副使良傳第三子隆慶六年歲貢膏遯不仕居家謹厚兄嫂相繼卒遺孤笑笑幼者纔數日爲賃乳媪哺之比長置田分給比于諸子自怡樂于山水間號江湖愚隱子挺有軼行孫逢祥中萬曆乙卯鄉試官平涼司理

祝眉壽字以介爲邑諸生尚氣節嘗面折人之過鄉里有爲不義者輒口祝公得無知乎其見憚如此廖大史奇其文延致西塾以數奇不第

終

龔挺字仲長御史晟曾孫父乾曜貢入太學不就挺生而穎異弱冠卽遍讀子史百家言爲文雄古高深督學使王公圻按部試童子科首以呂強爲都鄉侯不受論挺引紙疾書文不加點督學大奇之補博士弟子高等時司徒魏公說武部郎馬公天錦皆推爲畏友焉好養生家言絕意科名嘗取悟真叅同諸書丹鉛之別有妙悟于諸家詮解之外築室龍翔山踞窪樽石仰眺臺上白雲怡然自適有徵文者隨應之輒焚

其艸臥山房中邑人士多從之問字憲副魏公樸如御史謝公師啟數數攜具過訪畱詩相贈魏詩云鳴琴一曲依流水欹枕千峯散落霞謝詩云石上煙霞無洒掃沙邊鷗鳥識行藏蓋深羨其逸致挺顧不一報禮識者擬之王無功云會伯兄本宦周南往省之以凶夢遄歸年四十一卒子逢祥中萬曆乙卯鄉試以平涼司理解官歸

鄧士毅字子達性豪爽厭薄世趨怡情詩酒不

履公門顏其亭額曰樂天曼聲長嘯几案間更無長物居恒排難解紛人有極不平事髮指皆裂對公無不解頤子日崇中萬曆乙卯鄉試官贛州司理贈如子官

袁盛字近軒英山訓導壁之弟也孝友天植與兄壁砥名礪行聲稱隆隆州里間事父慶先意承志專任甘臙使兄得壹意墳籍以明經顯及兄卒英山盛徒步千里輿櫬歸在原摯情不遜盧毓居恒提道誼以程身率物遐邇欽式焉子

昭文中萬曆辛卯鄉試官徽州府別駕贈如

子官

龔檯字文友御史晟曾孫恂謹博學能爲經師邑薦紳多出其門下督課諸孫善爲提命長孫維三舉天啟甲子鄉試日觀榮進且受孫甘脆之奉者數年人以爲厚德之報舉鄉賓授冠帶卒年八十三

魏宸少聰慧亢爽不羣長博學工書恣數蹟塲屋卽自署宜置丘壑晚耽二氏之學結菴繙誦以無疾終

魏式國江西學政魏詔孫幼穎悟能文會遭時
變隱姓名爲江西寧州寺僧家人覓之不得居
歲餘學政門人劉同升知其踪以書迎之歸嗣
是肄業雪峯寺中後就試爲弟子員以齒德重
于鄉卒時年八十八

馬亦昌邑庠生四歲失侍事繼母如所生友愛
異母弟若同胞讀書抱竒負會遭世變遂以身
隱性好禪足跡遍天下名山所至皆有著述晚
年閉戶山齋默參太極圖畫不復問人世間事
指南小學大觀增補智囊感應通解諸書

補遺

駱瀚仕漢爲御史中丞獻帝末權奸擅朝遂棄
官隱葦川之鳳山自號曰葦隱今縣署卽其所
居遺址爲蒲版籍之舊者獨駱氏與歐氏最
歐陽炳和自長沙教諭同兄繼儒卜居鳳山監
卽今蒲邑縣署是其故址衙後有紫竹墳今學
宮東偏歐駱父老祠是其廟所也



貞淑列傳

宋

蔡氏陳求道妻爲反賊劉忠劫擄不從併母子
殺之于茗山 三子死孫逃

元

費氏何槐孫妻宋諫議師古曾孫女夫病幾殆
割脣和藥子燭有傳

劉氏王蘭孫妻雲盤夢龍之女也年甫二十六
子德俊纔六齡德原生六日而蘭孫亡姻姪欲

蒲圻縣志

卷之十一

貞淑

奪而嫁之誓死靡他撫鞠二子咸至成立至正
壬辰兵越斬黃蹂踐鄉邑而二子奉母周旋獨
完其宗人以爲貞節所感

宋氏黃開妻學正愿之女也年尚弱植開早歿
無嗣誓不更嫁以姊子沆爲後節操貞白以上
壽終時敬慕之

明

宋氏魏雲瑞妻祭酒觀之母也元季兵亂值歲
荒早舅姑相繼隕沒雲瑞卒于齊安撫孤成禮



扶夫旅櫬涉江履險歸厝祖塋暨歸有豪客奪
其田令長子訴于官獲理躬督仲子觀勵志詩
書遂爲名儒大學士宋濂爲母勒墓銘載廖志
左氏王允茂妻江夏尉延慶之孫女也元季兵
起允茂避亂郴永斬黃左氏備嘗艱苦及寓泰
寧允茂卒于官子愷年甫九齡邵武衛官吳某
謀欲娶之乃抱子咒天矢死不貳遂扶夫柩反
塋躬緼教子歷官宮僚鄉人稱母之賢以爲可
追古敬姜

黃氏廖俊妻教諭城之女也貞諒惠溫事舅姑
惟謹隨俊之漢州時趙杲方壁周冕張教四人
俱童穉乃爲縫紉衣服炊給飲食各躋顯仕子
漢生弱齡卽訓以大義撫諸子溫滂濂澍不啻
已出以故母範益張而令名無窮焉

畢氏嘉奩李田妻帳山畢義官之女也田爲諸
生畢氏恪盡婦道待尊黨以禮及田爲都御史
巡撫順天一介不取伯子承恩仲子承勳勤苦
力學畢氏之力居多

黃氏魏銘妻無子銘之京娶丁指揮女諱爲繼室丁至蒲聞銘有妻大怒亟攜女還黃氏卽追至途中懇請云願讓正室而已次之丁乃止後丁氏生三子曰頹曰頽曰頽皆貴黃氏成之也任氏連輔妻字慶貞年二十適輔閱七月夫卒矢撫遺孤芳茹荼課讀芳以明經任射洪訓連氏登遐齡數日之操六十餘年如一日郡邑上臺旌其門

曾氏但勝聰妻適聰二載聰卒遺孤兒方七月誓死守節年八十終弘治中舉貞節

魏氏廖賓南妻適賓南一歲而賓南疾數月賓南逝魏氏年僅二十哭之幾絕甘貧奉姑勉立叔之子爲嗣以奉賓南祀毀容衣縞者六十年壽八十八

黃氏胡堯元妻御史珰之女正德戊寅冬隨堯元判瑞州明年六月宸濠反知府宋被執詔擢堯元守郡僞駙馬李蕃掠城堯元集兵督戰黃氏曰君其盡忠毋以妾爲念乃懷印抱女顧季

子宣及家人永日脫有不虞吾當投井以死及賊平黃謂堯元曰吾與君得生蓋天佑社稷也趙氏謝存憲妻年二十五存憲卒撫孤謝三誥又卒趙偕娶婦龔氏紡績自給甘貧誓死守節嘉靖中旌表

載明一統志

徐氏王世廉妻事姑熊盡孝敬姑病侍湯藥不櫛沐者累日溲溺皆親承之年二十五夫疾篤欲以身殉時子良謨尚在妊夫勉止之夫卒撫孤勤苦萬狀誨之成名官至真定判以子貴膺

恩贈

鄭氏謝三訓妻以子師啟封孺人初歸謝姑甘宜人賢而司馬公嚴厲孺人事之盡禮終無所忤師啟按浙過里孺人不爲喜第謂曰御史論獄生殺在筆端刑不可濫師啟唯唯邑稱賢母楊氏劉熾妻熾生而天闔楊事之數十年絕無慍色相敬如賓夫喪極其哀毀飲食必躬奠之良久乃徹二婢感其義俱年四十餘不嫁卒塋苦竹山萬曆三年知縣胡其高申詳院道旌

其門

鄭氏何思登妻宜人姑黃宜人蚤卒事繼姑方與封君極孝敬力貧奉養不失甘旨思登舉進士歷官憲副及林居宜人日在中饋夜親紡績不敢自暇遇貧嫗嫠婦捐囊周給之性仁慈而貌肅穆四子婦每見凜然年八十有三卒

金氏謝師彥妻師彥舉進士卒于京金氏年二十子自成生纔數月金殞絕姑鄭孺人謂曰汝死姑誰與託金以姑命不死撫子泮遊四十年卿旌表之

謝氏黃祐妻年十六適祐恪事二姑祐患疾卒誓死以從以諸孤少待撫二子有成補諸生夙病一發不起年六十持身嚴謹善治家人產遇外侮力折之一時憚畏以爲有鐘夫人禮法媳何氏孫婦魏氏俱以二十孀居撫孤靡他三世孤貞里中美之

鄧氏魏正模妻事姑惟謹生子甫十歲而模早

逝鄧氏哭之幾絕久之有奪其志者鄧氏斥之
曰吾不從夫死地下以姑老子幼耳事姑四十
年如一日撫子成立身居市井一室人無間言
謝侍御師啟有傳任郡丞文定有誌銘咸表揚
之

魏氏劉元妻祭酒觀嫡孫女也年二十五歲元
卒守貞紡績教三子有成年三十便營同穴于
元之墓側年九十卒邑人何憲副謝侍御鄭少
卿有詩旌之

朱氏黃屨妾屨卒朱甘貧養嫡鄭氏及遺孤勤
苦無怨嫡卒營塋盡心篤于恩義足風薄俗綠
衣中矯矯者

張氏魏方昇妻年十八昇早世張日夕痛哭姑
龔慰諭之得不死事姑勤孝貞操不渝人無間
言年三十五卒邑中

余氏龔

良傅

嫡孫龔案

上

女生女甫二歲而案即世

誓必殉姑馬氏以女一可失恃力止之自是素
服毀容無敢以改節一者越十年始立姪

爲家後恩勤不啻已出奉姑五十年孝敬不棄
享年九十有七視履如常守節七十三年有司
屢加旌表孫生員維翰早世妻屈氏年二十餘
歲守志撫孤龔理遊泮不幸亦歿妻謝氏侍郎
魏說外孫也誓以死守一如祖姑人稱世節焉
黃氏縣丞但維城繼娶也年三十維城卒絕姑
毀形幾死者數姑泣勸之曰爾固誓死靡他
矣其若藐孤在疚何乃恒緯茹荼銜哀課子其
待前所出子牧不啻其子數與覈爲所自出也

苦節四十餘年壽八十二終神宗時奉例舉貞
節縣旌異之三子俱補庠生

田氏郭立本妻也年十九適立本二十年立本
亡誓死守節遺腹生子鐸鐸生子光宗補府庠
生田氏與姑向氏相依守貞四十年壽六十終
里中高之魏司徒題其門曰雙節

魏氏鄧日華妻華早喪魏誓不貳深居扃戶苦
節三十餘年縣令林公增志表曰霜林玉穎
姚氏謝自強妻歸謝二載夫病飲泣籲天願以

身代夫卒自經以從救解一日語其儕曰夫早世無子必以我殉竟卒

周氏劉觀妻年二十七守節撫兩孤泮遊躬勤織紉致百金贖祖產與其妾張氏俱誓死以雙節稱

饒氏貢士謝元觀妻其母爲翰林簡討魏珩如女素有禮恣元觀贅于饒其妻一拜舅姑而返甘旨餽問無間姑鄧病往侍湯藥衣不解帶者累月祖姑董孺人十年未葬悉解粧奩安厝之

年未三十卒邑令曾君棫嘉其孝德申請督學高公具扁額旌表題曰女中聖孝

謝氏名三淑侍御師啟孫女庠生自裕女也幼讀列女傳師恣之許聘邑庠魏柱國年十四獻逆屠城避地獺山爲賊所獲罵賊奮躍方塘而死邑令姚公繼舜題其墓曰英烈邑紳士有詩弔之

魏氏庠生曾曰忠妻年二十生子士雄越兩歲忠歿氏矢不再適躬勤織紉士雄長擇師教之

補武庠

王氏譚廷玉妻年二十五夫喪誓不改節雖拂
逆叢集貞操自如教訓三子必矩于正孀居四
十七年壽七十二邑侯曾公棫扁旌之曰貞節
善俗長子濟以掾史授新淦縣尉孫五三庠生
國朝

熊氏孝廉黃鳴陽妻勤儉和惠相夫弱冠登賢
書事舅姑及祖姑孝敬無二自舉一子衡夫側
室二子視如已出夫陽教諭當陽氏遣側室偕
往自畱奉侍舅姑甲辰姑病劇跪侍藥餌累月
不寐積勞成瘵忽撲地卒舅姑傷念之

劉氏宜人吏部余開熙妻少歸余奉舅姑極孝
敬性嚴靜足不踰閭辛勤操作佐夫成進士開
熙筮仕會昌宜人往從以愛民勤職相勗勉及
官京師太宜人溫清一委宜人隆師教子又節
減釵釧遠致京師助其清苦年四十六卒翰林
郎公象升弔之爲誌其墓

楊氏黃蘅妻兵部職方郎楊兆傑妹當陽諭黃

鳴陽冢媳居江夏性和惠蘊贅其家極執嬾道
甲辰姑熊氏卒越三百里來奔喪撫棺慟哭黃
家世清白喪具從節省氏力主循禮解佩環佐
之又出資奩作佛事追薦其姑後歸歸踰年卒
聞者惜之

舒氏余應試妻年二十餘夫喪長子纔弱冠次
二子襁褓有勸之改節者堅不聽勤家教子食
苦如飴年八十有八冰霜之節歷五十餘年三
子垂白怡怡堂下

但氏覃則敬妻庠生日曉母也則敬起義拒寇
歿于兵氏避亂湖干聞之欲投河死姑知其有
娠百端慰諭嚴防之彌月生男今武庠生日升
其遺腹子也孀居四十年虔事舅姑終始無間
言勤苦治生教子有成人咸稱之

陳氏陳少河女少河遇荒賑貸鄉里推重女適
雷元聲聲卒年甫二十四生子女二人翁姑念
氏年少家貧勸令改嫁氏剪髮矢志靡他復勸
再四遂佩剪髮刀自隨三十歲子喪氏躬親織

紡自給今年七十五貞孀五十年如一日同里
嘉其節壽歲時爲之稱觴

朱氏盧聯瑞妻明宗室女幼讀女訓及他書年
二十三夫亾子幼遭明末流賊起負繼姑避難
艱難備嘗得免于死教子逢益成明經氏年八
十三卒雍正四年建坊子逢益另有傳入孝行
李氏懷遠將軍但尅卿元配二十四而寡子一
璜早歿其媳彭氏年二十三無出感其姑之貞
也撫前室龔氏子宏詔若已出人以爲難

魏氏邑庠生魯恕宣妻宣早世氏年二十七姑
楊在堂子士雄方三歲會流寇起家遭焚燬氏
携子避兵黃葛山與姑相失因間就侍姑渡沔
陽姑卒於沔氏鬻衣簪棺殮如禮扶柩歸行至
黃蓋湖風大作隣船多飄沒氏伏棺號泣呼天
曰寡婦死耳姑柩與兒何罪禱訖而風息舟得
不覆歸葬先人兆豪有爭其地者氏執鋤自穿
壙負土而出血淋漓豪惻然且愕曰孝婦也是
不可櫻家盡落無以爲饘粥計獨購書治六課

子士雄雄發憤講學卒成名士氏年七十六以無病卒

陳氏年十九歸熊瞻渭爲副室明年生子峇又六年瞻渭卒氏年二十六守志不二先是瞻渭以其莊田牛馬予嫡所生三子自取薄田三十餘畝爲饘及瞻渭卒嫡子皆貧氏以其所遺產四分之日與一幼婢閉戶績紵十餘年足不履堂堦崇禎癸未六月獻賊陷鄂城信聞氏避母家賊臨蒲七日卒年三十九

三代七節婦者姓員熊夫家之妻王氏無出二十九歲而寡妾劉氏二十三歲而寡食荼苦撫子繼滋繼陶歷三十餘年而沒其長媳徐氏十七歸滋四年而滋歿二子楨與楷穉孤耳撫之成立氏六十二子皆喪將卒執孤孫手備述其難苦守節狀其次媳周氏無子值陶歿撫滋之子楷以爲嗣楷既補弟子員旋歿其妻李氏妾陳氏皆無子子其胞侄方煌李讀書能文嘗舉陶孟柳母事以告其姑曰人所以異於禽獸者

以能留正氣還天地耳其長孫媳魏氏亦早寡
撫子成人嗚呼節婦當熊氏門以衰祚薄危如一
髮引千鈞苟不留正氣以培之豈不殆哉

周氏馬俞妻二十而寡三年足不出戶限氏少
以才智聞初有點賊羅姓者踞黃茅山巔爲劫
掠人多避其鋒氏督家人禦侮賊不敢肆值鄰
饑累穀千石盡散賑不責償明年春饑人作亂
富民皆賈禍氏免于難奔舅姑喪於馬蹄湖見
山港爲之橋梁者四行人以資從姪天錫官戶

科主事欲以氏苦節聞氏曰臣兒不成名重違
先人志何以節爲榮耶力止之其知大義如此
魏氏舒春野繼妻舒先娶畢生五子續娶魏復
生五子舒死時年六十二氏年尚少前妻子有
齒過于氏者有年相敵者氏綜家課子循循有
禮法舉所有產悉以昇前妻子諸子亦善體氏
志兄弟中從無間言後氏子亦舉孝廉人
以爲課子有成

劉氏進士張瑾光妾年十八歸瑾明年有娠光

卒遺命其弟曰氏雖年少曉大義所誕果男必
亢吾宗善視之後弟恐其志不堅微試以言氏
艷然舉子達倫有文行孫濤康熙丁酉鄉薦氏
年八十卒

姑媳節婦余司楚妻吳氏媳熊氏吳既孀代未
供子職人稱娶媳當如吳氏女康熙戊辰值夏
逆變吳携子同鄰女避兵匿巖穴中時多虎鄰
女畏而強其歸吳以兵未退辭焉次日其弟尋
至山見虎伏巖側吳母子端坐無恙又來延其

室吳冒火捧考妣暨夫木主出他無所顧媳熊
既寡其父母欲奪之感吳訓矢志曰感孝節義
之家不忍玷先型也遂相倚白首終身吳于雍
正八年建坊

沈氏張達兼繼妻湘邑進士任蘓州分府沈以
曦之女初達兼負才品邑推重之兼曦以女繼
婚氏年十五歸寡言笑嫺靜和輯若不勝禮知
夫之才憾其名不成而達兼竟歿氏以瘠病強
生善事其翁教其子漣涉以慰翁心涉列邑庠

氏尋卒長子漣娶熊氏氏歸而姑病竭力調持
怡顏周至與其夫告之祖宗欲以身代嗣漣二
十四亦早卒熊氏無子守節每往祭於姑夫之
塋聞者愴然流涕終身縞素至四十歲卒
賀氏十七歲歸庠生張達可十八生一女十九
生子洞纔七月而夫卒洞幼多疾氏禱於祖曰
如綫一脉氏生死與俱夜得佳夢果愈氏檢遺
書數十卷待洞長讀之洞受教傳其子楚東東
才且竒人以爲苦節必有後云

蒲圻縣志

卷之十一

貞淑

十五

張氏卽賀女年二十歸沈援生子不育三載援
卒氏勵志守節事姑謝氏維謹繼嗣胞侄之琮
初氏侍母側以孝問母教之復問節母默然再
問母曰惟守節者知之氏年五十姑亾服禫遂
卒

任氏熊朝宗妻十八適熊二十七遂寡舅在堂
年已老生二子俱幼康熙戊辰夏逆猖獗伯欲
奪其志氏聞之將自縊鄰戚勸勉乃止卒能奉
舅撫子以成家壽八十而終

任氏庠生張達偉妻年二十五懷孕而孀彌月生子衍值夏逆亂氏撫孤臨柩痛哭解粧奩購地昇柩就葬乃避兵其從容如此今建坊入祠劉氏周日監妻初日監從學心山社周蒲山愛其才懼其不壽及弱冠果歿氏年僅二十有九生一女無子舅姑皆年老氏勉奉甘旨立侄哲夫爲嗣

黃氏李仲純妻純性敏氏勸之勤學純早歿氏年二十八無所出舅姑命立叔孝廉之次子大年二十八而寡與姑同節生二子長光松次光梓俱成立

吳氏宋孟甫妻年十八適宋生一子甫五歲一女甫三歲孟甫亾氏年二十四事其姑舒氏生養葬祭盡禮初城居夫沒後徙畢河山庄課其子督僕婢耕耘以自給壽八十六歲齋沐辭祖子孫羅拜坐終

馬氏進士徐美大妻太守練之裔也年二十七

聞夫卒于京一慟而絕越三日乃復蘇姑王氏勸曰汝從夫死固宜吾與襁褓兒何依氏遂忍死唯姑命自是朝夕紡績編衣茹素六十餘年八十六乃卒

龔氏于康熙癸丑冬適舒黃宰時丁吳逆亂明年五月宰客洞庭賊執而殺之氏年方二十父欲奪其志氏曰忝夫不仁辱身不義棄翁姑不孝父烏用此女爲媒至大詈而退翁姑俱失明氏左右扶掖以終天年喪皆無失禮年八十卒

詹氏龔榮伯妻苦節四十餘年壽七十而卒初榮伯值明季亂倥偬戎馬父喪未葬母熊氏在堂榮伯歿家貧歲歉兩義子遠颺氏謹事其姑以終卒力葬三喪無遺憾子二長世成以其先世鄉賢爲奉祀生

劉氏歐陽世生妾世生年六十乃娶舉一子振世生歿氏年二十二與嫡胡勤儉持家共禦外侮故振得專志讀書以成名壽八十一而卒

邱氏雷特圭妻年十六適雷其祖舅與舅皆未

及事祖姑嫡庶姑兩世三孀氏事之惟謹特主以苦學成疾氏每焚香祝以身代度不起歸白母號泣于父墓曰雷郎有故無復相見日矣母初不察其言之悲而確也及特主死氏送之壙求旁穴共瘞或唾其迷明日氏往溺母與姑急拯之得免越數日氏乃私用緘布密縛肢體奔投狂流家人不及救駭聞數里得屍于雷家橋上灣合手若揖特立猶生時年十九

王氏鄧大聲妻氏年二十四而聲歿舉子虞佐

纔六歲氏撫鞠歷千難百折以奉其姑事塋中禮氏六十四而終

胡氏庠生汪世琦妻既歸六年賢聲甚著舉一女而夫卒承訣時氏嚼指流血以示信乃以夫遺書教其繼嗣汪昌昌食餼而歿又撫汪登登亦亾氏女既長遣適廖復早死氏爲撫其次子廖斌教之成材

楊氏陳六御妻年二十四歲夫故生一子長三歲次僅七日氏撫之成立值歲歉姑病不能延醫

割股以代湯藥

徐氏庠生程應中妻十九適程事舅姑孝二十
三歲夫卒子洛傳逋二齡次子清傳尚在腹氏
誓不二志家極貧夜勤紡績日飯茶蓼以爲活
駱氏張海塘妻初海塘性敏博覽羣書氏十八
歸二十一而寡子女俱無常淨居一樓焚香祀其
夫像每取古貞烈傳流涕讀之不忍寘年五十
卒

王氏張萬資妻年十八歸萬資二十七值萬資

浦圻縣志

卷之十一

貞淑

十九

死剪左手指肉焚鑪內誓不再嫁無何子又死
孫方五歲氏撫育孤孫復極勞瘁云

錢氏龔季宿之妻也適龔時舅逢烈致仕歸姑
游氏孝事無缺年二十一季宿早世守志不渝
一子璲甫三歲躬緝以教乾隆二年建坊

吳氏郡庠生沈偉妻邑庠生沈仔嗣母十六歸
偉婉婉勤慧生子中乾未週而夫早世氏年止
二十一呼捨不欲生姑泣止之氏乃忍死教其
子及子逋有室不踰年歿氏死志益決姑一勸

仆地幾殆氏亟扶之曰姑乃如是媳安忍不同存歿哉舅命其立仲叔之子爲嗣後姑享年八十有八而終氏不踰年亦卒時六十有七矣馬氏庠生劉紹崑妻進士馬天錦孫女南寧知府應命孫媳也氏曉文善書二十二而夫喪子生週歲氏毀容縞衣持齋四十年子柱列邑庠堂上嫡庶三姑善事以終

張氏汪聖錫妻二十六而寡子櫜甫二歲家貧奉公姑甘旨必盡及櫜長生孫猶勤紡績兄鐘元欲爲建坊氏以節非爲名力止之年五十九卒

余氏但錫丸妻二十而寡生子椿至三歲有足疾氏歷艱辛撫之成人既娶生二孫歷五十餘年而舉曾孫五

吳氏汪遠重妻二十二夫喪遺孤一矢志五十餘年教子曉文藝

談氏戶部清吏司鄧廷猷孫之通妻年二十五之通卒長子宗霖七歲次子宗景二歲氏勤紡

績事姑嫜養至盡禮訓二子以義方素食縞衣三十餘年娣姒間奉爲齋母

陳氏庠生程呂中妻年十七歸程庶姑艾性嚴厲氏事之謹年二十四夫卒氏嘔血悶絕姑以子幼慰姑歿繪像拜奠先是夏賊亂氏携子奉姑避難既平督子衍洛就學燃松脂爲燈冬夜以稻溫其足自從旁分光繭刺嘗歲暮窘甚洛從市中得遺金歸氏命召其人還之其人以禮謝弗納誠洛曰非義之財勿以污吾清白也其蒲圻縣志

卷之十一

貞淑

五

節義凜凜如此雍正五年建坊

廖氏李增桂妻桂力學攻苦構病卒氏年二十三兒長三歲次止數月嫡庶姑年且老氏不忍以死殉勵志苦節嫡姑熊有慈範氏恪遵其訓事之數十年不懈庶姑無所出氏事之如嫡禮及卒塋祭皆從厚長子恢邑廩生

張氏何世祥妻二十歲歸何事祖姑謝與其姑陳極善二十五世祥卒生子應鐘僅二歲一女僅五月氏命僕菑田數十畝以奉先祀督子讀

書不倦或隣里有急輒應之

張氏徐宣昭妻年二十三而寡生一女無子初宣昭以宦後家貧親喪氏父招之贅踰年氏請于母廬于隔隴以奉公姑之靈又延繼姑供膳宣昭久病于外終無怨言及歸歲餘卒塋屋旁日夜悲咽諸兄弟仍還諸室氏不從甘心貧苦終始不渝

賀氏張景妻其母無子守志及十九歲母招景來贅氏以老舅及二姑未得事乃隨夫歸後其

母以年老故復命往生子二長開登次開繡及二十七景卒氏紡績以餘貲送子就塾課藝居市中數十載內外無間言

李氏何容安妻少適何不及事舅惟紡績以養其姑姑壽八十餘終氏哀毀踰禮鄉里矜其貧或貽以鹽米辭不受曰吾聞無勞而獲身之災也泉益重之

李氏歐逢鳳妻年十八歸鳳生子斌及二十二夫喪謹事公姑鄉里皆稱其孝尤能延師教斌

不辭勞瘁邑中諸先達多贈有讚云

歐氏逢鳳女張隼妻性敏少識書算善操持年二十二而寡生子杰苦志撫育以紡績營夫葬族里有因貧改婚病死不能醫葬者脫簪珥周邱之

周氏洪羽皇妻年十九來適洪二十二夫死氏撫孤雛事翁媪躬勞紡績備歷艱辛今孫魯蔚起子特庠生孫士鵬廩生人以為克家之報云張氏覃弘諧妻十八歸覃及二十五弘諧喪子

蒲圻縣志

卷之十一

貞淑

三

方斌僅三歲撫之成立不幸三十而歿乃值衰暮鞠摩其孫周攀尤極劬勞云

姑媳三節者周氏李達遜妻十八歲歸李生二子長孟乾次澤廷年二十四而寡紡績織衽以育其子其長媳陳氏孟乾妻年十六歸二十六而寡無子孟乾臨危時囑曰汝無舅姑并無子息可隨汝志氏泣曰生為李氏人死當為李氏鬼其次媳孫氏澤廷妻年十六歸二十八而寡生子二長大經次大綸俱幼氏卒能撫教成其

名姑媳間俱無憾云

李氏余映極妻素寡言笑極性敏好學二十
六早亡無子生女僅四歲立族侄珍爲嗣

謝氏庠生錢震揚妻初震揚善屬文十餘歲輒
通經史性不受羈束氏十八歲歸錢相夫以義
夫亡氏悲啼幾死者再親澆殮封築墓立欲廬
其側父母召之歸水漿不入出其釵佩服物以
供塋具囑與夫同塋亦遂率

魏氏漆昌明妻夫死不二茹藥飲水幾七十載

清圻縣志

卷之十一

貞淑

十四

壽至百有二歲子孫林立媳汪氏年少喪夫亦
以苦節見志

舒氏適王姓居方橋園十九守節事姑孝教子
嚴壽九十鄉里稱之

項氏適馬姓二十守節居勞精園勞紡績教子
有法

涂氏唐有華之妻性幽靜年十七聞夫病願歸
唐奉藥餌父母許之歸三載夫歿氏對棺封髮
矢死靡它勤紡績自食其力後遇 皇恩有欲

請於當事者氏不之許蓋無子苦節爲世所難其力辭旌門之典尤闕閣中所僅見者

謝氏庠生王洪宇妻洪宇少勤學有文名不幸早世氏時年二十有五苦節自勵善事其舅姑課子讀父書以承先志

尹氏熊之柱妻南嘉貢士尹章世之女父母早喪弟幼氏年十八贅柱甫結褵十日柱父士燠病亟柱歸省不一月士燠死柱哀慟成病不三月亦卒氏聞斷髮毀容悶死復甦日夜悲號成疾及二年卒夫婦孝節嘉蒲人並稱美之氏生于康熙戊子卒于雍正戊申

汪氏漆啟曜妻年二十四而寡事老姑極謹晨昏紡績寒苦倍嘗撫其子成立守節五十一年王氏徐渭占妻家貧壁立年二十四夫亾乏嗣止生一女氏願以死殉念舅姑無所倚強爲未亾人力供堂上甘旨不缺夫家貧苦節難矣若氏者無子而矢貞尤非迄今所易邁者

宋氏鄭尹公妻歸鄭綜里內政見夫體弱爲備

側室袁氏以延其後既而宋氏舉兩子側室生一女宋氏合哺之及尹公歿長子開佳甫三齡次開仁僅五月宋氏守志感其側室共明從一之義且不忍兒曹墜厥先業聘師教讀寒暑不輒未幾佳補郡庠生仁補邑庠生

徐氏張甫妻年二十夫喪矢志不二事舅姑如禮長子開鼎歿喪次子開泰早亡遺腹誕一孫與媳程氏同撫育食苦茹淡以終其操

三世六節婦者庠生廖憲臣之繼妻龐氏十七

歸廖明年夫病又明年卒氏無子遂擗石死小殮將入棺有微息至次日而甦後撫前室三子以終身憲臣胞弟庠生廖師臣妻何氏年二十五無出力勸其夫納張氏張氏年二十一生駿生與其嫡何氏共乳哺未及二年夫喪同志守節駿生早列邑庠娶潘氏事兩姑至孝十八歸二十五夫喪撫子三長金聲拔貢生有傳次宗諱庠生次宗說十歲能文雍正五年與姑何氏張氏俱建坊其次媳李氏宗說妻十八歸廖二

十四夫喪亦以頭撞柱死而復甦子世仰
懼不能成立請于姑立柏金聲之四子世作爲
嗣教之學又嘗哭其姊之寡也初憲臣師臣之
胞侄應機妻魏氏亦少寡守志全孤於乾隆二
年建坊

錢氏黃進公妻素以孝順聞姑李氏性嚴切或
怒不食錢氏亦不忍食夫早世訓子開彬艱苦
畢歷乾隆二年建坊

丁氏余堯章妻年二十六而寡子世瑞甫半歲

蒲圻縣志

卷之十一

貞淑

二十七

公姑皆老氏守節奉甘旨無缺死葬祭如禮
教子務本力田以勤儉振其家

鄒氏徐樑妻進士徐淑嘉之幼媳也年少守節
艱苦彌貞雍正十一年 旌表

張氏王首山妻年二十四喪其夫奉寡姑程孝
謹初首山遺言令其子從師受學又卜吉爲
其父改葬只悉遵行之一如其生

陳氏馬漢妻年十九歸漢以宦後中落氏食貧
作苦晏如也而漢卒歿于貧遺孤僅匝月氏撫

之越三年孤又死父母欲奪其志氏覺從容赴宅後新塘死

胡氏江鳳文妻鳳以藝外出營生病歸與氏永訣曰吾死後若可改適氏悲憤曰寧死以報君遂溺水死族人網其尸與夫同葬于雷家坡舅姑伯叔子女俱無

周氏李日凡妻夫以經營遠出氏獨居隣有無藉龔某者窺氏少且艾輒往挑之氏詬厲不可犯一日氏往同巷吳借茗具龔乘醉尾其後

蒲圻縣志

卷之十一

貞淑

三

伺左右無人戲以手捫其乳氏號哭奮罵歸遂密紉其衣履赴池水自溺死事聞置龔于法周循例得旌

姚氏周應和妻性貞靜荻簾紙牖語不聞於外事翁媪得其歡心十八結褵越五載夫患危病氏籲天求代中夜聞夫嘯呻疾楚輒自嚙其股夫未死前語婦以服闋當嫁氏聞言欲自引裁夫力止之夫氣將絕氏長號結束衣履趨出啟崖右小扉赴池水先死

補遺

魏氏庠生衍顏妻顏積學薦行有高義魏二十
適顏爲繼室前畢氏生五子魏亦生五子恩勤
前子過于所生至鬻已子分產爲之畢姻佐治
內外禮法肅然年三十五顏卒年五十六子鳳
池中崇禎庚午鄉試有才名壽七十餘終子孫
在庠者十餘人邑人魏司徒爲序德節合傳

仙釋列傳

晉

葛洪號稚川晉時人以勾漏出丹砂求爲其令
修煉服食後棄官遍遊名山尋羽化處及邑下
髻山距山十餘里復有山對寺競秀因棲真其
上卒仙去故人稱爲黃葛山以曾有黃真人居
之也上有劍池丹竈其水清冽異常飲之能愈
宿疾前有令見朝禮者騷繹呼聲動山谷恐
不便地方因塞井平竈山空日暝時聞有棋聲

蒲圻縣志

卷之十一

仙釋

唐

劉元靖武昌人爲道士師王道宗道宗仙去遂
感悟遊名山入南嶽峻峯鑿石穴以居絕粒煉
氣唐敬宗召入思政殿問長生術尋旋歸武宗
復召入禁受法籙賜號廣成先生還山宣宗時
忽天樂浮空而去惟存杖履焉舊傳訪道南嶽
借徑吾蒲耽玩山水者積歲故羊泉有仙人洞
仙人橋皆劉之遺蹟云

明

歸玉崖元末隱者精形家言著名江湖明初時
上徹御聽因落髮一瓢一笠遊至蒲圻常跏坐
上方靈鷲二寺精通釋典卒葬鳳凰山下每清
明時寺僧鐃歌鼓吹于墓至今不廢

王玉號荆山道人蜀人也少慕冲舉遊至郢上
遇一黃冠羽衣翩躚因從遊奉掃除之役棲龍
牙山山卽蒲金紫峯久乃棄去之玉山洞洞在
蒲郭外之鳳凰山山側有燕巖龍洞遂定居焉
廖太史鳴吾曾題其上云燕巖棲竹日龍淵貯
蘿煙卽其處也後道人降箕輪筆飛動詳書遇
師棲洞及廖詩因知之

國朝

上方寺第一代方丈元潔瑩禪師雲門湛禪師
法孫弁山瑞禪師法嗣初住洞山順治甲午年
合邑迎住上方開山嗣住弁山旋興復雲巖晨
祖庭迎住藥山儼祖庭康熙辛亥師年六旬赴
雲門請出院日拈世尊于涅槃會上以手磨胸
告衆云汝等善觀吾紫磨金色之身瞻仰取足

勿令後悔若謂吾滅度非吾弟子吾不滅度亦
非吾弟子等語衆異之至壬子又七月廿六日
師示微疾馳書辭諸山僧檀護大衆造方丈請
末後句師趺坐朗聲召云大衆■衆諾師云聽
取聽取泊然而逝衆始知前出院拈示意

楊易生蒲圻人遊江漢間自言年已百歲誨人
以修身明道之學旋遊太和未幾歸返曰山中
人具殺機不可與處於月湖中結茅以居自是
絕粒惟日啖泉水一勺久之端坐而逝炎暑三

日顏色如生